

# Orugyero Rw'omuntu Ohikiriire

Jeffersonville, Indiana, USA

Okwaikumi 14, 1962

1 Yebare, Ow'eishe-emwe Neville. Mukama akuhe omugisha.

Ni kirungi okugaruka omuri tabirinaakuru omurundi ogundi akasheeshe aka. "Akasheeshe karungi," k'obugwa gye ahariimwe mwena. Kandi niinyesiga ngu eki nikija kuba ekiro kikuru ahariitwe twena, omu-omu Kubaho kwa Mukama waitu. Kandi hati nyine eishomo akasheeshe aka. Niinyenda kugyendera kimwe omu ishomo eri, ahabw'okuba n'e . . . Ningira ngu ni rikuru. Kandi ni . . . Kandi kugira ngu omutwe gw'abantu gutateganisibwa munonga, nimumanya, okumara omwanya muraingwa, baingi beemereire. Ninja kutaahira kimwe omu ishomo.

2 Kandi hati, ekiro eki, niinyenda kugamba aha ishomo ry'Omwebembezi W'Amagara Gangye. Kandi nyine amatsiko ngu boona abarikubaasa, boona abarikubaasa, nibaija kubaho obwire obwo omwebazyo ogu. Kwonka, ku oraabe oine ekanisa yaawe, nitu . . . buzima, nitwenda ngu mube omu-omu kanisa yaanyu. Obwo nibwo bujunaanizibwa bwawe kubayo, ahu obujunaazibwa bwawe buri, kutuma omushana gwaweyire.

Hati, nituguma twine amatsiko ngu, buri bwire ku orikugaruka, nitwija kugira omwanya mukye ogweyongyeireho hanu. Kwonka kitugumiire, oo, hoonahoona. Akakiiko k'ababiiki tihaine eki katakozire buzima. Kandi bakyohereza omu mwanya gumwe, baikiriza; reero bakyohereza ahantu ahandi, banga. Kandi bakigarura, kandi bakiikiriza hanu, kandi bakigarurayo. Oo, ka tutungire obwire bw'okugumirwa! Kwonka, noomanya, Sitaane atuura ari omurwani orwanisa ekintu ekihikire. Ijuka, otuura ohikire ahari . . .

3 Mbaire niinyebuuza ah'ori, Anthony. Nindieba obugaine na sho. Kandi nagire amaisho, omu bashomi. Agizire ngu obaire oshutami aho. Tushemereirwe iwe na sho kuba naitwe, Ow'eishe-emwe Milano okuruga New York. Nyine amatsiko, okuza seeri y'amayanja obwire obu, ntungye abandi, omuri New York, aheeru okwo, Mukama ku araasiime.

N'ahabw'ekyo twine amashemererwa maingi ahabwa buri omwe omuriimwe. Ni-ni kirungi imwe okuba hanu.

Kandi tugizire obwire burungi munonga nyomwabazyo ekiro, nari buzima naashemereirwe. Ntungire . . . [Abateeraine baagira bat, "Amiina." -Omur.] "Kandi Isaaya omuri hekalu." N'ahabw'ekyo nimu . . .

Kandi akasheeshe aka, nitwenda kugamba aha ishomo, nari kwegyesa, nimmanyisa, ku turaabe nitubaasa, "Kwombeka Eihema erihuriire; kwombeka kwo-kwombeka Eihema erihuriire ry'omwanya gwa Ruhanga ohuriire kutuuramu, Omuntu ohikiriire; Eihema rya Ruhanga ohuriire, omu arikutuura." Kandi ku . . .

4 Nimmanya ngu baine okweshongora kurungi oku hanu. Tintunga bwire bw'okukuhurira. Kandi ekiro eki, niinyija kugyezaho kuhika eifo kunu, omukyara Wangye angambiire aha W'eishe-emwe Ungren, ningira ngu eryo niryo eiziina rye, kuruga eifo omuri-omuri Tennessee. Hati, abaire ari hanu ekiro kya nyomwebazyo. Tindikumureeba akasheeshe aka, kwonka ningira ngu haine ahi ari hanu. Kandi niinyenda ngu muhuriire naayeshongora ekiro eki, ku ndaabe nimbaasa, ngu, obundi Okushuma Kuruga Omu Kitiinisa Kye, nari K'Ori Mukuru. Ekyo nkaayenzire kukihurira. Ni bangahi abakwenzire kuhurira Ow'eishe-emwe Ungren? [Abateeraine baagira bat, "Amiina." -Omur.] Oo, nku-nkunda okweshongora kurungi. Kandi Meda agizire ngu aine eiraka nk'ery'abashaija. Kandi nikiinyijutsya Ow'eishe-emwe mugyenzi waitu Baxter; n'omweshongozi, nawe, nk'oku twena turikumanya. Kandi Okushuma Kuruga Omu Kitiinisa Kye, nari K'Ori Mukuru. Ningira ngu naamureeba hati, kuriya . . . Ekyo ni kirungi, Ow'eishe-emwe Ungren, ekiro eki, ku oraabe nookunda, ku oraatsigare? Nooza kutsigara, nari nooza kugyezaho kutsigara otegyereze saaviisi ya nyekiro? Mbwenu, ni-ni . . . Mbwenu, ota . . . Ninkugambira, kandi shi eki, ku tu . . . Tindikwenda kureetaho okutakirizana kwona n'omuntu weena. Kwonka ahabw'enki, n'ahabw'ekyo, ku turaabe nitubaasa, omu bwire bw'Obumanyiso Mushanju, ku turaabuuriire ekyo, ku muraabaase kwija. Nkaayenzire kukikwata aha rutambi rw'amaraka, nimureeba, kikitunga, K'Ori Mukuru, kandi, na, Okushuma Kuruga Omu Kitiinisa Kye, omu bwire obwo.

5 Oo, ti kirungi kuheereza Mukama? [Abateeraine baagira bat, "Amiina." -Omur.] Tindikumanya eki naakukozire ku naakubaire ntari Mukristaayo! . . . ? . . . Ni kirungi munonga kuba Omukristaayo. Nimpurira niinyenda kugurukyera n'okuteera akaari, n'eiraka ryangye ryona. Okuba Omukristaayo, kiteekateekyeho, weena ohamiire omuri Kristo!

Nimmanya nshobya eiziina ry'omushaija ogu buri kaire. Niribaasa kuba riri S.T. nari T. S., nari ekintu nk'ekyo. Sumners, Ow'eishe-emwe Sumner. Aka . . . Niinyenda kumusiima n'omukyara we mukye omukundwa. Ninteeekateeka ngu omukyara ogwo amazire haihi, kikareebeka nka, haihi ameezi mukaaga, naateera na taipu ekitabo eki ky'Obusingye Mushanju Bw'Ekanisa. Kandi hati tukiine enyima hanu, kihweire kuteerwa na taipu, kitegyereize kushwijumwa, kikakorwa omu muringo gw'ekitabo, Obusingye Mushanju Bw'Ekanisa. Ow'eishe-emwekazi Sumner, ah'ori hoona, buzima noija kutwikiriza tukushashure ahabw'ekyo. Ekyo, kikaba omurimo gw'amaani munonga. Ahabw'enki, kiine omuzimba muhango guti. Nikibaasa kuuntwarira nk'amezi mukaaga okukishoma, mbwenu shi okukiha aha rutambi rw'amaraka, haza okakihindura kandi okakihamu ebigarukirwemu, n'okukikoramu ekitabo. Nitwija kukitebeekanisa kandi tukyohereze omu ikorero ry'ebitabo juba, ahakuba nituteekateeka ngu n'ekintu eki abantu bashemereire kutunga hati hati, kandi nimubaasa kukishoma. Kandi Bill abaire naanyoreka, ku naataahiram omu enyima kuriya, edakiika nkye ezaahingura, ngu-ngu-

ngu kibaire ki-kitebeekanisibwe hati kuza omu kyoma ekirikuteera ebitabo. N'ahabw'ekyo, ow'eishe-emwekaza, tabirinaakuru neija kukushashura ababw'ekyo. Tindikugira ngu ekyo okikoreire busha. Kandi-kandi nari obundi tuki . . . Ku turaatungye ekitabo ekyo kandi tukataho omuhendo gwakyo, nari ekindi kintu, nitwija kutaho omuhendo ogu oraatungyeho ekintu buri kaire baabitunda, oku baraakikore kwona. Ogambe n'akakiiko, akakiiko k'ababiiki, nari bamwe omuribo aho, kandi nibaija kukikukorera. Mukama akuhe omugisha buzima.

6 Ow'eishe-emwe mukye okuzire n'Ow'eishe-emwekaza Kidd abashutami hanu, ari nk'ahansi y'emyaka igana, kakyeho. Kandi mubugaine akaanya kakye akaahwaho, reero yaagira ati, "Mbweni, ogu nigubaasa kuba omurundi gw'aha muheru kukureeba, Ow'eishe-emwe Billy." Yaagira ati, "Nkuzire munonga."

Naagira nti, "Oo, mugyenzi! Tindikwenda kuhurira noogamba ekyo. Muri nk'omukaikuru omuzaire nyina w'abaana na ishebo." Nitukunda Ow'eishe-emwe n'Ow'eishe-emwekaza Kidd. Itwe, buri omwe, nitubakunda. Kandi nikitu . . .

Hariho eki kirikukora omuriinye naabareeba nibataaha omu kanisa, kandi abantu babiri bakte bakuzire batyo. Kandi teekateeka, bakaba nibabuurira Engiri ntakazairwe. Kandi ndi omushaija mukuru. Nabwo, fa kuteekateeka, bakaba nibabuurira ntakazairwe. Mbweni ndi hanu hati, naatandika kuteekateeka ngu ndiyo nimba omugurusi. Ku mba ndi haihi kuteekateeka kureka. Ndeeba Ow'eishe-emwe n'Ow'eishe-emwekaza Kidd nibataahamu bati, "Mukama aheebwe Ekitiinisa! Haleluya!" Ngira nti, "Ngaaha, niinyehurira kurungi." Eego, sebo. Okubareeba, oku barikubaasa, ka nibakugaruramu amaani!

Reero oyetegyereza ngu, haihi emyaka yangye, omurundi ogundi, beitu nibakibuurira aheeru. Baizire omu kasheeshe k'ekiro eki kandi bashaba ebitabo, ku baakuba nibabaasa kutwara ebitabo reero bakabiguza. Baabaire nibenda entambi z'amaraka, kugira ngu babaase kuza aheeru, baretere abantu kujunwa nibataho entambi z'amaraka ezi, kandi obwo bahikize haihi emyaka igana y'obukuru. Hati "amapapa gaawe abiri" gari nkahi agu tubaire nitugambaho nyomwebazyo ekiro? Eego. Naatandika kukiteekateekaho nti, "Agangye garahi?" ekyo-ekyo ku akigambire nyomwebazyo. Oine emyaka engahi, Ow'eishe-emwekaza Kidd? [Ow'eishe-emwekaza Kidd yaagira ati, "Nyine emyaka makumi munaana na gumwe." -Omur.] Makumi munaana na gumwe. Oine emyaka engahi, Ow'eishe-emwe Tom? [Ow'eishe-emwe Kidd yaagira ati, "Makumi munaana na ibiri."] Emyaka makumi munaana na gumwe na makumi munaana na ibiri y'obukuru, kandi na hati nibakikoresa amapapa gaabo, nigakora, nibakigumizamu.

7 Ekintu kyona ekirikushoba omuri Ohio, eki Ow'eishe-emwekaza Kidd arikumanya, esimu neeteerwa omuka. Ekiro kiri, akateera esimu, kandi omwereere, omwana muto w'omuhara, niinyikiriza ngu nikwo, akazaarwa, amara gari aheeru. [Ow'eishe-emwekaza Kidd yaagira ati, "Oruhago." -Omur.] Oruhago, ruri aheeru y'omwana. Kandi dokita akaba atarikumanya eky'okukikorera, kandi akaba atiinire kumushemeza. Tukashaba. ["Bakamusheemeza, Ow'eishe-emwe Branham, kandi baarugaruramu, ababw'okuba, bakagira ngu, 'Akaba naaza kufa.' Reero baafa kugaruramu amara ge."] Baagaruramu amara ge, n'okumusheemeza, reero bateekateeka ngu naaza kufa. Kwonka yaaguma ahuriire. ["Tihariho muhengyere."] Tihariho muhengyere obwo ababw'e-ababw'e . . . okuruga omu mushumiko, kugira ngu eby'okurya birabemu. Kandi Ow'eishe-emwekaza Kidd yaagaruka yaayeta. Twagaruka twashaba, kandi hati aine omuhengyere murungi. Mbweni ngugu ari hanu, nk'omujurizi; dokita, nawe. Mwareeba? N'obujurizi ngu Mukama Yesu, Omuhangi mukuru! Nimureeba eki Sitaane yaagyerizeho kukora? Okumaraho amagara g'omwana ogwo. N'ahabw'ekyo, mwareeba, bwanyima niinyikiriza omukazi ogwo akagarukira Mukama. ["Omukazi akagarukira Mukama, aho honyini omu nju yangye."] Akagarukira Mukama. Ow'eishe-emwekaza Kidd akamwebembera yaamugarura ahari Kristo, ahanyima y'eky'amahano eki kikuru kukorerwa omwana we.

8 Banteereire esimu kuruga California, nyomwebazyo, ow'eishe-emwe omuheereza mukye aheeru okwo, ou naabaire ndi nawe obu naaza California okubanza, emyaka mingi ehangwire. Omwijkuru we muto akazaarwa aine-aine obushekye buna . . . bushatu bwigaire omu mutima gwe. Reero naamugambira ekyabaireho ekyo. Naagira nti, "Ruhanga owaabaasiize kuhanga eki ekindi kandi akakitereesa, buzima naabaasa kutambira mwijkuru waawe." Gambira omwojo agume omutima.

Kandi omwojo ogwo akaba ari omu ruteerane obu naabaire ndi California okubanza, hahingwireho emyaka nka ikumi na munaana hati, emyaka ikumi na mukaaga ehangwire, ehweireho. Kandi nkaba ndi California. Kandi aka . . . Oruteerane rukakwata aha mwojo munonga ogwo okuhitsya obu . . . Ku baatungire omwana, kandi akazaarwa, reero bakareeba ngu hakaba hariho ekintu ekishobire, akaba ari wa bururu, kandi bakagyezaho kumupikamu omwoya, n'ebindi. Kandi akaba naareebeka nk'otaraakire, reero baadokita obwo baamukyebera, kandi baashanga ngu obushekye bushatu bukaba bwigaire omu mutima gwe. Hataraho ahiigukire na kakye, mwareeba, a-akashekye kamwe niko kaabaire nikapika konka. Kandi akeeta ishe, reero yaagira ati, "Taata, yeeta Ow'eishe-emwe Branham, jubajuba. Mugambire ngu byona . . . 'Shaba Kristo kusha. Naaza kukikora.'" Nikyo ekyo. Oo, mugyenzi! Okukwatwaho n'amaani okwo, eki barikureeba, mwareeba, tukigambireho, nyomwebazyo. Ekintu ekihikire omu bwire obuhikire.

9 Mbweni, twagumizamu nitugamba, titukaahika omu ishomo, tikwo? Ni nk'ebikatsi bya sukaari ebikwatsire omu kasheeshe k'embeho, nibiba bikwatsire nk'oku birikubaasa, nimumanya, kandi byona bikwatiire kimwe. Tushemereirwe munonga okugira okuteerana nk'okwo. Eego, sebo.

N'ahabw'ekyo ka twecureeze, hati, reero tutaahe omu ishomo hati. Kuza obundi . . . Tindikumanya yaaba ekyo murikubaasa kukireeba nari ngaaha, aha rubaaho. Obundi ku naakukihindura nka batyo omu kaanya kakye, ababw'enki, nitwija kubaasa, hati, bamwe omuriimwe, ku . . . [Ow'eishe-emwe Edgar "Doc" Branham yaagira ati, "Nooyenda ngu hamurikwe?" -Omur.] Waagamba ki? ["Nooyenda ngu hamurikwe?"] Ngaaha, tikirkwetaagisa, hati hati, Doc. Obundi handi hakye. ["Ahansi aha honyini, nimbaasa kumurikaho."] Mbwenu, ekyo nitwija-nitwija kukikora ku turaatungye bikye . . . Mwine ekimurikiso hanu? Ni kirungi. Ka tukiteho. Ab'enyima okwo nimubaasa kureeba? Nimubaasa? Ku muraabe nimubaasa kureeba, mwimutsysye emikono yaanyu, ku muraabe nimubaasa kureeba orubaaho orwo, mukashoma ebyo ebiraho. Ngaaha. Ni kirungi. Reeta ekimurikiso.

10 Hati, baaba nibatebeekanisa ahabwa . . .

Naatandika nkyerereirwe akasheeshe aka; nari, ngaaha, ngaaha, nk'edakiika ikumi na itaano kareho. N'ahabw'ekyo, kyaba kiri kityo, nitwija kwetwara hati, ahakuba titurikwenda kurahukiriza. Waarahukiriza, nooshiisha ebi obaire noozza kugamaba. Hati, mbaire nimpurikiza orutambi rw'amaraka, ekiro kiri, nk'oku mbagambiire, kandi nyitsirwe enshoni munonga; atari ababw'ebi mbaire ningamba, kureka omuringo ogu mbaire nimbigambamu jubajuba, eiraka ry'omuntu otiinire. Nimpurira niinyenda kurindirira. Niki . . .

11 Ekiro kiri nka-nkareeba ahu baabaire nibaza kwombeka eirorero rihango ry'enyamaishwa, hanu rwagati ya Louisville. Kandi Omw. Brown, niinyikiriza ngu niwe, okwo, akaha eirorero ry'enyamaishwa miriyoni emwe ya doola. Mbwenu, kuri naabaire nziine, haihi nkaazibahaire kugira ngu enyamaishwa bazirekure. Ti-tindikwikiririza omu kuzitirira ekintu kyona batyo. Nza . . . nzaga omu irorero ry'enyamaishwa kandi ndeeba enyamaishwa ezo enshoberwa, edubu, n'entare, n'ezindi, nizigyendagyenda, zikomirwe ebiro by'amagara gaazo goona, mwareeba. Nikukukora kubi. Kandi nabwo, nizikwatwa n'obwengye bw'omuntu orikwetegyereza kuzikira. Mwareeba? Kandi nibazikwata reero bazita omu bukwatwa.

Kandi nintekateeka ahari Sitaane okora ekyo. Akwata abantu ba Ruhanga b'omuhendo abashemereire kugyendagyenda omu myanya ya Ruhanga mikuru, n'omu buheereza bw'aheeru, kandi-kandi n'ebintu nk'ebyo, reero amuta omu nju y'enkomodo y'ekigombe ky'ediini nanka, nari enyikiriza y'ediini, nari ekindi kintu, kandi amukomeramu. Kandi ka n'ekintu kibi munonga!

Kandi tindikukunda marorero g'enyamaishwa. Kwonka niinyehuriram u ekintu nk'emwe omuri ezo nyamaishwa, ku orikuba ozitiriirwe kimwe kandi orikugyezaho kurekurwa, noomanya, ku-kushohora kugira eki waakora.

12 Hati, tutakagiire omu Kigambo, ka twirire haihi Omuhandiiki w'Ekgambo, obwo nitwinika emitwe yaitu hati omu kushaba.

Tataitwe ow'omu Iguru omunyambabazi, twateeranira hamwe akasheeshe aka omurundi ogundi omu Iziina rya Mukama Yesu, Omwana Waawe omukundwa. Ruhanga, ohindukire omuntu, akaija omu nsi, kuba ekarabo ababw'ebibi byaitu, kandi yaafa, Ohikiriire; ngu itwe, ababw'okuhikiirira Kwe, itwe ababw'okutahikiirira tubone kuba abahikiriire Omuriwe. Nitwija nitwatura ngu titushemereire, Mukama. Tiharimu kintu kirungi omuriitwe. Kandi twena turi omu nju emwe mpango y'enkomodo. N'obu twakuba twemereire omu nshonda ki twena tukiri omu nkomo. Omwe tarikubaasa kuyamba ondijo. Kwonka, Ruhanga, omu mbabazi Ze ezitaine bugarukiro, Akashuuma ahansi kandi yaigura enyigi z'enkomodo, ngu turekurwe. Hati titukizitiriirwe. Tituri omu irorero ry'ensi ry'enyamaishwa, kwonka hati turekwirwe. Turi aheeru.

13 Oo, ka Nitumukunda kandi Tukamuramya! Ka nitubaasa kuraba omu misiri mikuru y'okuragaanisa Kwe, kandi tukagireeba eyorekirwe omu maisho gaitu! Kandi n'amaisho gaitu, tukareeba Ruhanga omukuru ow'omu Butahwaho Naayeshuuruura omu maisho gaitu, naayeyorekyera kimwe We wenka, nk'oku Yaakozire ahari baanabi aba ira. Nitumanya eki, ngu baahuumwire baine obuhame, ngu ekiro kimwe nitwija kugarurwa busya omurundi ogundi, amagara aga ku gariba gaahweire, n'okuzooka, kutaaha omu Magara Agatahwaho agatarigira bugarukiro. Emibiri yaitu terikura. Kandi tituri fa. Kandi titurigira njara na kakye. Kandi titurikyena kintu kyona. Kureka turyagyenda Nawe. Nitwenda Kumuhurira naagira ati, "Taaha omu mashemererwa ga Mukama, agaakuteekateekyeirwe okuruga aha kuhangwa kw'ensi." Enyima ekibi kitakataahiremu, oku Yaabaire atebeekaniise, nk'ahabwa Adamu na Haawa, ngu batarirwara nari kugira omurabanamu. Kandi hati Akakituteekateekyeira, kandi Yaakimanya ira tutakabaireho ngu nituza kubaho. Ekibi kikareetaho okukingira kw'amaani, mbwenu hati ekibi kiihirweho, ababw'Eshagama ya Yesu. Hati, tuhamize kuza omu Nsi eyaaraganisiibwe, ababw'okuragaanisa kwa Ruhanga, egyo Etahwaho.

14 Tuhe omugisha hati, Taata, twaba nitwega Ekigambo Kyawe. Nitwenda kumanya nituteekwa kuba abantu ba muringo ki, kugira ngu tubaase Kubayo. Tuhwere ekiro eki omu ishomero eri, kugira ngu tubaase kutunga Omushomesa Omwegyesa omukuru abe naitwe, Omwoyo Orikwera, ngu abaase kushuuma kandi Atweshuururire, kurabira omu Kigambo Kye. Nitukishaba omu Iziina Rye n'ahabw'ekitiinisa Kye. Amiina.

15 Hati, okubanza, nkaayenzire ngu mubiikuure naanye omuri Petero ya kabiri, eshuura ya 1. Niinyenda kushoma ekicweka ky'Ekyahandiikirwe eki, Petero ya Kabiri, eshuura ya 1. Kandi hati ahariimwe abaine ekaraamu zaanyu hamwe n'empapura . . .

Kandi niinyikiriza bangambiire akasheeshe aka ngu-ngu obwire bumwe, okuhindura omutwe gwangye kugwiha aho, nikukyendeeza eiraka ry'orutambi orurikukwata amaraka. Buzima ekyo tingyendereire kukikora. Kandi niinyikiriza, obumwe n'obumwe, ku twakuteekateeka aha kutunga omu-omuzindaaro, kandi tukaguhaniaka aha tandaruha aha. Ahu waakuba ori hoona, obwo nikiba kitaine nshonga. Kikaaba kirungi munonga, hoona hoona, omuzindaaro guri aha tandaruha.

16 Kandi hati, obwo ndiyo ningamba; kandi ku muraabe, aha nyima ya saaviisi, nari mwaba nimwenda, nimubaasa kuteera ekishushani eki hanu. Reero obwo naanye bakinteerere hanu. Ninja kukwata akasumaari nkibambe omu maisho hanu, ku muraabe nimukunda kukikora obunaku obundi. Mwije kareho eihangwe eri, kugira ngu tubaase kwetegyereza.

17 Hati nitwiririra Obumanyiso Mushanju. Twaherize Obusingye Mushanju bw'Ekanisa. Kandi obu n'Obutumwa bw'okwegyesa, oburikutaahiza kimwe omuntu omunda, orikuza kucungurwa ahabw'Eshagama ya Mukama waitu Yesu, kandi naaza kuba omu busingye bw'Ekanisa obwo, Obusingye bw'Ekanisa obwo Obutahwaho aha muheru gw'Obumanyiso. Hati nitumanya ngu twine Enzamba Mushanju, Ebibonaboneso Mushanju, Enyabya, n'ebindi, ebituraataahemu, twaba nitugumizamu. Kwonka tutegyereize kutunga omwanya ogushanjuukire kugira ngu abantu babaase kushutama, hati.

Kandi nteekateekire ngu eki kibaire nikiza kukwatana omu ki mbaire nyineho amatsiko. Mbaire ntaine amatsiko g'okuteera ekishushani eki, kwonka ekiro kiri mbaire ndi na bamwe ahari banywani bangye, Coxes, eifo omuri Kentucky. Nkazayo, naateekateeka ngu obundi ntungye ekiro kimwe ekindi ky'okuhiiga kaamugye siizooni etakahweire. Kandi nkaba ndi eruguru omu ihamba na munywani wangye, Charlie, ayemerereire aho, na Rodney, mwene ishe. Tindareebire na kaamugye. Nintekateeka ngu nkabukanga bwona bwagyenda, ku naatandikire kuteera orwari eruguru kuri omu ihamba. Eki nikyo ekyanyizireho, boojo 'mwe, kandi-kandi Ow'eishe-emwekazi Nellie na Margie, kandi ku naabagambiire ngu ninja kubagambira Sande ku ndakihikyeho. Ekyo nikyo ekyanyiziire, aha butumwa obu naabaire ninja kugambaho. Kandi nk'oku n'ebindi ebitsigaire byabaire biine akakwate nabwo! Kandi, oo, ninkunda ekyo. Nkatunga omwoyo gw'a-gw'amaani-gw'amaani gw'okuteera akaari, eruguru okwo omu ihamba.

18 N'ahabw'ekyo hati, reka tushome hati, Ebaruha y'Okubanza ya Petero, nari . . . Petero ya Kabiri, nimanyisa, eshuura ya 1, ekicweka Kyayo.

Nyowe Simooni Petero, omuhuuku kandi entumwa ya Yesu Kristo, naabahandiikira imwe, abaahairwe okwikiriza kw'obuguzi bwingi nk'okwaitu, omu kuhikiirira kwa Ruhanga waitu kandi omujuni waitu, Yesu Kristo;

Ninkunda omuringo ogu kyagambwamu aho, ahabw'okuba eishomo ryangye ryona akasheeshe aka ryombekirwe aha kwikiriza. Mwareeba? Ka nshome ekyo omurundi ogundi. Muhurikize kurungi.

Nyowe Simoni Petero, omuhuuku kandi entumwa ya Yesu Kristo, naabahandikiira imwe, abaahairwe okwikiriza kw'obuguzi bwingi nk'okwaitu, . . . omu kuhikiirira kwa Ruhanga waitu . . . kandi omujuni waitu, Yesu Kristo;

Mwetegyereze, Naagamba, ngu, "Ntungire okwikiriza oku, kandi ebi nimbigambira abo abaahairwe okwikiriza kw'obuguzi bwingi nk'okwaitu." Niinyenda ngu . . . Ti by'ensi ey'ab'aheeru. Ebi n'eb'y'Ekanisa, mwareeba, abo abari omuri Kristo.

Embabazi n'obusingye byongyerwe omuriimwe omu kumanya Ruhanga (n'okurabira omuri) Yesu (Kristo) Mukama waitu.

Ahakuba tureebire ngu amaani g'obwaruhanga bwe gakatuha ebintu byona . . . amaani g'obwaruhanga bwe hati gakatuha ebintu byona ebishemereire amagara . . . n'okutiina Ruhanga ahabw'okumanya Ogwo owaatweteire ekitiinisa kye n'oburungi bwe,

Ebyamureeteire kuturaganisa eby'obuguzi bwingi kandi ebikuru munonga, ngu ahabw'ebyo (okuraganisa oku) mubone kukwatanisa na Ruhanga omu buteeka bwe . . .

19 Hati reka ekyo kitaahiremu kimwe omu nda hati. Tindikubuurira akasheeshe aka; nitwegyesa ishomo eri. "Obuteeka bwa Ruhanga." Ka nshome omushororongo gwa 4 omurundi ogundi hati, kugira ngu kitabarabaho. "Ebyamureetaire kuturaganisa . . ."

Ebyamureeteire kuturaganisa eby'obuguzi bwingi kandi ebikuru munonga, ngu ahabw'ebyo (okuraganisa oku) (ku mwaherize kuruga) omu kujunda okw'omu nsi okurikureetwa okwetenga okubi, mubone kukwatanisa na Ruhanga omu buteeka bwe.

Mwareeba, "Ensi," tugirugiremu egoy hati. Ebi naabigambira Ekanisa. Egyo niyo nshonga turi hanu akasheesh aka, n'okusheruura ni muhanda ki, Ruhanga eki arikwetenga. Tihariho omuntu omunda hanu, orikukunda Ruhanga, kureka ogwo orikwenda ku, orikwenda kushushanira kimwe nka Kristo. Hati kyagambwa aha kurungi. Omukristaya weena! Ndi omuntu mukuru oine obumanyi. Mureebe Ow'eishe-emwe n'ow'eishe-emwekazi Kidd aha, obundi nibo abarikukirayo obukuru omu kyombeko. Kwonka ku naakubabuuza nti,

“Ekyetengo ky'emitima yaanyu niki?” Kikaaba kiri ngu, “Kwirira haihi munonga na Ruhanga.” Ku orikwega ebya Kristo, hariho embeera emwetooroire erimu rukundo nyingi, noogyezaho Kumutaahiramu kimwe.

20 Munsaasire ababw'eki naaza kugamba. Nkagambira omukyara wangye, hanu enshumi nkye ehweire, uwe . . . twembi nitukura, kandi naamugira nti, naagira nti, “Nonkunda nk'oku waabaire onkunda?”

Yangarukamu ati, “Buzima ninkukunda.”

Kandi naagira nti, “Noomanya, ninkukunda oburengye okuhitsya obu naakwenzire kukukwata kandi nkakutaasya omuriinye, kugira ngu tubaase kuba, buzima, kuba omwe, n'okukiraho.”

Hati, ekkyo, kibazemu emirundi miriyoni igana, kandi obwo noi ja kumanya oku omwikiriza, okundaine na Kristo, arikwenda ngu Amutaahemu, ababw'okuba ni rukundo. Kandi hanu Naaza kutworeka oku, okurabira omu kuragaanisa oku, tubone kukwatanisa na Ruhanga omu buteeka bwe. Ebi, emibiri efa, oku turikubaasa kuba abarikukwatanisa.

21 Nimbaasa kugira eki naagamba hanu. Enshonga erikutuma naikiriza . . . Hati omuntu omwe anyetegyereize kubi buzima, hanu obwire bukye obuhingwire. Nkatunga ebaruha erikuruga omu kibiina ky'abaheereza, erikugamba ngu niinyikiriza ngu hakaba hariho . . . “Emitwarize erikukoragana niyo yaatuteeraine. Kandi ngu tushemereire kutaana na bagyenzi baitu emitwarize yaitu ku eraabe etarikukoragana, tushwere nari tushwerwe ondijo ou emitwarize yaitu erikukoragana.” Oo, mugyenzi!

Naagira nti, “Tiinyine rubanja rw'enyegyesa erikuhabya nk'egyo.” Ekkyo ntuura ninkihakanisa. Ti-tindikwikiririza omuri ekkyo. Buzima tindikukiikirizamu. Niinyikiriza ngu Ruhanga atuha omuhwezi omu bushwere. Ago n'amazima. Reero bwanyima omwe aba ekicweka kya mugyenzi we. Ekkyo kihikire. Kandi omushaija atakashweire, ashemereire kuteekateeka aha bintu ebi, abyegyeho.

22 Omutsigazi akambuuza ekiro kiri, yaagira ati, “Nooteekateeka ngu nimbaasa, nshemereire kushwera, omuhara nanka na nanka Ow'eishe-emwe Branham?”

Naagira nti, “Noomukunda okwingana ki?”

Yaagira ati, “Oo, mugyenzi, nimukunda kwonka.”

Naagira nti, “Mbwenu, ku oraabe otarikubaasa kubaho otamwine, reero kikaabaire kirungi omushwere. Kwonka ku oraabe orikubaasa kubaho otamwine, otamushwera. N'ahabw'ekkyo, kwonka ku kiraabe nikiza kukwita, ekirungi-ekirungi ogumizemu omushwere,” naagira ntyo. N'ahabw'ekkyo eki naabaire ningyezaho kumumanyisa, eki, ngu, ku oraabe noomukunda munonga.

Hati, hati hati, otakashweire nari otakashweirwe, buri kintu nikiba kiri gye kandi kiboneire. Kwonka waaheza kushwera nari kushwerwa okubonabona n'okugyezibwa kw'amagara bitaahamu. Obwo nibwo mushemereire kuba niimukundanira kimwe kugira ngu omwe ayetegyereze mugyenzi we. Eki waabaire noomuteekateekamu kyabura, nawe eki yaabaire naakuteekateekamu kyabura, nimuguma nimwetegyerezana.

23 Okwo nikwo kiri hamwe na Kristo. Mwareeba? Nituteekwa Kumukundira kimwe, okuhitsya obu turaashabe ekintu, Atakituhe, ekkyo kitatutengye na kakye. Mwareeba? Mwareeba? Ahabw'enki? Kandi omuringo gwonka ogw'okukoreramu ekkyo, n'okukwatanisa na Ruhanga omu buteeka Bwe, obwo nimwija kwetegyereza ababw'enki Atarikukibaha. “Kukwatanisa na Ruhanga omu buteeka Bwe.”

Kandi mureebe hanu, “Ngu ababw'ekkyo ku mwaherize kuruga omu kujunda okw'omu nsi okurikureetwa okwetenga okubi.” Mukakurugamu! Nimureeba abu kirikugambirwa? Nikigambirwa Ekanisa, abo abari omuri Kristo, abaatungwirwe abari ahaiguru y'ebintu ebi. T'ogwo oyetungwire, kureka ni Kristo omutungwire.

24 Aha b'eishe-emwe n'ab'eishe-emwekazi abakyotera abari aha akasheeshe aka, tingyendereire kugira ou naashaasha. Kureka, nkaba ndi omu ruteerane obwire obwahingwireho, tindikumanya ku ndaabe naakigambireho omuri tabirinaakuru. Nkigambireho omu myanya mingi. Hakaba hariho ow'eishe-emwekazi omukyotera owaagizire ati, “Nimbaasa kuha obujurizi nari njurire?”

“Buzima, ow'eishe-emwekazi, gumirizamu kimwe.”

Yaagira ati, “Niinyenda kuha obujurizi obu kuha Ruhanga ekitiinisa.” Yaagira ati, “Nimumanya, ti-tindi nk'oku nshemereire kuba ndi,” kandi yaagira ati, “ti-tindi nk'oku nshemereire kuba ndi, kwonka,” yaagira ati, “ekintu kimwe buzima, tindi nk'oku naabaire ndi.”

25 Mwareeba? Akaba aine ahu arugire. Akaba aihirweyo.

Okwo nikwo turikumanya ngu tuherize kuruga omu kufa twataaha omu Magara. Nituranzya enyima omu kiina omu twatimbirwe. Mwareeba? Tituri nk'oku turikwenda ngu tube; nangwa tituri nk'oku tushemereire kuba; kwonka ekintu kimwe eki turikwesiimira, tituri nk'oku twabaire turi. Ekkyo kihikire. Turi omu muhanda.

“Kandi tuherize kuruga omu kujunda kw'ensi.” Bwanyima y'okuruga omuri ebyo, okwetenga okubi n'okujunda

okw'ensi, muri ahaiguru y'ebyo.

26 Hati n'omuntu w'omuringo ogwo-hati n'omuntu w'omuringo ogwo ou arikugambira, omuntu oherize kuruga omu bintu ebi, mwareeba, okujunda kw'ensi.

N'ahabw'ekyo mugire obweziriki bwingi; aha kwikiriza kwanyu mwongyereho (amaani); aha (maani) gaanyu mwongyereho okwetegyereza;

Aha kwetegyereza mwongyereho okwerinda; . . . aha kwerinda mwongyereho okugumisiriza; . . . aha kugumisiriza mwongyereho okutiina Ruhanga;

Aha kutiina Ruhanga mwongyereho okukunda ab'eishe-emwe; kandi aha kukunda ab'eishe-emwe mwongyereho (rukundo.)

27 Hati hanu yaatuha omu bugufu ebi tushemereire kukora, kumanya oku turaabikore. Hati, nk'oku ngambire, twena nitugyezaho kwirira haihi munonga na Ruhanga. Niyo nshonga etumire naatorana Obutumwa obu akasheeshe aka, bw'ekanisa, ndikumanya ngu abantu baine engyendo. Ahakuba ekiro ekihweire, naagambire nti, "Ni bangahi abari hanu, abarikuruga aheeru y'etauni?" Nk'ebicweka makumi mwenda na munana ahari igana by'abantu, nibaruga aheeru y'etauni. "Ni bangahi abari hanu abarikurunga omuri mahiro igana?" Ahabw'enki, barengire, ninteebereza, ebicweka makumi munaana ahari igana. "Ni bangahi abari hanu abarikuruga aharengire mahiro magana ataano?" Kandi haihi-kimwe kya kashatu ky'abantu ababaire bari hanu babaire nibaruga aharengire mahiro igana, magana ataano okuruga aha. Kiteekateekyeho, orugyendo oru abantu barikugyenda. Mpaho, abantu abo tibaija omu Kanisa nka batyo kureebwa kwonka. Tihariho . . . tihaine oburungi obu abantu abaheeru barikubaasa kureeba omu mwanya ogu. Boona n'abantu ab'obutoosha, abooro, bajweire ebya burijo. Tihariho ebyeshongoro by'amaani okuruga omuri kwaya erikwehindura eya Baamaraiika, enanga, n'amadirisa g'endeberwamu agasiigire erangi. Nootegana kutunga omwanya aha foomu n'okwegamira ekisiika. Tibarikureetwa ebantu by'omuringo nk'ogwo. Kureka nibaija ahabw'okuba omunda yaabo harimu ekintu ekirikureeba oburungi obu eriisho ry'obuntu ritarikureeba. Eriisho ry'omwoyo niryo ririkubaasa kureeba oburungi bwa Kristo. Nikyo kirikutuma baija.

28 N'ahabw'ekyo, obutoosha mara ebiro ninshaba, tutakatandikire saaviisi. Nza omu kibira, ntware omu nshaho yangye . . . Ngambira omukyara nti, "Ninza kuhiga kaamugye akasheeshe aka." Reero nta ekaraamu n'ekicweka ky'orupapura omu nshaho yangye. Ahonaaho ku harikubaho omushana ogurikugasha kureeba, nimba nshutami nyegamiire ekiti ahantu, nyimukize emikono yangye omu mwanya ahaiguru, kandi ndikugamba nti, "Mukama, nimbaasa kukora ki ekiro eki? Nooza kumpa ki eky'okuha abaana Baawe?"

Reero naahika aha kintu nanka ekirikureebeka nk'ekirikwotsya, haija ekintu nka bat. Okubaho Kwe ku kwirira haihi, ntandika kuhurira ekintu nk'okwo hare, ekintu ekiri omu buryo obu. "Ibiri waabazamu ibiri ni ina." Juba juba, "Ibiri waabazamu ibiri ni ina. Ibiri waabazamu ibiri ni ina. Ibiri waabazamu ibiri ni ina." [Buri murundi Ow'eishe-emwe Branham naagamba arikweyongyera kurahutsyaho. -Omur.] kugumizamu, kugumizamu, kugumizamu, nka batyo. N'okubaho Kwe okurikuba nikutaahamu.

29 Nooyeheerayo kimwe, kandi bwanyima y'akaanya kakye nootaana n'omubiri. Aho okworekwa kwija, "Gyenda omu mwanya nanka na nanka, kandi ekintu nanka na nanka." Mwareeba? Nikitandikira, omu kuteekateeka ahari Ruhanga, omu biteekateeko byawo otakiri omu nsi, hare munonga n'ensi, aheeru omu ihamba, ori wenka.

Kandi nikutandika kwija, "Emwe, emwe . . ." Katugire, enamba yoona, nari ekintu kyona, ekintu kitandika mporampora, kitaahamu kitarikuhurikika gye. Reero kiija jubajuba, jubajuba. Nooshutama aho kandi oimutsya ahaiguru emikono yaawe, otaagamba ekigambo, iwe emikono yaawe ogimutsye omu mwanya. Ekintu ky'okubanza noomanya, weena nootwarwa. Bwanyima oreeba ebantu ebi Arikwenda ngu omanye, naakworeka ebantu ebirikwija kubaho.

Obumwe n'obumwe nikija kihika ahantu, okuhitsya ahantu nanka, reero kyemerera. Tikirikuhinduka okworekwa. Reero Ebyahandiikirwe byeshuka kimwe kikurata ekindi. [Ow'eishe-emwe Branham yaateera enkomyo emirundi eshatu -Omur.] Njakura ekaraamu yangye, kugira ngu ntakyebwa, reero nkihandiika, nkihandiika.

Kandi nyija omuka reero nkisherura, kandi nkyega. Kandi obumwe n'obumwe kitangirira amakuru naaba ninkishwijuma. Reero, bwanyima y'akaanya, nkiki hanu! Ekyo kiija n'amaani, kandi kigaruka Kigyenda. Reero nkwata akatabo kakye nk'aka, reero ntandika kuhandiika omu bugufu, jubajuba nk'oku ndikubaasa, eki Ari kungambira. Nteekateeka nti, "Mukama, ninza eifo omuri tabirinaakuru kandi mbagambire. Ni . . . 'Nshuumayo eifo.' Hariho eki mbainiire." Mpaho, nikwo kiija. Nikwo buzima. Eky'okubanza, okuhitsya obu, Araakimpe, tindikubaasa kukibaha.

N'ahabw'ekyo, reero, aha bihandiikirwe omu bugufu ebi ebimurikureeba nindeebaho ahansi aha. Kandi ebi, okubanza, nibyo mbandize. Tintungire ekicweka eki hanu okuhitsya nk'ekiro kimwe nari bibiri ebihingwire, eruguru omu kibira.

30 Hati, abantu aba ni-ni . . . Petero naagamba, hanu, nk'oku tushemereire kukwatanisa na Ruhanga omu

buteeka Bwe. Hati, buri omwe omuriitwe naagyezaho kukura kuza omu rugyero rwa Ruhanga.

Hati, bwanyima twaheza Obumanyiso Mushanju, reero, omu bwire obwo obu Akamanyiso ka mushanju karaagambe, nari okubambuura . . . Buzima nitumanya eki akamanyiso kari, n'okushuuura obuheereza, okubambuura Obumanyiso Mushanju. Kandi ekyo nituza kukireeba aha kipande. N'okushuuura Obutumwa, ekintu ekikomirwe n'akamanyiso.

31 Sande ehweire ekiro, nkabuurira aha, "Kishumuruzo." Kandi ekishumuruzo n'okwikiriza, okwikiriza kukwata ekishumuruzo, kandi ekishumuruzo n'Ebyahandiikirwe. Kandi Kristo niwe Rwig. Mwareeba? N'ahabw'ekyo okwikiriza kukwata epata nkye z'Ebyahandiikirwe kandi kwigura ekitiinisa n'oburungi bwa Ruhanga, Kubija abantu Be. Mwareeba? N'ahabw'ekyo, ni, okwikiriza kukwata ekishumuruzo ekiigura Kristo aha bantu; kikiigura, kikishuuura.

N'ahabw'ekyo, eriizooba, nituza kugyezaho kukwata ekishumuruzo ekyo nikyo kimwe, twigure omuhanda gw'okuba Omukristaaayo w'emicwe mirungi omu rugyero rwa Ruhanga, eki, kandi okuba Orusiisira rwa Ruhanga ohuriire rw'okutuuruamu.

Mwijukye, Ruhanga Ayeshuuura omu miringo eshatu. Omurundi gw'okubanza, Akeeshuuurrira omu Nyomyo y'Omuriro, eyaabaire neeyetwa Isheboona. Reero Ruhanga ogwo niwe omwe, akeeyorekyera omuri Yesu Kristo, omubiri ogu yaayombekire, akakora omubiri ogu. Ekyo kashatu, okuraba omu kufa kw'ogwo mubiri, Akashemeza Ekanisa kugira ngu Abaase kutuuruamu. Akaba ari Ruhanga ahaiguru yaitu; Ruhanga ori naitwe; Ruhanga omuriitwe; Ruhanga niwe omwe.

Niyo nshonga eyaatumire kyayetwa Isheboona, Omwana, Omwoyo Orikwera. Atari Baaruhanga bashatu; za ofisi ishatu za Ruhanga omwe. Kuri baateekateekire ahari ekyo omu Rukiiko rwa Niika, twena titwakubaire turi omu muzambaro, tikwo? Ekyo kihikire. Ti baaruhanga bashatu.

32 Abantu bakaba batarikubaasa kwetegyereza oku Yesu yaabaire agamba na Ishe, kandi We na Ishe baba Omwe. Mpaho, nkikyo aho kyona. Buzima, nikikishuuura. Buzima kwo. Mwareeba? Ti Baaruhanga bashatu. Za ofisi ishatu! Ishatu- . . .

Niki? Ruhanga okwendarura ahansi y'ekitiinisa Kye omu bihangirwe Bye. Ruhanga naayenda kuramibwa. Ekigambo Ruhanga nikimanyisa "ekintu ekirikuramibwa." Kandi ni Ruhanga orikugyezaho kuta abantu be omu mbeera, kugira ngu Abaase kubatungamu eki Yaabahangiire. Tarakuhangire ngu obe ekindi kintu kureka okuba mutabani na muhara wa Ruhanga. Ku oraabe ofeereirwe ekyo, kuba mutabani na muhara wa Ruhanga, waahusha ekimaasho.

Kandi "okuhusha," ekigambo e-k-i-b-i nikimanyisa "okuhusha ekimaasho," okuremwa ekimaasho. Reero, ku ndikuba nindasha ekimaasho, nindasha eisasi omu yaadi makumi ataano, kandi nkarasha; nkagarura ahansi embundu yangye reero nkarasha, kandi nkakihusha, za inci ina nari itaano, nihaba habaireho ki? Embundu yangye neeba neeyetenga kutereezibwa. Hariho ekintu ekishobire. Kandi ku ndaaremwe kugira okwikiriza omuri Ruhanga, ku ndaaremwe kuba Omukristaaayo . . . Ruhanga akakuta hanu kuba Omukristaaayo. Ku oraabe ohabiire orubaju rumwe, garuka reero otereezeibwe. Kandi hariho ekintu kimwe kyonka ekirikubaasa kukturereza, ekyo n'Ekyahandiikirwe. Omwoyo Orikwera omu Kyahandiikirwe, naakutereeza, akureetera kimwe omu kimaasho omurundi ogundi. Ekyo kihikire.

33 Hati twaza kwega Ekigambo Kye. Stefano akagamba ngu, omu Byakozirwe 7. Kandi n'omuri . . . Ekyo ka tukishome, arikugamba ahari, hati, nitugamba aha Ihema rya Ruhanga. Hati, Stefano akagamba. Ahabw'okuba . . . Niriza kuba Eihema erihuriire rya Ruhanga ohuriire. Stefano akagamba, omu Byakozirwe eshuura ya 7. Kandi niinyikiriza ngu nitu . . . Omu Byakozirwe 7, okutandikira nk'aha mushororongo gwa 44.

Baatatenkuriitwe bakaba baine eihema ry'ebirikuhamya omu ihamba, nk'Owaagambire Musa oku yaamuragiire kurikora naarishushanisa n'ekishushani eki yaareebire.

Eihema eryo niryo baatatenkuriitwe baahairwe baishebo, baatatenkuriitwe abaataahiremu ahanyima y'okutaahamu . . . bakaritaasya omu nsi egi, obu baija na Joshua, bakakubuura ensi y'abanyamahanga abu Ruhanga yaabingire omu maisho gaabo okuhitsya aha busingre bwa Daudi.

Daudi ogwo, ku yaatungire obuganzi omu maisho ga Ruhanga, yaashaba kwikirizibwa kusherurira Ruhanga wa Yakobo ah'okutuura.

Kwonka Sulemaani niwe yaamwombekyeire enju.

Haza Rukira-boona atatuura mu maju agombekirwe emikono, nk'oku nabi yaagizire ati:

Eiguru nikyo kitebe kyangye ky'obukama, n'ensi n'akatebe k'ebigyere byangye. Ni nju ki ei muriinyombekyera? Nikwo Mukama arikubuuza. Nari shi ni mwanya ki ogu ndihuuumuriramu?

34 Hati omu . . . Hati, "eihema," ni, buzima, omwanya ogu turikuzamu kuhuumura, hati, kuruhuukwa, n'ebindi, nk'okuhuumura okuruga omu turo, nari shi n'ebindi. Hati, Abaheburaayo 10, n'omushororongo gwa 5, Paulo

naakireetamu.

N'ah'abw'ekyo Kristo, ku yaabaire naija omu nsi, yaagira ati: ebitambo . . . (Ogwo ni Kristo) . . . ebitambo n'empongano toraabikunzire, kureka okanteekateekyera omubiri;

Eihema niki hati? Omubiri, Ruhanga arikutuura omu ihema ry'Omubiri.

Ruhanga rimwe, ahaiguru munonga, obu Yaashuumma aha rushozi, n'obu yaakuba e-enimi nari ente yaahika aha rushozi, neeteekwa kwitwa. Ruhanga n'orikwera.

Nyomwabazyo, obu Baamaraika abo baashweka ahamaisho Gaabo. Baaserafi abarikwera n'ahamaisho aharikwera, batarikumanya nangwa n'eki ekibi kiri, kwonka Nibateekwa kushweka aha maisho Gaabo, omu Kubaho kwa Ruhanga; bashwekye amaguru Gaabo omu bucureezi.

Hati, Ruhanga orikwera akaba atarikubaasa kushemba ekibi, n'ahabw'ekyo tihaine ekintu ekyabaire nikibaasa kuhika aha rushozi ahi Ruhanga yaabaire ari.

Reero Ruhanga yaahinduka omuntu kandi yaatuura naitwe, omu nshusha ya Yesu Kristo, Omwana We, ekihangirwe Kye. Reero Omwana ogwo yaahayo amagara Ge, kandi akatafaari k'Eshagama ya Ruhanga kaayatwa, kugira ngu Amagara gabaase kuruga omu Shagama, gaije ahariitwe.

Okurabira omuri egoy Shagama tushemeziibwe. Kandi hati eshagama yaitu, amagara gaitu, agaatungirwe ahawb'okubaho kw'okwetenga kw'okumanyana kw'omushaija n'omukazi omu by'omubonano kikareetaho amagara gaitu omu nsi. Eshagama ya Yesu Kristo neetushemeza, neehindura obuhangwa bwaitu, ahawb'okwohereza Omwoyo Orikwera ahariitwe; tukataaha omu kukwatanisa na Ruhanga omu buteeka Bwe, bwanyima tuhinduka omwanya gw'obutaaho bwa Ruhanga.

35 Yesu akagira ati, "Aha kiro ekyo muryamanya ku Ndi omuri Tata, kandi na Tata ku ari Omuriinye; Naanye ku ndi omuriimwe kandi naimwe ku muri Omuriinye." Mwareeba?

Nitumanya ngu Ruhanga ari omu Kanisa Ye. Ekanisa hati eshemereire kuba neetwara omwanya gwa Kristo, neegumizamu obuheereza Bwe. "Orikuunyikiriza, emirimo Ei nkora nawe aryagikora. Hatsigaire omwanya mukye, ensi Okutandeeba bundi; kwonka imwe Muryandeeba; ahakuba Ndyaba ndi hamwe naimwe, kandi Ndi omuriimwe, okuhitsya obu ensi egi erihwaho." Mwareeba? Nkikyo aho, okugumizamu n'omurimo Gwe.

36 Hati, Ruhanga, nari Baiburi ekyo hanu, ekakigamba. Stefano akagamba ahari Sulemaani naayombeka Hekalu, "Rukira-boona tattura mu maju agombekirwe emikono. 'Eiguru nikyo kitebe Kyangye ky'obukama, n'ensi n'akatebe k'ebigyer Byangye. Nari shi ni mwanya ki ogu Ndihiuumuriram?' 'Kureka Omubiri nigwo Wanteeekateekyeire.'" Amiina. Nkikyo.

"Omubiri nigwo wanteeekateekyeire." Ruhanga attura omu mubiri gw'omuntu, Naayeyorekyera omu Muntu ogwo. Okuramya okuhikire! Ruhanga omuriitwe, turi Eihema Rye, Ruhanga arikweyoreka. Oo, ka nitubaasa kuguma ahari ekyo okuhitsya obu mwakubaasa kuburwa obwikizo hanu, ahawb'obutagatsi.

37 Mwetegyereze, ngu, Ruhanga obwire bwona, attura, Naayeyorekyera omu muntu.

Ogwo akaba ari Ruhanga omuri Musa. Mumureebe, akazaarwa ari omwebembezi; Kristo. Omu bwire obu yaazaariiwemu aha hakaba hariho okuhiigwa kw'abaana, nibagyezaho kumusherura; na Kristo nikyo kimwe. Kandi aka-akacungurwa omu bwire obwo; nikwo kyabaire ahari Kristo. Akaba ari omuhi w'ebiragi; na Kristo nikwo yaabaire ari. Musa akaza eruguru, ebiro makumi ana, kandi yaatunga ebiragi, kandi yaashuumma ifo. Kristo akaza omu ihamba, ebiro makumi ana, kandi yaagaruka, naagamba ngu, "Mukahurira ku kyaragiirwe aba ira ngu 'Otarishambana.' kwonka nyowe, Nimbagambira nti, orikureeba omukazi akamwetenga, biri aherize kumushambanaho omu mutima gwe." Mwareeba? Ebintu ebi byona ebitarikushushana, ngu, Ruhanga Naayeyoreka We wenka.

38 Mureebe Yosefu, akaazaarwa ari omwojo w'omwoyo omuri-omuri bene ishe baingi. Bakaba bari abashaija barungi, baatatenkuriitwe abo boona. Kwonka, Yosefu ku yaizire, akaba ari ow'omutaano. Akaba naabaasa kureeba okworekwa, ashoboorora ebirooto, kandi akangwa beene ishe ahawb'ekyo. Ahawb'omurimo gwonyini ogu Ruhanga yaamuteereire omu nsi kukora, beene-ishe bakakimwangira. Mwareeba? Kandi byona bikaba nibyorekyerera omusharaba. Kandi, reeba, beene-ishe bakamutunda haihi ebicweka makumi ashatu by'efeeza. Beene-ishe bakamunaga omu kiina, ngu afe. Akaihwa omu kiina ekyo, kandi yaagyenda reero yaashutama aha mukono gwa buryo gwa Faraho. Kandi tihariho muntu owaabaire aija ahari Faraho, owaabaire naategyeka ensi ey'obwire obwo, tihariho owaabaire naabaasa kwija ahari Faraho, kureka yaarabira omuri Yosefu wenka. Tihariho muntu orikubaasa kwija ahari Ruhanga kureka yaarabira omuri Kristo wenka. Kandi Yosefu ku yaabaire aruga omu kikaari, atakarugiremu, hakaba habaho enzamba eyaagamba, kandi abairuki bairuka omu maisho ge, bateera akaari batii, "Mutsimbe amaju! Yosefu naija!" Hoona ahi waabaire oba ori, nari eki waabaire oba nookora, n'obu omurimo gwawe gwabaire guba guri mukuru guta; okaba oteekwa kutsimba amaju okuhitsya obu Yosefu yaabaire ahika aho.

Kandi Enzamba ku erigamba, kimwe omu biro ebi, buri muntu aryatsimba amaju kandi na buri rurimi

ruryayatura. Kristo, Yosefu waitu, ku aritsigaho Ekitiinisa kandi akaija, omurimo gwave guryaba gutakiine mugasho obunaku obwo. Buri muntu aryatsimba amaju kandi baature ku n'Omwana wa Ruhanga. Ekyo kihikire.

39 Oo, ka Nitumureeba omuri Daudi! Oku Daudi, omugabe owaayangirwe, owaihirwe aha ngoma ye, beene-ishe, mutabani we wenyini, akashutama aha Kibungo kya Zeituuni, ku yaabaire naanyegyera, aha mutwe gw'Ekibungo kya Zeituuni, yaaranzya enyima Yerusalem kandi yaarira; ahakuba okwo abantu be bonyini, abu yaabaire aheereza kandi ayegyesa ebya Ruhanga, kandi abantu be bonyini Bamwanga baamunagira ebintu, bamucwera amacwante kandi bamushekyerera, ku yaatandikire kutemba ekibungo kandi yaayangwa. Oo, ka n'ekishushani kihikiire kimwe ky'Omwana wa Ruhanga, emyaka magana munaana eyaakuratsireho; Omugabe oyangirwe, omu bantu Be bonyini, akashutama aha kibungo kandi yaaririra Yeruseleemu, nk'Omugabe oyangirwe.

Kikaba kiri ki? Ruhanga Naayeyorekyera omuri baanabi abo, nibooreka Kristo.

Reero haija Owaabaire ari okuhikiirira kwa Ruhanga. Akaba ari Ruhanga otwire naitwe.

Kandi okwiha omu bwire obwo, Akeeyoreka We wenka omu Kanisa Ye, aha rubaju oru rwa Gologosa. N'ahabw'ekyo, nimureeba, twena nitugyezaho kuhika aha mwanya ogu ogw'obutaaho, Eihema rya Ruhanga ohurire.

40 Hati hariho abantu . . .

Nitwetegyereza hanu, Akagira ati, "Eky'okubanza tugire okwikiriza, amaani, okwetegyereza, okwerinda, okugumisiriza, oburungi nari okutiina Ruhanga, kandi na rukundo y'ab'eishe-emwe." Ni kirungi. Okukunda ab'eishe-emwe, reero mwongyereho rukundo. Ka nshome eki, kyona, omurundi ogundi, n'ahabw'ekyo muhamize kimwe ngu mwakyetegyereza hati. Hati twaza kutandikira aha mushororongo gwa 5.

N'ahabw'ekyo mugire obweziriki bwingi; aha kwikiriza kwanyu mwongyereho (amaani); aha (maani) gaanyu mwongyereho okwetegyereza;

aha kwetegyereza mwongyereho okwerinda; aha kwerinda mwongyereho okugumisiriza; aha kugumisiriza mwongyereho okutiina Ruhanga;

aha kutiina Ruhanga mwongyereho okukunda ab'eishe-emwe; ahakukunda ab'eishe-emwe mwongyereho okukunda, niyo rukundo.

. . . ebyo ku muraabe mubiine, byayeyongyera kuba bingi munonga, nibibazibira kuba abeeremwa nari abatari kwana byana omu by'okumanya Mukama waitu Yesu Kristo.

Hati, hariho bikye ebi Petero arikutugambira, omuringo gw'okuhikayo.

41 Hati niinyenda kugamba eki, ngu, hariho abantu bamwe abaine ekicweka ky'amaani aga, okwetegyereza, obwengye, okugumisiriza, n'ebindi, haza nangwa batarikwatura kuba Abakristaayo. Hati ni . . . nitwegyesa Sande sikuulu. Kandi ago n'amazima. Hariho abantu bamwe abaine ekicweka ky'ebi, abatarikwetyeta kuba Abakristaayo. Kwonka ekyo tikiri . . . Ekyo tikirkubaasa kukikora. Ni nk'enyonyi erikwigragura erikugyezaho kuta amooya ga nyamunyonyi omu mapapa gaayo, kwekora nyamunyonyi. Neeba neeyehemura. Kikaabaire kirungi eguma eri enyonyi erikwigragura. Mwareeba? Ku arikugyezaho kutuura ebintu ebi haza atari Mukristaayo, naaba atari omu mwanya gwe.

Ni nk'omuti gw'omusikamoori ogurikugyezaho kukora ebijuma bya apo. Tigurikubaasa kukikora, mwareeba, n'obu guraabe guri omuti. Kwonka tigurikubaasa kukora ebijuma bya apo.

Ni nk'enyumbu erikugyezaho kukora ebyoya by'entaama, erikugyezaho kuba entaama obwo-eri enyumbu. Nimureeba, terikubaasa kukora ebyoya by'entaama. Terikubaasa kukikora. Ebyoya n'ekiconco ky'entaama, kitari ky'enyumbu. Neebaasa kugyezaho kukora nk'entaama, kwonka nabwo ekiri enyumbu. Mwareeba? N'ah'abwekyo, neegamba eti, "Mbweni nimbaasa kurya nk'entaama. Nimbaasa kukora eki nk'entaama." Kandi n'obu waakukora ki, nooteekwa kuba entaama kugira ngu ogire ebyoya.

42 Kandi ka nyemerere aha ahabw'edakiika emwe. Entaama terikukora byoya. Eine ebyoya ahabw'okuba n'entaama. Abantu baangi nibagyezaho kugamba bat, "Mbweni, ninza kugyezaho kuba murungi. Ninja kugyezaho kukora eki." Otagira eki waakora. Ngaaha, torikubaasa kukikora. Entaama terikukikora, terikushabwa kukikora, terikwetengwa kukora ebyoya. Neegira ebyoya, kandi neekikora ahabw'okuba n'entaama.

Kandi waaba ori Omukristayo, nooyana ebyana by'Omwoyo. Torikubikora-torikubikora. Torikugyezaho kubikora. Noogyezaho . . . Otagyezaho kwekora eki otari. Nooba eki oshememereire kuba, reero nikiba nk'oku kishemereire kuba.

43 Murahuriireho abantu nibagira ngu, "Mbweni, nimbagambira. Ni . . . nyegaitsire aha Kanisa. Ni . . . buzima nshemereire kureka okubeiha oku"? Noogyezaho kugira eki waakora omurundi ogundi, hati. Torikubaasa kukikora, n'ahabw'ekyo tihariho kyetengo ky'okugyezaho kukikora, nk'oku-nk'oku-enyumbu etarikubaasa kwekora yo yonka ekagira ebyoya. Terikubaasa kukikora.

Nari, ekishamba kugyezaho kurya n'enkombe, ekishamba nikigyezaho-ekishamba nikigyezaho kuba enkombe. Noobaasa kuteekateeka akaca aheru okwo, kagire kati, "Noomanya, ndi enkombe," keetemu amooya makye, kagire kati, "Mwareeba, nindeebeka nk'e . . ." Mwareeba? Konna kakaareebekyera kimwe kubi. Ogwo no'n'omuntu orikwatura kuba ekintu eki atari. Mwareeba, torikubaasa kukikora.

Torikubaasa kugira oti, "Hati reeba, nshemereire kugira amaani, n'ahabw'ekyo ninza kugira amaani. Nshemereire kutuura amagara agarikutiina Ruhanga, n'ahabw'ekyo ninza kugagira." Ahabw'enki, noogyezaho kwetamu amooya kwonka. N'obu oraabe noobaasa kugatunga, kwonka torikubaasa kuta amooya omu kinyonyi ekitari kyo. Mwareeba? Tikirikubaasa kukora. Kandi nikyoreka oburyarya bw'ekinyonyi ekyo kiine. Mwareeba?

44 Noobaasa kuteekateeka akaca kakuzire nikagyezaho kugira amooya g'enkombe makye kakagira kati, "Mureebe hanu, mureebe, ndi enkombe"? Mwareeba? Ahabw'enki, twena nitumanya ngu n'akaca. Mwareeba? Mwareeba? Nikyo ekyo kyonka. Nitubaasa kumanya ngu n'akaca.

Mbwenu, hati okwo nikwo kiri, kugyezaho ku-kukora Obukristaayo. Torikubaasa kukikora. Ekintu ky'okubanza eki orikuteekwa kukora, n'okuzaarwa obwa kabiri. Nooteekwa kuhindurwa. Mwareeba? Kandi ku orikuhindurwa, nooba ekihangirwe kisya. Hati waatandika kuba gye, hati. Mwareeba? Hati nooba otaine kweraarikirira aha mooya, nikija kwekora kyonka, wa-waaba ozairwe obwa kabiri. Eego, sebo.

Nk'oku ntura ningamba. Kwata e-empunu, gikuute ogijwekye suuti y'omurembe, nari suuti y'omwabazyo, niimanyisa, ogigijwekye kandi ogirekure; neegyendera kimwe omu kiina ky'ebeyondo kandi eyekuringyemu. Ahabw'okuba, nooreeba, tikiine eki kyakugasha. N'empunu. Obwo nibwo buhangwa bwayo. Okwekuringa omu kyondo n'obuhangwa bwayo. Nooteekwa kuhindura obuhangwa bwayo, kandi (yo) ebendi byona nibyekora.

45 Hati yetegyereze. Nooteekwa kuzaarwa obwa kabiri, ekirikumanyisa, okuhindurwa. Nihateekwa kubaho empinduka.

Noogira oti, "Mbweni, Ow'eishe-emwe Branham, nimmanya omukazi nanka ogu hanu, ahabw'enki, takakorahoga kintu kibi. N'omukazi murungi. Nari, omushaija ogu nanka na nanka, n'omushaija murungi. Takakoraga kintu kyona. Noomanya takora kubi muntu weena." Ekyo tikiine makuru na kakye. Naabaasa kuba omutaahi murungi, kwonka tari Mukristaayo okuhitsya obu araazaarwe obwa kabiri.

Yesu akagira ati, "Omuntu ku aba atazairwe bwa kabiri," Yohaana Orikwera 3, ngu "tarikubaasa nangwa n'okureeba Obukama." Hati, ekyo nikimanyisa, kureeba, nikimanyisa "okwetegyereza."

Waareeba ekintu kyona, okagira oti, "Tindikukireeba." Noomanyisa ngu torikukyetegyereza.

46 Omuntu tarikubaasa kwetegyereza ahabw'enki abantu nibateera orwari. Omuntu tarikubaasa kwetegyereza ahabw'enki orurimi rw'omuntu nirubaasa kuhinduka reero akagamba omu ndimi. Omuntu w'obuzaarwa bw'omubiri tarikubaasa kureeba oku ektiinisa kya Ruhanga kirikubaasa kwija aha maisho g'omuntu, kandi akareeba okworekwa reero akagambira omuntu ebintu nanka, kandi n'eky'okukora; akabagambira n'ebirikwenda kubaho, kandi agambe ebirikwija kubaho, nk'oku Mukama atukoreire ekiro ekihingwire, nabwo. Mwareeba? Mwareeba? E-ebiteekateeko bw'obuntu nibugyezaho kukibangaanisaho. "Mbweni, akozire ki? Nari, ni kakoryo ki aku arikukoresa? Ni ky'okubeihabeihisa ki eki aine? Kureeba omuntu naagamba omu ndimi, nibabaasa kugamba . . . kandi omuntu ondiijo azishoboorore kandi agambe ekyo kyonyini aha muntu omwe ow'omu Mubiri eki bakozire, kandi n'eki batashemereire kukora. Mwareeba? Mwareeba? Nibateekateeka ngu n'akakoryo. "Hariho ekintu eki bapangire rwagati yaabo."

Tibarikubaasa kukyetegyereza okuhitsya obu omuntu ogwo araazaarwe obwa kabiri. Reero yaazaarwa obwa kabiri, obwo naaba arikubaasa kutaaha omu kukwatanisa, ahabw'okuba n'ekihangirwe kisya. Ogwo muntu owa ira ow'okwekyengyera, owaabaire naabangaanisa, akafa. Hati, n'ekihangirwe kisya. N'ahabw'enkyo, nimureeba, tikirikwetaagisa ngu ayongyereho ekintu kyona, hati, ahabw'okuba nikija kweyongyeraho kyo kyonka.

47 Yetegyereza, nooteekwa kuzaarwa obwa kabiri. Kandi waazaarwa obwa kabiri, torikubaasa kuzaarwa obwa kabiri otaine kwikiriza. Ekyo kihikire. N'ahabw'ekyo, nooreeba, aha kipande kyangye hanu, nyineho omusingye gwonyini, okwikiriza nigwo musingye gwabyo byona. "Ahakuba otarikwikiriza tarikubaasa kusHEMEZA Ruhanga. Ahakuba omuntu weena orikwija ahari Ruhanga naateekwa kwikiriza ku ariho, kandi ku aha ebihembo Abamusherura n'obweziriki." Mwareeba? Naateekwa kuba. Kandi waaba noobangaanisa Baiburi, waaba noobangaanisa Ekigambo ngu tikihikire, haakiri otegyereze kuhitsya obu oraabanze waakiikiriza.

Ekibi niki? Okutakiriza. Hariho ebintu bibiri byonka ebirkutegyeka omuntu. N'okubangaanisa nari okwikiriza, kimwe nari ekindi. Oine kimwe ekirkutegyeka amagara gaawe. Ni kirugiirira aha kwikiriza oku oine, oku orikubaasa kuza ahaiguru.

Kwonka, eky'okubanza, nikiteekwa kuba okwikiriza. Ka ngume aha musingye ogwo kumara akaanya kakye.

48 Hati, okwikiriza n'ekintu eki orikuteekwa kwikiriza. Okwikiriza niki . . . "Okwikiriza nikwo kuhamiza kimwe ebi twineho amatsiko." Kiri ngu, waaherize kikitunga ku oraabe oine okwikiriza, ahabw'okuba kishuuuurirwa omu kwikiriza. "Okwikiriza nikwo kuhamiza kimwe ebi twineho amatsiko," Abaheburaayo 11, mwareeba,

"ekirikuhamya." Niki? N'okuhamya kwa muringo ki? Obuhame oburikwera.

N'ahabw'ekyo, waagira oti, "Ow'eishe-emwe Branham, niinyikiriza ngu Ruhanga n'omutambi." Mbwenu, ku oraabe noikiriza ekyo, reero Okamwikiriza nk'omutambi waawe, kandi otarikubaiha, kwonka buzima orikwikiriza ngu emihiririzi ye niyo ekukiza, tihariho kintu ekirikukuzibira kukira. N'ekintu ekihweire. Hati noobaasa kugira amatsiko, oguma nooyeshara eki kandi nooyeshara na kiri. Kwonka waaba oine okwikiriza, nookimanya, ahabw'okuba nibwo buhame. Waherize kukturunga. Nkaba . . .

49 Ni bangahi, hariho omuntu weena, owaahurira Oral Roberts akasheeshe aka, obu abaire naabuurira akasheeshe aka, Oral Roberts? Mu-muhuriire naagamba ekintu nari ekindi ekikwatsire aha kugira ngu hariho okwikiriza, okwo okw'okutambirwa, kushaba okushaba kw'okwikiriza, kw'okutambirwa. Agizire ati, "Gira enkoragana yaawe kurabira omu kukwata ahari reediyo, gira enkoragana yaawe kurabira omu kukwata aha kintu, kugira ngu . . ." Omushaija ogu abaire naakora ekyo, kugira ngu kihe abantu ekintu nanka eki baakubaasa kutaho engaro zaabo. Ekintu nanka, noogira oti, "Naakitunga hati, ahaw'okuba yangambira kukwata ahari reediyo yangye. Naakitunga." Mwareeba? Hati, ekyo ni kirungi. Kwonka, hati, okwikiriza okurikwo tikurikwetaagisa kukwata n'obu kyakuba kimwe ahari ebyo bintu. Hati, tindikucwera rubanja Ow'eishe-emwe Oral, na kakye. Ariyo naakora omurimo gw'amaani, kandi omushaija orikutiina Ruhanga, kandi buzima nte-ntekateeka bingi ahari Oral Roberts. Ni kibi munonga titwine baangi abari nkawe.

Kwonka eki ndikigyezaho kugamba n'eki, ngu-ngu, okwikiriza tikurikwetenga ekintu kyona. Mwareeba? Okwikiriza kwikiriza Ekigambo kya Ruhanga. Ahakuba okwikiriza kuruga omu "kukwata"? Ngaaha. "Okwikiriza kuruga omu bi tuhurira, kandi ebi tuhurira biruga omu Kigambo kya Ruhanga." Ekyo nikikihamya. Kiri aho. Mwareeba? Kandi okwikiriza, nk'oku kyagamba, tikuri hare nakyo. Okwikiriza n'okwa hati hati. Okwikiriza kuri hanu.

50 Hati nk'oku hakuba hariho omuntu . . .

Omwana muto ogwo, ekiro kiri. Nyina w'omwana ou Ow'eishe-emwekazi Kidd nabo ou baagambireho, owaabaire aine omwana muto amara gari aheeru, ataine kahengyere omu mushumiko, eby'okurya kurabamu. Hati, omukyara ogu, ku yaahuriire Ow'eishe-emwekazi Kidd n'abandi nibaha obujurizi, yaikiriza ngu ku yaakubaasa kugira enkoragana, haza nkashabira omwana ogwo. Hati, mwareeba, Ruhanga naatuha abantu . . .

Bamwe omuriitwe twine obumanyi na Ruhanga, munonga-munonga buzima okuhitsya obu Ruhanga arikuba nk'okuza hanu, nka, kandi nkagamba n'Ow'eishe-emwe Neville nari omuntu weena ou orikumanya. Kandi obumwe n'obumwe nitushaba abantu abo kutushabira. Ekyo nikyo tushemereire kukora. Reero ku turikuba twine okwikiriza ngu ogwo omushaija nari omukazi, orikutushabira weena, naagamba na Ruhanga, obwo okwikiriza kwaitu nikuhama. Nikukwata. Nikutebeekana.

51 Hanu. Omurooma akaza kubugana Yesu. Kandi yaagira ati, "Ti-tindi muntu ou oshemereire kutaaha omu nju ye. Tinshemereire. Ti-tinshemereire. Kandi Ti-ti . . . Ti-tindikwetwaramu ntyo. Kwonka," ati, "omwana wangye arwaire munonga. Gamba Ekigambo kwonka, mwareeba, kandi omwana wangye naja kukira."

Kikaba kiri ki? Okuba hare tikirareetsireho ntaaniso. Mwareeba? Ahabw'okuba, Ruhanga ari hoona hoona. Ruhanga n'ow'obushoboorozi bwona. Kandi Ruhanga ahantu hoona ahu Ruhanga ari, amaani goona niho gari. Kandi Ruhanga, ahabw'okuba ahantu hoona, ekyo nikituma Ruhanga yaaba buri hantu, hoona hoona. Mwareeba? Ruhanga n'ow'amaani omuri Bugirmaani, omuri Swiss, na ifo omuri Afrika, omu dakiika egi yonyini, nk'oku Ari hanu hati. Oo! Nikyo ekyo.

N'ahabw'ekyo hati, "Tindi muntu ou oshemereire kutaaha omu nju ye. Gamba Ekigambo kyonka." Kikaba kiri ki? Kukaba kuri okwikiriza kw'Omurooma ogwo. Akakiikiriza.

Kandi Yesu akagira ati, "Irooko oyegyendere. Omwana waawe yaakira."

Kandi yaagyenda, orugyendo rw'ebiro bibiri. Kandi ekiro ekyakuratsireho, atakahikire omuka, yaabugana bamwe aha bahuuku be nibaija. Kandi baagira bati, "Omwana waawe ahuriire."

Kandi Omurooma kikamushemeza munonga, okuhitsya obu yaagizire ati, "Ni bwire ki bw'eizooba obu atandikire kuba gye? Ni shaaha ki ez'eizooba?"

Yaagira ati, "Nk'eshaaha ya ikumi-na-emwe, atandikire kubaho gye."

Reero Omurooma yaamanya ngu nibwo bwire bwonyini obu Yesu agizire ati, "Omwana waawe ahuriire," kandi akaba akiikirize. Amiina.

52 Ow'obushoboorozi bwona, ori hoona hoona, orikumanya byona, otaine bugarukiro, ogwo ni Ruhanga. N'ahabw'ekyo, ku bateera esimu haza bakagira bati, "Shaba! Enkoragana egoy! Kandi okwikiriza kwawé nikureeta Ruhanga. Nikyo kintu ekirikureeta okushaba na Ruhanga, hamwe, aho. Okushaba! Okwikiriza n'okuruga hanu kuza hanu. Nikubireeta hamwe.

"Gamba Ekigambo. Eki ndikwenda ngu Okore kyonka n'okugamba Ekigambo, reero buri kintu nikiba gye."

Mwareeba, kikaba Kitarikumwetaagisa kubayo. "Gamba Ekigambo kwonka." Ahabw'enki? Ruhanga ari hoona hoona. N'ow'amaani goona. N'ow'amaani ahansi y'ensi nk'oku Ari ahaiguru y'ensi, nari embaju zombi. Ni Ruhanga. Yaagira ati, "Kandi ekintu kyona eki Oshemereire kukora n'okugamba Ekigambo kwonka."

Kandi, hati, okwikiriza ni kukora ebyatsigara. Okwikiriza nikukora ebyatsigara. N'ahabw'ekyo nooteekwa kugira omusingye gw'okwikiriza. Obukristaayo bwona, kyona eki ori, kyona eki oriba, kihamiire aha kwikiriza Ekigambo.

### 53 Egyo niyo nshonga erikutuma naikiriza Ekigambo. Mwareeba?

Tindikubaasa kuta okwikiriza kwangye omu kintu kyona. Ku naakubaire ndi ow'okukuta omu kanisa, ni kanisa ki ei naakubaasa kukutamu: Ey'Abakatoriki, ey'Abaluteeri, ey'Abametsodisiti, ey'Ababaputisiti, ey'Abapentekoote? Nkaakuta nkahi? Tindikumanya. Boona baine obucuukucuuku n'ebindi byona, nibahindagutura ebantu, na buri kintu kyona.

Kwonka ku ndikuta okwikiriza kwangye omu Kigambo Kye, nikuba kwahama. Tihaine Orukivunuura. Nkiki hanu, OKU NIKWO MUKAMA ARIKUGIRA. Reero niinyikirirza Ekyo. Ogwo nigwo musingye.

54 Dokita murungi mukye ahaifo hanu omu rurembo, munywani wangye, Dokita Sam Adair. Tukanyeeta hamwe omu butsigazi bwaitu. Mwena nimumanya Sam. Kandi akangambira, yaagira ati, "Bill . . ." Ahanyima y'okutunga okworekwa okwo, nkamugambira ahu yaabaire naaza kwombeka omwanya ogwe, oku gwabaire niguba kushusha. Hati irooko ozeyo obwire bumwe, omubuuze ago ku garaabe gatari mazima obwire bumwe. Emyaka ebiri nari eshatu kitakabaireho, nkamugambira ahu gwabaire niguba kuba. Naagira nti, "Noija haihi kutwara ekyombeko kiri kyona eky'omu rurembo." Kandi tihariho kindi kintu kyona ekiri ahagati ye nagwo, kandi ogwo n'omwanya gw'okugarurizamu busya. Dokita Adair agwine gwona, n'eitundiro ry'emibazi. Nikyo kyonka. Dokita Adair akakikora buzima, okworekwa okwo. Ahu, omwanya ogu yaagizire ngu, "Tigurikubaasa kukwatwaho kumara emyaka makumi abiri na itaano. Guri omu kooti.

Nkagira nti, "Dokita, Mukama yaagukuha, ahabw'obucureezi bwawe."

Yaagira ati, "Tindi murungi."

Naagira nti, "Ori akanyankogote. Oine ekishushu aheeru, ekikogotso eki orikureeberamu banywani baawe aheeru hanu, kwonka omunda ori omuntu murungi. Ruga omu kikogotso ekyo." Naagira nti, "Ruhanga yaagukuha."

Yaagira ati, "Tinkakubangaanisagaho, Billy, kwonka ekyo ninteeekwa kukibangaanisaho."

Naagira nti, "Z'omu ofisi yaawe." N'ahabw'ekyo yaashohora.

Akasheeshe akaakuratsireho, akanteerera esimu, yaagira ati, "Obwoba n'obw'okuunyita."

Naagira nti, "N'enki?" Kukaba kuri nk'Okwamushanju. Naagira nti, "N'enki, Dokita?"

Yaagira ati, "Omwanya guri naaherize kugugura, Billy. Bagizire orukiiko omuri Boston nyomwebazyo, mbwenu omwanya ogwo naaheza kugugura akasheeshe aka."

Naagira nti, "Nkakugambira."

Nkaba ndiyo ekiro kiri, ningamba nawe. Obu embundu yambarukira omu maisho . . . Yaagira ati, "Ninteekeeka ekyo nkigambiire enkumi z'abantu abarikwija hanu, ntyo." Niki? Hati, Ruhanga yaagamba ekintu, nikiteekwa kubaho.

55 Nyomwebazyo bamwe ahari banywani bangye bataahiremu. Bakaba baahuriire aha kworekwa okwagambirwe aha ngabi y'amahembe g'amataagi eyaabaire eine eihembe eririkuhitsya inci makumi ana na ibiri, n'edubu ekazire ya kihuura. Tindikumanya n'abantu bangahi abaraizire omuka, barikwenda kugireeba. Nkagira nti, "Orukoba rw'okupimisa ruri hanu. Pima eryo ihemba." Akahurira nikugambwa kutakabaireho. Mwareeba? Ahabw'enki? Ruhanga ku agamba ekintu kyona, nikiteekwa kubaho. Niyo nshonga, kiteereirweho omusingye.

Hati, puraani y'okujunwa ngigi hanu. Reero okworekwa Kwe ku kuraabe kwahikiriire kimwe, buzima kwo nk'oku barikugamba, kandi ekanisa egi erikumanya ngu kihikire, mbwenu shi Ekigambo Kye. Mwareeba? Kyo kihikire okukira okworekwa. Okworekwa ku kuriba kutagambre nk'Ekigambo, obwo okworekwa nikuba kugwire. Kwonka n'Ekigambo, okubanza, ahakuba Ekigambo ni Ruhanga. Mwareeba? N'ahabw'ekyo, Ari hoona hoona. Ekyo Akakigamba hanu, kandi yaatuma kyahikiirira omuri Canada. Amiina. Mwareeba, Ari hoona hoona.

### 56 Ni kirungi.

Eky'okubanza, nooteekwa kuzaarwa obwa kabiri. Kandi bwanyima waazaarwa obwa kabiri, nootunga okwikiriza; noikiriza Ekigambo. Waaba otazairwe obwa kabiri, nooza Kukihakanisa. Ku oraabe oyegamiire ediini kwonka, kandi-kandi oine o-o-okwetegyereza kukye kw'obuntu ngu oshemereire kukora ekihikire, toribaasa kwikirizana n'Ekigamba kya Ruhanga na kakye. Toribaasa kukikora. Nooteekwa kuzaarwa obwa kabiri. Kandi,

okuzaarwa obwa kabiri, nikireeta okwikiriza. Ni kirungi. Bwanyima, waaheza kutunga okwikiriza, oku hanu honyini, o-k-w-i-k-i-r-i-z-a, okwikiriza, obwo ori omu mbeera y'okukura.

57 Hati, abantu baangi baza ahari rutaari, kandi bashaba, reero bagira bat, "Mukama, nsaasira." Reero obumanyi bw'amaani bw'okwezibwa bubaijaho, n'ebindi. Bwanyima mutunga okushemererwa kwingi, muza ahari rutaari, nimuteera akaari. Ogarukayo, ogira oti, "Ruhanga aheebwe omugisha, naakitunga." Ngaaha, waatandika kuhika omu mwanya ahi orikubaasa kukura. Tihaine eki waakozire. Mwareeba? Ekintu kyonka eki waakora waataho omusingye.

Hati nooza kwombeka enju, reero waataho omusingye, ogire oti, "Mwojo 'we, naagitunga." Mwareeba? Waatunga omusingye gw'okwombekaho enju yaawe. Hati nooteekwa kwombeka enju.

Hati aho niho ekintu kirikutaahiramu, akasheeshe aka, eki turikuza kugambaho hati. Ni kirungi. Enju, omusingye ogu nigwo gw'okubanza. Omusingye gw'Obukristaayo ni guuha? Okwikiririza omu Kigambo kya Ruhanga. Ogwo nigwo musingye gwawe. Reero otandika kukura. Reero otandika, otandika kwongyera aha musingye ogu.

58 Hati, okwombeka enju, nootaho eby'okwemereza n'ebindi byona. Ow'eishe-emwe Woods, kandi na bamwe omuri aba babaizi n'abapatanzi b'ebiyombeko abari hanu nibabaasa kutugambira oku oshemereire kwombeka enju yaawe. Mwareeba? Kwonka naaza kukugambira nk'oku orikwombeka enju yaawe ey'omwoyo, omu Ruhanga arikubaasa kutuura. Naayenda ngu atuure omuriyiwe. Naayenda ngu obe Nkawe. Naayenda ngu oyeyorekye, nimmanyisa obe ekirikworeka, oku Ari.

59 Noomanya, omu bwire obwa ira obu baabaire bakora ezaabu, batakaturungire eky'okyoma ky'okugishemeza kikagyokyeza kimwe, bakaba bahonda ezaabu, bahonda enkamba ehwamu, obutare, n'ekikomo n'ebindi, bihwamu, kandi baguma nibagihonda, kandi nibagihindura, nibagihonda. Abahindi nibakikora ekyo hati, nibahonda ezaabu, kandi bagihonda. Nimumanya oku baabaire bamanya ngu obutare bwona bwagihwamu, kandi n'oburofa bwona n'ebindi, n'enkamba yaahwamu? Owaabaire naaghonda ku yaabaire agyereeberamu, nk'endeeberwamu, omuriyo. Ekaba eshemezibwa kandi ebonera okuhitsya obu orikughonda yaabaire agyereeberamu.

Okwo nikwo Ruhanga akora. Atwara ezaabu ei yaabona omu nsi, kandi agihonda, naakozesa Omwoyo Orikwera, agihindura, agaruka agihindura, agaruka agihindura, kandi agumizamu naagiteera okuhitsya (obu Arikutunga) obu Arikubaasa kwereeberamu. [Ow'eishe-emwe Branham yaateera omu ngaro ze emirundi mingi omu kibazo -Omur.]

60 Kandi ekyo nikyo tushemereire kukora, kworeka Omwana wa Ruhanga. Kandi hati tushemereire kukora omurimo Gwe. Akagira ati, "Orikuunyikiriza . . ." Yohaana Orikwera 14:7, "Orikuunyikiriza, emirimo ei Nkora nawe aryagikora." Waatandika kworeka emirimo ya Kristo.

Kwonka baangi omuriitwe nitugyezaho kukora emirimo ya Kristo ekishushani kya Kristo kitakareebekire omuriitwe. Hati ngugwo aho omurabanamu. Nitushanga ebintu ebyo nibibaho. Nimukimanya. Ninkimanya. Nitureeba ebi, bizikiire omu muhanda. Nitushanga omutuumo gw'abaheereza abatakiine mugasho, gw'Abakristaayo, barunzirwe entuumo omu muhanda, n'ahabw'okuba tibarakitaahiremu kurungi.

Kandi egoyi niyo nshonga etumire naaba hanu akasheeshe aka, n'okugyezaho kwegyesa egi kanisa nkye, naanye nyenka, oku turikubaasa kuba omwanya gw'obutaaho bwa Ruhanga ohuriire. Ni bangahi abarikwenda kuba ekyo? [Abateeraine baagira bat, "Amiina." -Omur.] Omwanya gw'obutaaho bwa Ruhanga ohuriire!

61 Hati nkiki hanu eki turaakore. Ekintu eky'okubanza niki? Gira okwikiriza, kandi ozaarwe obwa kabiri. Okwo n'okutaho omusingye.

Reero, twaheza kutaho omusingye, ekya kabiri nooyongyera aha musingye gwawe. "Aha kwikiriza kwanyu mwongyereho," Petero nikwo yaagambire hanu. Mwongyere aha . . . Eky'okubanza ogire okwikiriza, reero oyongyereho amaani aha kwikiriza kwawe. Eki n'ekicweka ekirikukurataho. Eky'okubanza, taho omusingye gwawe, okwikiriza, aha kwikiriza kwawe, oyongyereho amaani.

Hati, aho honyini nihanaga ahansi baangi omuritwe. Eego, sebo. Eego. "Aha kwikiriza kwave yongyeraho amaani." Ekyo tikirikumanyisa kutuura amgara agashugaine, noomanya, nk'omukazi nari omushaija, n'ebindi. Ekyo tikiine kakwate nakyo.

Baiburi ekagamba, tukakishoma hanu omu kitabo kya Luka, ahu Kyagizire kiti, "Amaani gakamurugamu." Ekyo kihikire? [Abateeraine baagira bat, "Amiina." -Omur.] Ku turaabe nitwenda kuba Nkawe, nituteekwa kugira amaani, buzima. Nituteekwa kugagira, okuba Nkawe.

62 Nikyo kyeshongoro ky'okubanza eki ndakunzire, omu-omu byeshongoro, kimwe omu birikukirayo, kikaba kiri, Okuba Nka Yesu. Mbwenu, ku ndaabe ninza kuba nka Yesu, ninteekwa kugira amaani, kandi n'oburabo omu garikubaasa kuraba nigaruga omuriinye gakahika aha bantu. Ahabw'okuba, "Amaani gakamurugamu gaaza omu bantu." Amaani! Kandi otakagashohoize, nooteekwa kubanza waagagira. Waaba otagaine, tigarikwija kurugamu.

Tihariho hantu ahu garikubaasa kuruga.

Omuntu ku yaakugyezaho kwiha amaani omuriitwe, kandi ceeka ekagaruka “esente ni nkye”? Mwareeba? Ngaaha, ngaaha, tihariyo sente z'okwihayo, ceeka yaayangwa. Omuntu orikukureeba nk'Omukristaayo, reero omu kasheeshe akakureeba aheeru okwo nooyetwara nk'omusiisi, tihariho maani maangi agaakubaasa kukurugamu. Mwareeba? Kihikire.

Amaani nigateekwa kuba gari omuriitwe. Kandi okuhitsya obu turaatungye amaani . . . Reero ku turaatungye amaani gahikire, nitubaasa kugongyera aha kwikiriza kwaitu. Ogwo nigwo musingye gw'ekisiika ekirikukurataho. Hati, eky'okubanza nooteekwa kugira okwikiriza. Okwikiriza kwonka tikurikubaasa kukikora. Nooteekwa ku . . . Petero akagira ati, “Bwanyima aha kwikiriza kwawe oyongyereho amaani.” Nooteekwa kugira amaani, kugira ngu ogongyere aha kwikiriza kwawe.

63 Hati, reero, nikibaasa kuba, enhonga etumire otaagagira, ahabw'okuba amakanisa maangi g'ebiro ebi nigeegyesa ngu tikirkwetaagisa ngu ogagire, nari ebiro byago bikahwaho.

“Tikirkwetaagisa ngu bagagire. Ekintu kyonka eki orikwetaagisibwa kukora, n'okwegaita aha kanisa kwonka. Yee, ebyo biro bikahwaho.”

Amaani, buri omwe naamanya eki ekigambo amaani kirikumanyisa, mwareeba, kandi nituteekwa kugagira. Amaani ku garaabe Gaamurugiremu, gakatambira omukazi owaabaire arwaire, Ategyereize amaani nigo gamwe omu Kanisa Ye, ahabw'okuba Akaba ari eky'okureeberaho kyaitu. Kandi ku Araabe yaabaire aine amaani g'okuha abantu, Atutegyereize ngu tugire amaani g'okuha abantu. Mbwenu amaani niki? Amaani n'enkubito, obushoboorozi.

Bamwe omuribo tibarikwikiriza omu maani ga Ruhanga. Nibagira ngu, “Ga-ga-gakahwaho. Ekintu kyonka eki orikwetaagisibwa kukora n'okuta eiziina ryawe omu kitabo, haza okamiisiirwa amaizi, nari bagakushukyeho, nari obatizibwe, nari n'ebindi. Kandi ekyo nikyo kyonka eki orikuteekwa kukora.”

64 Kwonka Petero hanu akagira ati, “Oyongyereho amaani.” Hati, Petero naagamba aha kwombeka Enju ya Ruhanga, mwareeba, Hekalu ya Ruhanga, kugita omu mwanya. Kandi bwanyima waahenza kugira amaani, nooteekwa kugira . . . Waahenza kugira okwikiriza, nooteekwa kugira amaani agarikugyenda nakwo. Ekyo kihikire. Ogire amaani ahabw'ensi yoono.

Nkabuurira eishomo nk'emyaka makumi abiri ehwiringe, ninteebereza, ahari Rev. Omw. Eirebe. Eirebe, omuriisa. Nkariiha omu kieweka ahu Yesu yaagizire ati, “Mwetegyereze eirebe, oku gatagira murimo nari kuruka emyenda. Beitu nimbagambira nti, na Sulemaani omu kitinisa kye kyona taraizhiirwe bijwaro nka rimwe aharigo.”

Reeba eirebe. Niriruga ahansi munonga omu byondo. Kandi buri dakiika y'eizooba niriba nirinywa okuruga omu nsi. Mwareeba? Kandi nirikora ki n'amaani agu ririkunyuwa? Nirigahayo. Niryoreka endeebeka nungi aha muntu orikurigira. Niryejanjamura ahabw'obwoki, kugira ngu orujoki rwije rutungye omugabo gwarwo. Tiririkwetomboita. Ribwine, kubuhayo. Kuri orujoki nirwijaho; esente ni nkye, obwoki haabwo? Orujoki rukye orwo rukaayeyagura omu mutwe kandi rugira ruti, “Eri n'eirebe rya muringo ki?”

65 Omuntu ku yaakwija, naagyezaho kusherura okujunwa, akaza omu kanisa erikwikiriza ngu obwire bw'eb'yamahano bukahwaho?

Nka Jack Coe rimwe oku yaagambire. Nk'okuza omu hooteeri, reero okakwata ekipande ekihandiikirweho emihendo y'eb'yokurya kihango munonga; okatandika kukishoma, enyama y'eigufa n'ebindi. Ogire otu, Ninja kurya enyama y'eigufa.“

“Mbwenu, egyo ebaire eriho nyomwebazyo. Titugiine.”

N'obwo ote ekipande ky'emihendo y'eb'yokurya ahansi reero oshohore aheeru, mwareeba, ekyo kihikire, 'habw'okuba tibaine eky'okurya kyona, oku biri kwona. N'ahabw'ekyo kikaabaire kirungi oza omu hooteeri eine eky'okurya.

Kandi omuntu w'omwoyo, orikukura, naayetenga ekintu ky'okurya. Ekyo n'Ekigambo kya Ruhanga. Niinyikiriza buri Kigambo Kyakyo.

Ruhanga aine emeeza etebeekanisiibwe ahu abarikwera ba Ruhanga bariisibwa,

Naayeta abantu be abatoorainwe ati, “Mwije murye.”

Naagabura emaanu Ye, Atuha byona ebi turikwetenga,

Oo, ni kirungi kurya na Yesu obwire bwona.

Ekyo ni kirungi. Eego, sebo. Akiine. Ekanisa Ekiine, Ekanisa ya Ruhanga ohuriire, eyombekirwe omuri ogu omuntu ohikiriire, w'okwetegyereza kwa Kristo.

66 Hati, hati nooteekwa kugira amaani.

N'ahabw'ekyo nkagira nti, ekintu eky'okubanza noomanya, hariho omuntu orikukunda kukaga ekisooroora kirungi. Tarikwekunda. Aine ekisooroora kirungi. Atakahaire ekisooroora kirungi, naateekwa kukigira. Atakahaire obwoki, naateekwa kubugira. Atakabaasize kuha oburungi, naateekwa kubugira.

Otakahaire amaani, nooteekwa kugagira. N'ahabw'ekyo, aha kwikiriza kwawe oyongyereho, amaani. Amiina. Mwayetegyereza? Nitubaasa kuguma ahari ekyo kumara obwire burasingwa, kwonka obwire bwaitu bukaatuhwaho. Aha kwikiriza kwawe oyongyereho amaani.

67 Hati, eky'okubanza n'okwikiriza, bwanyima hakurateho amaani.

Reero, ekya kashatu, oyongyereho okwetegyereza. Okwetegyereza, hati, ekyo tikirikumanyisa okwetegyereza kw'ensi, 'habw'okuba obwo n'obushema ahari Ruhanga; kwonka okwetegyereza kw'okumanya, kumanya, (ki?) kutaanisa ekihikire n'ekigwire. Noomanya ota, reero, ku oraabe oine okwetegyereza kw'Obukristaayo n'amaani gaawe kandi n'okwikiriza? Noomanya yaaba Ekigambo kihikire nari kigwire. Kandi ku oraabe noobaasa kuta aha rubaju enyikiriza zaawe z'amadiini zoona, kandi n'okutaikiriza kwawe kwona, buri kintu eki orikugira ngu okozire, obwo oine okwetegyereza kw'okwikiriza ngu Ruhanga tabaasa kubaiha. "K'ekigambo kya buri muntu kibe ekishuba, kwonka Ekyangye kibe amazima." Mwareeba? Hati nootunga okwetegyereza. Okwo n'okwetegyereza okurukukirayo. Tikirikwetaagisa kugira za diguri ina omu itendekyero rikuru, nari ekintu nk'ekyo, kugira ngu otungye okwetegyereza, ahabw'okuba ebintu ebi byona noobiheebwa Ruhanga, kubita aha musingye gw'okwikiriza kwawe, kugira ngu obone kuhika aha rugyero rwijwire rw'omuntu ohikire, ohuriire wa Ruhanga. Eego, sebo.

68 Yongyeraho, yongyeraho okwetegyereza, ahabw'okuba, okwetegyereza Ekigambo Kye. Nooteekwa kukiikiriza omu muringo ogu. Nka, oshemereire kwikiriza eriizooba ngu . . . kandi okiikirize, ngu ebiro by'eb'yamahano tibakahweireho. Okwetegyereza ngu ebi Ruhanga yaagambire, Ruhanga naabaasa kubikora.

Abrahamu akaikiriza ekyo. Kandi ku yaabaire ahikize emyaka igana y'obukuru, tarabangaanisiibwe kutaikiriza okuragaanisa kwa Ruhanga. Reeba Ekigambo ekyo oku kyabaire nikireebeka nk'eky'obushema munonga. Ngugu omushaija hanu, ohikize emyaka igana y'obukuru, otegyereize omwana kuzaarwa omuka ye, n'omukazi ohikize emyaka makumi mwenda y'obukuru. Mwareeba? Haihi emyaka makumi ataano ahingwire obunaku bw'okuzaara, atwire nawe kwiha obu yaabaire ari o-omwishiki muto, nari empangare. Mbwenu ngu hanu, enshuro ye y'amagara ekaba yaafire. Kandi na nyinenda ya Saara ekaba yaafire. Kandi amatsiko goona gaahweire, aha kikwatsire aha amatsiko. Kwonka, nabwo, hatariho matsiko, akaikiririza omu matsiko, ahabw'okuba akaba aine okwetegyereza ngu Ruhanga akaba naabaasa kuhikiriza buri kintu kyona eki Yaaraganise.

69 Hati, waakitunga otyo, reero ekyo okyongyere aha kwikiriza kwawe. Waatunga amaani agahikire, ogongyere aha kwikiriza kwawe. Waagyenda aheeru hanu omu ruguuto rw'omu rurembo, okatuura nk'Omukristaayo, okakora nk'Omukristaayo, okaba Omukristaayo, ekyo okyongyere aha kwikiriza kwawe. Waaba oine okwetegyereza . . .

Noogira oti, "Mbwenu, tindikumanya yaaba Ekyahandiikirwe eki kihikire. Hati hanu hariho Ebyakozirwe 2:38, tindikumanya kugiringaaniza n'Ebyakozirwe 28:19. Tindikukimanya." Ni kirungi. Oto-otongyeraho ekintu kyona, 'habw'okuba Tokakitungire. Mwareeba? Nooza kukora ki? Ahabw'okuba, tokatungire okwetegyereza okurukugasha kumanya ebya Ruhanga, nabwo, ngu Baiburi Terikwehakanisa. Kirekye. Otagaruka kukigambaho. Mwareeba? Kirekye.

Kwonka waareeba ngu Ekyahandiikirwe Tikirikwehakanisa, ngu noobaasa kugamba oti; kandi noobaasa kureeba, ngu, ahabw'okushuuruirwa kwa Ruhanga, Ekigambo kya Ruhanga kyona kihandiikirwe omu naama, kandi okwetegyereza kwa Ruhanga kwonka nikwo kurikubaasa Kukishuuura; reero waakitunga okagamba, okahamya buri Kigambo kya Ruhanga kyona na "amiina," reero ekyo okyongyere aha kwikiriza kwawe.

70 Oo, waatandika kuba omuntu murungi hati hati. Mwareeba? Oriyo nookura, mwareeba. Naki? N'okwikiriza, bwanyima amaani, reero okwetegyereza. Nimureeba oku birikwombeka omuntu ogu? Noobaasa kureeba ngu tihariho-tihariho muringo gwona gw'okukyetantara. Ogu nigwo muhanda gw'okuba orugyero rwijwire rwa Kristo. Eego, sebo.

Okumanya, kumanya okuhikire. Kumanya yaaba kihikire nari kigwire, kwikiriza Ekigambo kya Ruhanga. Kumanya yaaba kihikire nari kigwire, yaaba nshemereire kuheereza enyikiriza y'ediini nari kuheereza Ruhanga. Okumanya yaaba kihikire nari kigwire, yaaba nshemereire kuzaarwa obwa kabiri nari okwegaita aha kanisa. Obwo waatandika. Okumanya ekihikire, omubuurizi yaagira ati, "Ebiro by'eb'yamahano bikahwaho." Baiburi ekagira eti, "Yesu Kristo tahinduka, oku abaire ari nyomwabazyo, n'eri izooba nikwo ari, kandi nikwo ariguma ebiro byona." Hati nooza kwikiriza ki?

Waagira oti, "Ninza kutwara Ruhanga." Hati, ekyo torikukigamba kugira ngu ogire ngu, "Mbwenu, ni-ninza kukitwara," kuruga omu mutima gwawe. Kwonka, ekintu omuriyiwe, okwikiriza kwawe omunda okwo nikutsindika. Nkikyo. Okwikiriza kwawe nikugira kuti, "Nimmanya ngu Tahinduka. Amiina. Nimuheera obujurizi ngu mureebire

## Atarikuhinduka. Tihaine ekirikubaasa

kukiinyihamu. Nimmania ngu ariho.“ Amiina. Bwanyima ekyo okyongyere aha kwikiriza kwawe. Kite aha musingye ogwo.

71 Nootemba hati, nootembera kimwe oyorekyereire Obukama. Waahika omu mwanya nanka hati. Ni kirungi.

Hati, ekintu ekirikukurataho, omubuurizi naaza kukugambira, kandi abantu baingi nibagira bat, “E . . . Ebantu ebi ebi orikushoma omuri Baiburi, bikaba biri eby'obwire obundi. Hati, ninza kukugambira ahaw'enki. Ahaw'enki, titurikwetenga ebantu ebyo obwire obu. Titurikubyetenga. Mwareeba? Titurikubyetenga. Tikirkwetaagisa kukora ebantu ebyo, okutamba kw'Obwaruhanga. Titurikwemanyiiza kugamba omu ndimi, omu kanisa, ku-kutuma ekanisa yaitu yaaguma eterereire. Kandi titurikukora ebi.”

Nituza kukihikaho ekyo. Nyine Ekyahandiikirwe eki mpandiikire ahansi hanu ahari ekyo, mwareeba, yaaba turaakikore hati nari ngaaha, hati.

Kwonka hanu akagira ati, “Tindikumanya. Titushemereire kukora ekyo ebiro ebi. Ekintu kyonka eki ndikuteekateeka ngu tushemereire kukora, tushemereire kwega kugamba kurungi omu bantu. Tushemereire kuza ow'omushaho w'emitwe akakyebra ebiteekateeko byaitu, kureeba twaba nitubaasa kugamba omu maisho g'abantu, okwetegyereza kwaitu kwaba nikugasha kukikora, kandi-kandi n'ebindi nk'ebyo. Nintekateeka . . . Kandi twine abantu abarikukirayo obwingi. Nitwombeka ekibiina kyaitu ky'ediini.”

72 Titurikwombeka ekigombe ky'ediini. Tindi hanu akasheeshe aka kwombeka ekibiina ky'ediini. Kristo tarantumire kwombeka ekibiina ky'ediini. Kristo akantuma kwombeka omuntu okwe omu rugyero rwa Yesu Kristo, ngu babaase kuba enju ejiwiremu amaani kandi omwanya gw'obutaaho bw'Omwoyo, ahaw'enki Ekigambo Kye. Ahaw'enki Ekigambo Kye, mwareeba, kwombeka omuntu okwe kuhika aha mwanya ogwo. Kutari kwombeka ekibiina ky'ediini kukihindura ekigombe kikuru ky'ediini, kureka kwombeka omuntu okwe kuba batabani na bahara ba Ruhanga. Ekyo nikyo kiteekateeko. Mwareeba? Aha kwikiriza kwawe oyongyereho, amaani; aha maani gaawe, oyongyereho okwetegyereza. Mpaho, hati haine ahi waatandika kuhika.

73 Hati baatandika kugira ngu, “Mbweni, ekyo titurikwetaagisibwa kukiikiriza ebiro ebi.” Nooyetaagisibwa. Nikiteekwa kuba.

Ebyahandiikirwe tibirikubaasa kubaiha. “Kandi tibirikushoboororwa nk'oku omuntu weena arikweyendera,” Baiburi nikwo yaagizire. Noobiikiriza omu muringo ogu bihandiikirwemu Aho. Mwareeba? Nooteekwa kugira ebantu ebi. Kandi omuringo gwonka ogu oribaasa kubitungiramu, n'okutunga okwetegyereza okurikuruga omu Iguru. Kandi okwetegyereza okurikuruga omu Iguru nikwija kuhamya Ekigambo. Mwareeba?

Nooteekwa kwikiriza, kutari kwehindura orikukiikiriza. Tihaine na kimwe omuri ebi ekiri eky'okwehindura omwikiriza, mwareeba, ku oraagyezeho kugira oti, “Nkiine.” Oteetamu amooya g'ekinyonyi ekirikwiragura okeetamu amooya ga nyamunyonyi, mwareeba, 'habw'okuba nigaija kurugamu garagare. Tigaramereiremu omu buryo bw'obuhangwa. Gahatikiremu.

74 Nintekateeka ahu Daudi yaagambire aho, Zaaburi 1, “Aryaba nk'omuti ogubyairwe aha rubaju rw'emigyera y'amaizi.” Noomanya, hariho entaaniso ahagati y'oku byarwa n'okuta aho, kuhatikamu. Nk'omuti gw'omwela ogukuzire, ogwabyairwe, ogurikutsimba emizi kandi gukahamira kimwe. Akati kakye aka ira kahatikirwemu aho, torikumanya ekirikuza kukabaho. Tikaine mizi. Tikaine musingye. Mwareeba?

Ni nk'abantu abarikuruga omuri seminario nari ekintu nanka, mwareeba. Tibaine . . . “Mbweni, Dokita Nanka na nanka bakanyemeka omu buheereza.” Ekyo tikirikureetaho ntaaniso yoona.

Kristo akakuzaariramu, mwareeba, mwareeba, ahaw'enki kwake. Mwareeba? Noohindurwa busya kandi ozaarirwamu. Reero bwanyima waazaarirwamu, ebi nibyo bintu ebi arikukwetaagisa ngu oyongyereho. Guma noobyongyeraho. Hati twatandika kutereera.

75 Hati nihaija kubaho ekintu ekinci aha kwetegyereza oku, eki turikubaasa kugambaho, okwetegyereza kw'Obwaruhanga. Mwareeba? “Baiburi tekiine makuru ebiro ebi?” Mwareeba, bo, abantu baingi nibakugambira ekyo, ngu Baiburi buzima terikumanyisa ekyo. Ruhanga ku araabe nandeeberera, kandi akampana omu kibi kyangye, kandi ku ndaabe ndi omwana wa Ruhanga, ekyo Naakikora. Naakutwaza atyo, batabani [Omwanya oguriho busha aha rutambi rw'amaraka-Omur.] n'abahara. Ku oraakore ekintu kyona ekigwire, Naakuhana. N'ahaw'enki Ruhanga ku araabe naakufaho munonga atyo, Akakureeberera kandi akakuhana, mbwenu tarikukizaho munonga Ekigambo Kye, ekiri eky'okureeberaho kyawe, eki We wenka Ari!

Bwa mbere na mbere hakaba hariho Kigambo; Kigambo ogwo

akaba atuura na Ruhanga; kandi Kigambo akaba ari Ruhanga.

Kandi . . . yaaba omuntu, yaatuura naitwe . . .

76 Ekigambo n'okushuururwa kwa Yesu Kristo, Baiburi nikwo yaagizire, Kristo naayeshuururira omu

Kigambo Kye. Kandi ku Araabe akutaho eriisho waahenda ebiragiro ebi, Akakucwera orubanja ahabwakyo, mbwenu tarikukizaho munonga kureeberera ebiragiro Bye ebirkucwera orubanja! Amiina.

Ningyenda omu maisho, mwojo 'we, otangambira ebyo bintu!

Niinyikiririza omu kwetegyereza kw'amazima, kw'Omwoyo Orikwera. Okwetegyereza kw'Omwoyo Orikwera obutoosha nikwija kuhamya Ekigambo na "amiina." Waatunga ebintu ebi ebirkureebeka nk'ebirikwehakanisa, omuri Baiburi, shutama reero obyegye, haza omu kushaba nka batyo. Kandi ekintu ky'okubanza noomanya, Omwoyo Orikwera naatandika kutaahamu. Kandi ahanyima y'akaanya kakye nooreeba byakirizana, reero aho waakitunga. Mwareeba? Okwo n'okwetegyereza.

77 Bamwe omuribo nibagira bati, "Mbwenu, hati, Baiburi ekagira ngu Tahinduka oku abaire ari nyomwabazyo, n'eri izooba nikwo ari, kandi nikwo ariguma ebiro byona."

Kandi ekanisa neegira eti, "Omu buryo bumwe, Tahinduka." Ahaa! Ahaa! Waataho oruhanga, aho aho. Mwareeba? Eego, sebo. Ngaaha, sebo. Tahinduka. Eego, sebo.

"Yesu Kristo tahinduka oku abaire ari nyomwabazyo, n'eri izooba nikwo ari, kandi nikwo ariguma ebiro byona." Tihariho okuhinduka Omuriwe, na kakye. Naatuura omu Kanisa Ye, naakora ekintu nikyo kimwe. "Hatsigaire omwanya mukye," nk'oku ngambre obwire bukye obwahwaho, "hatsigaire omwanya mukye ensi Okutandeeba bundi, kwonka imwe Muryandeeba. Ahakuba," Akagira ati, "Ndyaba ndi naimwe, nangwa n'omuriimwe, okuhitsya obu ensi egi erihwaho." Omurundi ogundi, Akagira ati, "Emirimo ei Nkora naimwe muryagikora." Omurundi ogundi, Akagira ati, "Ndyaba Omuzaabibu. Naimwe muryaba amataagi." Kandi eitaagi niribaisibwaho Amagara g'Omuzabibus gonka. Kyona ekiri omu Muzaabibus nikirugamu okurabira omu itaagi. Ekitiinisa! N'ahabw'ekyo, Kristo tahinduka oku abaire ari nyomwabazyo, n'eri izooba nikwo ari kandi nikwo ariguma ebiro byona." Nirireeta Amagara ga Mukama Yesu Kristo. Amiina.

78 Okwetegyereza; kutari kw'ensi (nikuhaajaana). Okwetegyereza kwona okw'ensi nikuhaajaana. Mwareeba? Kwonka okwikiriza tikuhaajaana. Ruhanga naakushuururira ngu ekintu nanka na nankai nikiza kubaho, buri munyasayansa omu nsi naabaasa kukugambira ngu, "Tikwo kiri. Tikikaabaasa kubaho." Nookikiriza, nabwo. Mwareeba? Eego, sebo. Tikurikuhaajaana. Baiburi ekagira eti, "Turekye kuhajaana." Torikuhaajaana n'okwikiriza. Okwikiriza tikurikuhaajaana. Okwikiriza nikumanya ahu kuri. Okwikiriza nikukora. Okwikiriza kuramatiraho. Tikurikutengyetsibwa. Tihaine ekirikubaasa kukutengyetsa. Tindikufayo ekirikugamba eki, kiri, ekindi. Tikurikutengyetsibwa, na kakye. Nikuhamiraho, kutegyereza, kutegyereza, kutegyereza, kutegyereza. Tikirikureetaho ntaaniso yoona. Nikuhamiraho aho.

Ruhanga akagambira Noa ngu ebintu ebi nibiza kubaho. Yaakiikiriza. Mwareeba? Ruhanga akagambira Musa ngu ebintu ebi nibiza kubaho. Yaakiikiriza. Ruhanga akagambira entumwa ngu ebintu nanka nibiza kubaho yaagira ati, "Muze eruguru kuri ahari Pentekoote haza mutegyereze." Bakagumirayo kimwe. Eego, sebo.

79 Ni kirungi.

Hati, okwetegyereza, hati, kutari okwetegyereza kw'ensi, kureka n'okwetegyereza kw'omu Iguru. Kandi okwetegyereza kw'omu Iguru, kandi Ruhanga niwe nshuro y'okwetegyereza kwona, kandi Ruhanga niwe Kigambo. N'ahabw'ekyo, ku oraabe oine okwetegyereza kw'omu Iguru, noikiriza Ekigambo, kandi noogamba ekintu kyona kurabira omu Kigambo.

Kandi omushango gw'omushoro ogu ogu ekanisa etwiremu, nari ogu ntwiremu. Omwe aha bashaija obwire bumwe, omu iraka rikye, akangambira. Akagamba naagamba nti . . . "Tibaabaasa kubona nshobe yoona." N'ahabw'ekyo baatandika ku . . .

Naagira nti, "Mbwenu, reero, ku haraabe hatariho nshobe, ahabw'enki mutarikundugaho?" Mwareeba? Mwareeba? Kandi naagumizamu, nimugambira Ebyahandiikirwe.

80 Yaagamba, omushaija w'amaani muhango aine sigara omu ngaro ze, yaagira ati, "Omw. Branham, ndi Omwegi wa Baiburi."

Naagira nti, "Ekyo kyanshemeza kukihurira."

Yaagira ati, "Hati niinyenda kumanya eki oku kwikiririza omu maani g'emigyereko, oku orikushashuza ahabw'obutambaara bw'omu ngaro obu okabwoherereza abantu, enyikiriza nkye egoy ey'amaani g'emigyereko y'okushabira obutambaara bw'omu ngaro n'okubwoherereza abantu, obwo 'butambaara obushukirweho amajuta,' nk'oku murikubweta, 'obutambaara.'" Yaagira ati, "Reero obwo noobushashuza."

Naagira nti, "Ngaaha, sebo. Tihariho kubishashuza kwona."

Kandi yaagira ati, "Mpaho, aha kwikiririza omu maani g'emigyereko oku."

Naagira nti, "Nookyeta okwikiririza omu maani g'emigyereko, sebo. Waaheza kungambira edakiika nkye ezaahwaho ngu ori omwegi wa Baiburi."

Yaagira ati, "Ndiwe."

81 Naagira nti, "Nshomera Ebyakozirwe 19:11." Okwetegyereza! Akagwa omu mutego gwe gwonyini, yaagyezaho kuhindura eki twabaire nitugambaho. Naagira nti, "Kandi nshomera Yohaana 5:14." Tarabaasize kukikora. Naagira nti, "Kandi Yakobo 5:14." Tarabaasize kukikora. Naagira nti, "Noomanya Yohaana 3:16?" Mwareeba? Okwetegyereza, abaine obwengye, obw'ensi! Kwonka ku . . .

Yaagira ati, "Kwonka, Omw. Branham, noogyezaho kukozesa Baiburi kucwa omushango ogu. Nitugyezaho kuguewa nitukozesa ebiragiro by'eihanga eri."

Naagira nti, "Sebo, ebiragiro by'eihanga tibyegamiire Baiburi? N'ahabw'ekyo n'obwinganisa." Amiina!

## 82 Buzima.

Okwetegyereza; kutari kw'ensi. Okwetegyereza kw'Omwoyo okw'Ekigambo, kumanya eki Ruhanga yaagambire, kukora eki Ruhanga yaagambire, ekyo kihikire. Reero ekyo ku oraabe okiine kandi okabaasa kwikiriza ebintu ebi byona, Tahinduka omu bintu ebi byona ebi Ekigambo kigamba ngu n'amazima, noohamya buri kimwe na "amiina." Ni kirungi. Ekyo okyongyere aha kwikiriza kwawe. Ekyo ni kirungi. Eego.

Omuntu ku yaakugyezaho kukugambira, ngu, "Baiburi tekiine maani. Tihariho kintu nk'okubatizibwa n'Omwoyo Orikwera." Ahaa. Ekyo otakyongyeraho. Tikirikwija kukora. Nikija kuragara. Nk'okuta eibumba aha rukiri, tirikaakwataho. Nirija kukumbagara.

83 Reero abantu nibakugambira ngu, "Baiburi terikubaasa kwesiga ebi. Oyegyendesereze hati. Otagumizamu noikiriza ekyo. Tikirikubaasa kuba eky'amazima." Ekyo mutuura nimukihurira. Okugamba ngu, "Torikubaasa kwesiga Baiburi." Mbwenu, ekyo ku-ku oraabe okiine omu biteekateeko byawe, ota-otagyeyaho kukyongyeraho, 'habw'okuba tikirikwija kukora. Ekyombeko kyona nikija kukumbagarira aho honyini.

Nikiteekwa kukwatwa simenti y'Omwoyo Orikwera. Nimmanyisa kugaitibwa hamwe, omusheenyi na simenti ebirikukigumya. Kandi ekintu nikyo kimwe ekirikukigumya . . . Nimumanya omuringo . . .

Tyubu etairwemu ekiraka eki bookyeizeho neehangaara okukira ei bafiire kutaho ekiraka ekikuzire. Obutagatsi bukye nibutuma ekiraka ekikuzire kyakwatira aha mupiira, ekintu ky'okubanza noomanya, omupiira ogwo gugira obutagatsi bukye, vuga embiro nyinyiho kakye, kandi nikija kuyaga kirugyeho. Eego, sebo. Mwareeba?

Kandi ogwo nigwo murabanamu n'abantu baingi ebi. Nibagyezaho kuhamiza okwetegyereza kwabo aha kwetegyereza kw'ensi, na gaama nkye eya ira y'ensi, reero, okugyezibwa kwaija bagire bati, "Mbweni, shana obundi mbaire ngwire." Mwareeba? Reero omwika guhwamu, omu dakiika nkye omwika gwawe guhwamu. Okuteera akaari kwawe kwona n'okugurukyera tibiine eki byakugashiire na kakye. Abantu bakureeba waagarukira kimwe enyima omu byagaana nibyo bimwe omurundi ogundi. Mwareeba? Ekyo kihikire.

Kwonka ku oraagume aho n'obutagatsi bw'Omwoyo Orikwera oburikugasha, okuhitsya obu buraakuhindure iwe na tyubu mukaba ekintu kimwe. Nikyo ekyo. Iwe na tyubu nimuhinduka ekintu kimwe. Ku oraagume aho okuhitsya obu iwe na buri kuragaanisa kwa Ruhanga muraabe ekintu kimwe, reero ekyo okyongyere aha kwikiriza kwawe. Ku oraabe otarikubaasa, otakyongyeraho na kakye.

## 84 Noogira oti, "Ekigambo tikirikubaasa kwesiga." Ekyo otagyeyaho kukyongyeraho.

Noogira oti, "Okuragaanisibwa okuri omu, okw'okubatizibwa n'Omwoyo Orikwera, kukaba kuri okw'entumwa ikumi na ibiri zonka," nk'oku amakanisa gamwe garikugira ebi, ekyo otagyeyaho kukyongyeraho. Aho niho omusingye gwabo guri, gusheenyukire gwona, Mwareeba? Nka Uzia oku yaabaire, ekiro ekihweire, ku yaareebire omusingye gw'ogu mushaija ou yaabaire naayesiga, gwona gwasheenyuka, yaateerwa ebibembe, kikaba kitari kirungi. Hati, "N'okw'entumwa ikumi na ibiri, entumwa ikumi na ibiri zonka."

85 Nkaba ndi ifo ow'W'eishe-emwe Wright . . . ningira ngu bari enyima kuri ahantu nanka. Ekiro kimwe, hakaba hariyo omuheereza ifo okwo, nkaba ningamba, ababuurizi bana nari bataano hamwe. Omubuurizi ogu yaimuka yaagira ati, "Hati, niinyenda kubagambira ekintu bantu 'mwe abakundwa. Oo, nintekateeka ngu muri abantu barungi."

Naagira nti, nkagambira omuntu, naagira nti, "Niwe oriya-niwe ogwo oshutami hariya. Reeba."

N'ahabw'ekyo. Junior Jackson, enyima kuri, akaba yaaheza kugamba. Kandi yaagira ati . . . akaba naabuurira aha mbabazi za Ruhanga. Oo, mugyensi!

Akaba naabugumwamu omuriro, ategyereize. Yaahika aho kandi akaba naagyezaho kwetegyereza. "Hati, niinyenda kugamba ngu Omw. Branham hanu, nimbagambira, ni antikristo." Kandi yaatandika atyo, ekiro kyona.

Bamwe aha babuurizi baatandika . . . Naagira nti, "Rindaho edakiika. Hati, mutagira eki mwagamba, b'eishe-emwe. We n'omuntu omwe wenka kandi itwe turi baingi." Naagira nti, "Mumurekye hati. Yandahura." Naaba ninkyenda, nyowe nyenka, munonga, naaba ntarikumanya eky'okukora. Mwareeba?

86 N'ahabw'ekyo, yaagira ati, "Omw. Branham ni antikristo," kandi yaagumizamu naagamba buri kintu noomanya, ahari buri kintu. Yaagira ati, "Aho yaagira ati, 'Okubatizibwa kw'Omwoyo Orikwera.'" Yaagira ati, "Baiburi ekagira ngu hariho ikumi na babiri bonka abaabatiziibwe n'Omwoyo Orikwera." Arikugamba aha kutamba kw'Obwaruhanga akagira ati, "Entumwa ikumi na ibiri zonka nizo zaabaire ziine okutamba kw'Obwaruhanga." Yaagira ati, "Tugamba ahu Baiburi egamba, kandi tuhunama ahu Baiburi ehunami." Naategyereza okuhitsya obu yaabomborekaine aho kumara nk'ekicweka ky'eshaaha.

Naagira nti, "Rindaho edakiika. Mpandiikire bingi hanu," naagira nti, "Mpa omugisha gw'okugarukamu bimwe." Kandi ku naimukire, naagira nti, "Omwami ogwo, yaagira ngu 'naagamba ahu Baiburi erikumba,' ekanisa ye nikwo erikutwaza, 'kandi ehunama ahi Baiburi ehunami.' Mwena muri abajurizi. 'Eego.'" Naagira nti, "Hati, yaagira ati 'Hakaba hariho ikumi na babiri bonka abaatungire Omwoyo Orikwera.' Baiburi yangye neegira ngu bakaba bari igana na makumi abiri, abaabandize kumutunga." Amiina! Naga okwetegyereza okw'omuringo ogwo aheeru, mwareeba, oku yaabaire naagyezaho.

87 Naagira nti, "Reero ninteebereza Paulo taratungire Mwoyo Orikwera obu yaagira ngu akamutunga." Mwareeba?

Naagira nti, "Ifo omuri . . . Filipo ku yaashuumire ifo kandi akabuurira Abasamaria. Bakaba baabatiziibwe omu Iziina rya Yesu. Kureka, Omwoyo Orikwera akaba atakabaizireho. Kandi bakatuma reero bareeta Petero na Yohaana, baija ifo kandi babataho engaro, kandi Omwoyo Orikwera yaabaijaho. Ninteebereza ngu abo bakaba bari ikumi na babiri bonka?"

Naagira nti, "Omu Byakozirwe 10:49, obu Petero yaabaire ari aha mutwe gw'enju, kandi akaba yaareebire okworekwa ngu bakaba nibaza eruguru owa Kuruneelio." Petero ku yaabaire naakigamba ebigambo ebi, Omwoyo Orikwera yaabaijaho abaabaire nibahurira Ekigambo." Naagira nti, "Baiburi neekigamba. Ekanisa yaawe erahi?" Eri enyima kuri omuri nikibaasa kuba. Ekyo kihikire. Mwareeba?

Naagira nti, "Okutamba kwa Ruhanga, ogizire ngu, 'Ikumi na babiri bonka nibo baabaire baine okutamba kwa Ruhanga.' Baiburi neegira ngu Stefano akaza ifo omuri Samaria kandi yaabinga baadaimooni kandi yaakiza abarwaire, kandi haabayo okwesiima kwingi omu rurembo. Kandi akaba atari omwe ahari ikumi na babiri. Akaba atari ntumwa. Akaba ari omudiikoni." Amiina. Amiina.

88 Naagira nti, "Kandi Paulo akaba atari omwe ahari bari ikumi na babiri abaabaire bari omu kishengye eky'ahaiguru, kandi akaba aine ekiconco ky'okutamba."

Naagira nti, Reeba ebiconco by'okutamba! Kandi n'okugumizamu, emyaka makumi ashatu eyaakuratsireho, akaba akiri omu Bakorinso, naata omu buteeka ekiconco ky'okutamba endwara omu Mubiri gwa Kristo. "Oo, mugyenzi!"

Hati, ogwo muringo gw'okwetegyereza ogu oyega okuruga omu Kitabo nanka, kikaabaire kirungi okunaga omu kidebe kya kasasiro. Ija aha kwetegyereza oku. Ruhanga yaaba yaagizire ati, "Tahinduka oku abaire ari nyomwabazyo, n'eri izooba nikwo ari, kandi nikwo ariguma ebiro byona," ogire oti, "Amiina." Eego, sebo. Eego, sebo. T'ahari bari ikumi na babiri bonka; n'ahari boona. Waakutunga okwi-kwikiriza kw'omuringo nk'ogwo, okwikiriza kwawe kwakihamya, kyona, na "amiina," reero okagira oti, "Ni kirungi," Ekyo okyongyereho.

89 Ekyo kana. Twaza kurahutsyaho, ahabw'okuba ni . . . Niinyehurira kurungi munonga okwemerera hanu kandi nkakigambaho. Amiina. [Ow'eishe-emwe yaagira ati, "Nikitushemeza." -Omur.] Yee. Ekyo kana . . . Yebare.

Yongyeraho "okwerinda." Oo, mugyenzi! Twahika aha kwerinda. Hati, obaire oine okwikiriza, kubanza; nooteekwa kugira ekyo, okubanza kwa byona. Reero aha kwikiriza kwawe oyongyereho amaani, ku garaabe gari amaani g'omuringo oguhikire. Reero oyongyereho okwetegyereza, ku kuraabe kuri okwetegyereza kw'omuringo oguhikire. Hati nooza kwongyeroaho okwerinda.

Okwerinda tikirikumanyisa ngu, "reka kunywa amaarwa," hanu. Ngaaha, ngaaha. Okwerinda tikirikumanyisa omubazi gw'obusinzi, tikyo ekyo. Oku n'okwerinda kwa Baiburi, okwerinda kw'Omwoyo Orikwera. Ekyo ni kimwe aha kurigira kubi kw'omubiri, kwonka nitugamba aha kwerinda kw'Omwoyo Orikwera. Ekyo nikimanyisa, oku oshemereire kurinda orurimi rwawe, okutaba orikubuzya orukuru; oku oshemereire kurinda ekiniga kyawe, kutari kurahuka kugira ekiniga kingi ahonaaho buri kaire omuntu yaakugambaho kubi. Oo, mugyenzi!

Mwojo 'we, baangi omuriitwe baaza kugwa tutakatandikire, tikwo? Mwareeba? Haza nitwebuuza ahabw'enki Ruhanga atari omu Kanisa Ye, naakora eby'amahano n'ebantu ebi baabaire bakora.

90 Eego, sebo. Mwareeba?

Oyongyereho ebintu ebi. Obyongyereho okwerinda. Oo, okwerinda, oku oshemereire kugarukamu n'embabazi bakugambira n'ekiniga kingi. Omuntu yaagira ati, "Imwe kibiina 'mwe ky'abarikwera abeekuringa ahansi eifo okwo!" Otajumbukayo reero okafungiza emikono y'esaati yaawe hati. Mwareeba? Tikyo ekyo. Kwonka gamba na rukundo ya Ruhanga, okwerinda, obucureezi. Okwo nikwo orikwenda ngu obe? [Abateeraine baagira bati, "Amiina." -Omur.] Baakwitsa ekiniga munonga, naiwe otaabaitsa ekiniga. K'Abe eky'okureeberaho kyawe.

Ku baagizire ngu, "Ku oraabe ori Omwana wa Ruhanga, hindura amabaare aga gabe eby'okurya," Akaba naabaasa kukikora, kandi Ayoreka ngu ni Ruhanga. Kwonka akaba aine okwerinda. Ku Baamwetsire, "Belezebuli," Akagira ati, "Ekyo naakibasaasira." Ekyo kihikire? Baamfuuraho obureju bwijwire ebiganja, kandi baamucwera amacwante omu maisho, reero baagira bati, "Hanuka aha musharaba!"

Akagira ati, "Taata, obasaasire. Tibarikumanya eki barikukora."

91 Kandi obwo, Yaabaire aine ekiconco, Akaba naamanya ebintu byona, ahakuba Omuriwe hakaba harimu Obwaruhanga bwona obureebwa omu mubiri. Bakaba Baamureebire naakora eby'amahano, naagambira abantu ebishobire omuribo, n'ebindi nk'ebyo. Bakamuta ekitambaara ahamaisho nka batyo, omu maisho Ge, reero Baamuteera aha mutwe n'enkon, kandi baagira bati, "Ragura, otugambire Owaakuteera? Nitwija Kukwikiriza." Mwareeba? Akaba aine okwerinda.

Hati, ku oraabe okiine otyo, okyongyere aha kwikiriza kwawe. Ku oraabe nookiitwa ekiniga kandi noogarukamu abantu kubi, n'okuteera empaka, n'okuguubwa kubi, kandi n'okuteera orwari, ahaa, toine . . . Torikubaasa kwongyeraho ekyo, 'habw'okuba tikirkubaasa kwongyerwaho. Mwareeba? Tikirkubaasa kukwatiraho. Torikubaasa kukwata ekiraka ky'omupiira, noomanya, kandi okakibambatika aha kyoma. Tirikirkubaasa kukwataho. Ngaaha, nikiteekwa kuba ekyorobi, nk'oku omupiira guri. Mwareeba? Kandi okwikiriza kwawe n'okwerinda kwawe byaba ekintu kimwe ky'okwerinda kw'Omwoyo Orikwna oku Yaabaire aine, reero nikija kwegaita Nawe. Nooba waayongyerwa aharikyo.

92 Amaani gaawe gaaba gari nk'amaani Ge, reero nigaza kwongyerwaho.

Okwetegyeza kwave kwaba kuri nk'okwetegyezea Kwe, "Naija kukora okukunda Kwawe, Ai Ruhanga." Mwareeba? N'Ekigambo kya Ishe, Akasingura buri daimooni. Eiguru n'ensi biryahwaho, kwonka Ekigambo tikirihwaho. Mwareeba? Waaba oine okwetegyezea kw'omuringo ogwo, nikija kwegaita n'okwikiriza kwawe.

Waaba oine okwerinda kw'omuringo oguhikire, nk'oku Yaabaire aine, nikija kwegaitaho. Ku oraabe otakwine, kureka oine okw'ekicweka okugunzirwe abantu, okwikiriza kw'orujwangye, nari okwerinda, "Oo, nkaabaire nimuteera oruhi agwa ahansi, kwonka-kwonka ka murekye, 'habw'okuba nibabaasa kuta eiziina ryangye omu mpapura z'amakuru ahabwakyo." Okwo ti kwerinda oku Arikugambaho. Otagyezaho kwongyeraho ekyo. Tikirkwija kukora. Kwonka buzima ku waakubaasa, n'oburungi kuruga omu mutima gwawe, kusaasira buri muntu weena, okahunama, okakireka kikagyenda, mwareeba, obwo nikija kwongyerwaho. Ekyo noobaasa kukyongyera aha kwikiriza kwawe. Hyu!

Tiky'okutangaaza ekanisa neeburwa munonga. Ekyo tikihikire? Tiky'okutangaaza.

93 Nimbaasa kugira nti, "Mweteise mwena mubatizibwe, Baiburi nikwo yaagambire, omu Iziina rya Yesu Kristo." Kandi owa Tiriniiti enkomba otarikwikiriza ekyo, agire ati, "Antikristo owa ira ogwo. N'owa Iziina rya Yesu. N'owa Yesu Wenka." Yegyendesereze, mwojo 'we, tindikumanya okwerinda kwave hati hati. Mwareeba? Ahabw'enki otarikwija, okagira oti, "Ka tuhanuure ahari eki hamwe, Ow'eishe-emwe Branham. Nkaayenzire kuhurira Eki nikishoboororwa"? Mwareeba? N'ahabw'ekyo shuuma eifo kandi Okihurikize. Reero ku Kirikuteebwa omu maisho gaawe honyini, haza okagyenda; nitwija-nitwija kuhika ahari ekyo omu dakiika nkye, omu "okuba nka Ruhanga," mwareeba. Kwonka wa-waajumbukayo n'ekiniga, okenda kurahuka juba kucwamu amakuru g'ekyagambwa otakamanyire byona ebikikwatsireho, ahaa, ekyo-ekyo tikyo. Mwareeba? Tokagizire okwerinda kwa Baiburi waakora ekyo; oku oshemereire kugarukamu. N'ahabw'ekyo ku oraabe oine ebi byona, eki noobaasa kukyongyera aha kwikiriza kwawe.

94 Reero, bwanyima y'ekyo, ekya kana, aha kwikiriza kwawe nooyenda kwongyeraho okugumisiriza. Ku oraabe oine okwikiriza, "harugamu okugumisiriza," Baiburi nikwo yaagizire. Mwareeba? N'ahabw'ekyo, oku n'okugumisiriza. Hati, ekyo n'ekintu ekirikukurataho ekirikuza kwombeka orugyero oru. Nimumanya, Ruhanga aine ebikozeso byonyini omu Kyombeko Kye.

Nimureeba oku turikuburwa, ow'eishe-emwe, Ow'eishe-emwekaza? Mwareeba? Nimureeba ahabw'enki, ahi turi? Eego, sebo. Mwareeba? Twine ekitiinisa, twine okuteera akari n'ebindi, ahabw'okuba twine okwikiriza. Kwonka ku turuhika ahaifo aha bintu ebi hanu, Ruhanga tarikubaasa kutwombeka omu rugyero orwo. Mwareeba? Tarikubaasa. Tarikubaasa kutuhindura tukahika omu omwanya nk'ogwo. Twine ebintu ebindi ebi byona. Nitugwa, tuterera nakyo. Mwareeba? Tarikubaasa kwombeka Ekanisa Ye.

95 Okugumisiriza naki? Okugumisiriza kwa muringo ki? Ekintu eky'okubanza, n'okugumisiriza Ruhanga. Ku oraabe oine okwikiriza kwonyini, okw'amazima, noiija kugira okugumisiriza kwonyini okw'amazima, ahabw'okuba omu kwikiriza harugamu okugumisiriza. Ruhanga yaagamba ekintu kyona, okiikirize. Nikyo ekyo kyonka. Oine okugumisiriza.

Oti, "Mbwenu, Naamushabire nyomwabazyo kunkiza, kwonka n'akasheeshe aka nkirwaire." Oo, mugyenzi! Okwo n'okugumisiriza kwa muringo ki?

Ruhanga akagambira Abrahamu, kandi ahanyima y'emyaka makumi abiri n'etaano hakaba hatariho kamanyiso konna. Akaba naakiigumizamu kwikiriza. Akagumisiriza Ruhanga. Ahaa.

Mute omu maisho gaawe obutoosha. K'Abe ekintu ekirikukurataho ky'okutambuuka. Torikubaasa Kumutambuuka, n'ahabw'ekyo mugumye omu maisho gaawe.“ ”Nikwo Yaagambire, n'ahabw'ekyo nikiza kubaho.“ Mwareeba? Mugumye omu maisho gaawe. Ekyo kihikire.

96 Noa akaba aine okugumisiriza. Yee. Noa akaba aine okugumisiriza kwa Ruhanga, okw'amazima. Ruhanga akagira ati, “Niinyija kucwekyereza ensi egi n'enjura,” reero Noa yaabuurira emyaka igana na makumi abiri, nabwo. N'okugumisiriza kwingi. Tihariho nangwa n'orume orwagwire kuruga omu Iguru. Hakaba hatariho kintu kyona. Omucuucu gukaguma guri nk'oku gwabaire gutwire, kumara emyaka igana na makumi abiri, kwonka akagumisiriza.

N'ahabw'ekyo, Ruhanga agyeza okugumisiriza kwawe. Ekyo kihikire. Ruhanga naabigyeza.

Ahanyima y'okugambira Noa, hati Akagira ati, “Noa, niinyenda ngu oze omu meerি. Naaza kutaasyamu enyamaishwa, kandi niinyenda-niinyenda ngu otaahemu. Temba omuri kaanyaabiri, hati, kugira ngu obaase kureeba aheeru, omu dirisa ey'ahaiguru. Hati, niinyenda ngu otaahemu. Niinyenda ngu ogambire abantu aba otı, 'Nyencare, eki ntwire nimbuurira kumara emyaka igana na makumi abiri, nikiza kubaho.' Ni kirungi, irooko oshuumeyo kandi obagambire.”

Akamanyiso k'okubanza kakaba kari kaahi? Noa akataaha omu meerি. Hakaba hatariho njura.

97 Noa akeeteekateeka, kandi yaajwara ekooti y'enjura, kandi na buri kintu, kugira ngu abaase kureeba aheeru, rimwe na rimwe. Yaayeteekateeka. Kwonka ekiro ekyakuratiireho . . .

Niinyikiriza naabaasa kuba yaagambiire ab'eka ye, n'abakaamwana be n'abandi boona, ati, “Oo, mugyenzi! Nyencakare nimuza kureeba ekintu eki mutakareebaga. Ahabw'okuba, eiguru ryona, niriija kuba niriiragura. Kandi nihaza kubaho enkuba n'emirabyo. Rurara mpango ya Ruhanga neeza kushatura eiguru. Naaza kucwera orurbanja ebi bibiina by'abasiisi ebyatwangire, okumara egi myaka igana na makumi abiri. Imwe muhangye amaisho haza muureebe.” Mwareeba?

Bamwe aha barikwehindura abakiriza, nimumanya, abarikweziringa aho kandi bakanga kutaahamu, nimumanya. Mu-mukibaine, nimumanya. N'ahabw'ekyo ba-bakaija, baagira batı, “Noomanya, omugurusi ogu naabaasa kuba yaabaire ahikire, n'ahabw'ekyo nituza kunyegyerayo kandi tutegyereze ebiro bikye, nari tutegyereze eshaaha nkye omu kasheeshe, reero tureebe.”

98 Ekiro ekyakuratiireho, omu mwanya gw'ekicu ekirkwiragura, eizooba ryaturuka nk'obutoosha. Noa yaaranzya aheeru. Yaagira ati, “Y'eimwe, tihariho kicu kyona.”

Omushaija ogwo akaija, yaagira ati, “Aa, nkaba nimmanya ngu ori omwe aharibo. Nimureeba, ogumire nooyeziringa hanu.”

“Mbwenu, nsaasira, sebo. Ha-ha. Obundi ni-ni-ni nka, noomanya, amatwengye gonka, noomanya. Nk'abatyo, mwareeba. Ha-ha-ha.”

Kwonka, Noa, akaba aine okugumisiriza. Akagira ati, “Ku eraabe etagwire eriizooba, neeza kugwa nyencakare.” Ahabw'enki? Ruhanga akakigamba.

“Ekyo Akakikugambira ryari, Noa?”

“Emyaka igana na mukami abiri ehwiringire. Aha niho naahika, n'ahabw'ekyo ntegyererereize hanu hati.” Ekyo mwakireeba? Ahanyima y'akaanya kakye . . .

Nitushanga ngu, Ruhanga arugire hare yaahika aha, ategyereize Ekanisa, Nawe, kwonka Neija kubayo. Oteeraarikirira. Akakiragaanisa.

Tutegyereize okuzooka obwire obu bwona. Nikwija kubaho. Muteraarikirira. Ruhanga akaragaanisa okuzooka. Mutegyereze mwine okugumisiriza.

99 Waagwejegyera, ekyo tikiri ku . . . Noobaasa kugwejegyeraho kakye kutakabaireho, kwonka noiija kusisiimuka omu bwire obwo. Akaragaanisa okuzooka, nimureeba. Okugwejegyeraho kakye, mwareeba, eki turikweta okugwejegyeraho kakye kwa rufu, nimumanya. Eki turikweta okufa, okugwejegyeraho kakye, nari okugwejegyera omuri Kristo. Tihariho kintu nk'okufeera omuri Kristo. Amagara na rufu tibirkubaasa kutuura hamwe. Mwareeba? Nitugwejegyeraho kakye kwonka, oturo tukye otu banywani baitu batarikubaasa kutusisiimuramu. Niwe Ogwo wenka orikubaasa kutweta. “Naija kweta, kandi Ndyamwetaba,” Yobu nikwo yaagizire. Yobu atwire agwejegyeire hati kumara emyaka enkumi ina. Oteeraarikirira. Naija-naija kusisiimuka. Oteeraarikirira. Na hati akitegypereize.

100 Noa akategyereza. Ekiro kya kana kyahwa. Enjura tiyaagwa. Ni kirungi. Neeza kugwa.

Nimpurira muka Noa naija aho kandi naagira ati, “Taata, nookiha- . . . ?”

“Reka kugamba otyo.”

Akaba aine okugumisiriza, 'habw'okuba akaba aine okwikiriza. Eego, sebo. Akaba aine amaanii. Akaba aine okwetegyereza ngu Ruhanga ahikire. Akaba aine okwerinda. Taragizire kiniga ky'ahonaaho, ngu agire ati, "Mbweni, tindikumanya ekiriho. Okurangaanwa kwangye kwona ebiso okwo kuhweireho." Ngaaha, ngaaha. "abantu tibakinfaho bundi. Ninza kuza aheeru okwo kandi ngarukye ntandikye, busya omurundi ogundi." Ngaaha, ngaaha. Akaba aine okugumisiriza. Ruhanga akaragaanisa. Ruhanga naija kukikora. Ruhanga naija kukikora, 'habw'okuba Ruhanga nikwo yaagambire.

101 Kandi nindeeba omutabani naija aho, naagira ati, "Taata, noomanya . . ." Yaata omukono gwe omu ishokye rye riraingwa ry'enju yaarisiiisibiriza, noomanya. Kandi akaba aine emyaka amagana n'amagana y'obukuru, noomanya, ashutami aho. Yaagira ati, "Nimmanya ngu ori tatenkuru okuzire. Ni-ninkukunda, taata. Kwonka nikibaasika ngu noobaasa kuba waabaire ohabireho kakye?"

"Oo, ngaaha. Ngaaha."

"Ahabw'enki?"

"Ruhanga nikwo yaagambire!"

"Mbweni, taata, ebi n'ebiro mukaaga ebi tushutamire ahaiguru aha. Tushutamire ahaiguru aha omuri egi meeri, mpango, ekuzire, eyomire eri aha honyini. Kandi yoona esiigirwe koroto, omunda n'enyima. Kandi egi myaka yoona tugimazire nitugyombeka. Kandi okeemerera aheeru kuri reero waabuurira, okuhitsya obu waagizire enju n'oruhara. Mbweni ori hanu ahaiguru hanu hati, noogyezaho kugamba ekintu eki n'eki. Kandi abantu nibasheka, kandi nibarekyera enyaanya ezijunzire n'ebindi aha rubaju rwayo. Reeba hari eki orikukora. Ahabw'enki, noomanya . . ."

"Gumisiriza, mutabani."

"Ohamize?"

"Neeza kugwa!"

Omukaamwana yaagira ati, "Taata, noomanya . . ."

"Neeza kugwa!"

"Kwonka tutwire tutegyereize, emyaka egi yoona. Tutwire nitutebeekanisa. Kandi okatugambira saabiiti ehweire, ngu neeza kugwa. Mbweni turi omunda hanu, n'enyigi zonna zikingire, kandi turi aha nitugyendagyenda omunda hanu, n'eizooba niryokyeza kimwe nk'oku rituura."

"Kwonka neeza kugwa!"

"Nookimanya ota?"

"Ruhanga nikwo yaagambire!"

102 Hati twaba turi tutyo, tukyongyereho. Kwonka waaba otakiine otyo, ota-otagyezaho kukyongyeraho. Tikirikwija kukora. Tikirikwija kukora aha kutamba. Tikirikwija kukora aha kintu ekindi. Mwareeba? Nikiteekwa kukwatanira kimwe n'ekintu ekyo eki kijwangaine nakyo. Ekyo kihikire. Nooteekwa kukyogyeraho. Okugumisiriza okuragaanisa kwa Ruhanga. Eego, sebo. Noa akakiikiriza. Kandi akagumisiriza Ruhanga, emyaka igana na makumi abiri.

103 Musa, akagumisiriza Ruhanga. Eego, sebo. "Musa, mpuriire okutaka kw'abantu Bangye. Naareeba okubonabonesibwa kwabo. Naashuma kubacungura. Naaza kukutuma eifo."

Kandi entaaniso nkye aho rwagati ye na Ruhanga, kandi Ruhanga akamworeka ekitiinisa Kye. Yaagira ati, "Hati naagyenda." Ku yaareebire ekitiinisa kya Ruhanga ati, nooreeba, yaagira okwikiriza.

Yaagira ati, "Ekyo ekiri omu ngaro zaawe niki, Musa?"

Yaagarukamu ati, "Enkoni."

Yaagira ati, "Ginagye ahansi."

Yahinduka enjoka. Yaagira ati, "Oo, mugyenzi!" Yaatandika . . .

Yaagira ati, "Gikwate, Musa. Ku ndaabe nimbaasa kugihindura enjoka, nimbaasa kugaruka ngihindure."

Aa! [Ow'eishe-emwe Branham yaateera omu ngaro ze emirundi eshatu -Omur.] Amiina! Ruhanga ku araabe naabaasa kumpa amagara g'obutoosha, Naabaasa kumpa Amagara g'omwoyo! Ruhanga ku araabe naabaasa kumpa okuzaarwa kw'okubanza, Naabaasa kumpa Okuzaarwa kwa kabiri! Amiina! Ruhanga ku araabe naabaasa kutamba ogu, n'okutamba kw'Obwaruhanga, Naabaasa kugaruka aguzoore ahabw'ekitiinisa Kye, aha kiro ky'aha muheru. Ekyo kihikire.

“Nimbaasa kunaga enkoni egi ahansi kandi ngihindure enjoka. Nimbaasa kugihindura egarukye ebe enkoni. Ngikwate omukira.”

Musa yainama kandi yaagikwata. Ngigyo ekaba eri aho, enkoni. Obwo yaatandika kwongyeraho okwetegyereza. Mwareeba?

“Omukono gwawe gubaire ki, hati, Musa?”

“Tikiriho.”

“Gute omu kifuba kyawe.”

“Ni kirungi. Kandi shi . . .” Gwabemba gwaba mutare. “Ai Mukama, reeba omukono gwangye!”

“Gugarure omu kifuba kyawe, Musa.”

Yaagugaruramu nka batyo, gwahinduka nka . . . Yaatandika kubyongyeraho ati, obwo, mwareeba. Eego, sebo.

104 Yaahikayo ifo okwo. Kandi entaaniso y'okubanza . . . Yaashuumma ifo okwo. Yaarugayo kandi yaagira ati, “Mukama Ruhanga agizire ati, 'Reka abantu bangye bagyende.' Faraho, niinyenda ngu omanyé eki. Naija nk'omujwekyerwa wa Ruhanga. Nooteekwa kuunyorobera.”

Faraho yaagira ati, “Kukworobera? Noomanya ou nyowe ndi? Ndi Faraho. Nkworobere iwe, omuhuuku?”

Yaagira ati, “Noija kuunyorobera, nari ohwerekyerere. Noija kukora kimwe ahari ebyo eki orikwenda.” Ahabw'enki? Akaba naamanya eki yaabaire naagambaho. Akaba atumirwe. Akaba ari eifo okwo. Akagamba na Ruhanga. Akaba aine okwikiriza. Akaba naamanya ahi yaabaire ari.

“Nooyenda ngu nkworobere? Ruga aha!”

“Ninza kukworeka.”

“Nyoreka akamanyiso.”

Yaanaga enkoni ahansi; yaahinduka enjoka.

105 “Ahabw'enki,” yaagira ati, “ogwo mugyerekko gw'omufumu ogwanguhi! Mwije hanu ahabw'edakiika. Mwije hanu, Yane, iwe na Yambere, munagye enkoni zaanyu ahansi.” Bazinaga ahansi, kandi zaahinduka enjoka.

Yaagira ati, “Hati, iwe kintu 'we kitaine buryo, waija ifo hanu ahariinye, Omunyamisri, faraho wa Misri. Kandi waija ifo hanu n'emwe aha migyerekko y'omufumu yaawe eyanguhi, bimwe aha by'okubeihabeihisa byawé,” noomanya, okushoma ebiteekateeko. Nimumanya eki ndikumanyisa. Ningira ngu ekkyo nimukyetegyereza. Okwiha ekiteekateeko omu muntu okakita omu muntu ondijo nari ekintu nanka, nimureeba, yee, waija ifo hanu na bimwe ahari ebyo.“ Yaagira ati, ”Mbwenu, nitubaasa kukora ekintu nikyo kimwe eki orikukora.“

Musa akaba ari ki? Taragizire ati, “Oo, Omw. Faraho, o-onsaasire, sebo. Niinyija kuba omuhuuku waawe.” Ngaaha, sebo.

Akeemerera ahamire. Amiina. Yaagumira kimwe aho. Ruhanga yaagira ngu, ataine kubangaanisa omu mutima gwe, “Hunama, Naaza kugira eki naakworeka.”

106 Waaheza kukora eki Yaagambre ngu okore, kikareebeka nk'ekyashoba; yemerera ohamire, gumisiriza.

Musa akagira ati, “Noomanya, obu naataho omusingye ogwo, hakaba hariho okugumisiriza okwatairweho, n'ahabw'ekyo ninza kurinda reero ndeebe eki Ruhanga arikwija kukora.”

Enjoka ezikuzire zikaba ziri aho, nizeekurura, nizihuuhu, nizifuuhu emwe na ngyenzi yaayo. Ekintu ekky'okubanza noomanya, enjoka ya Musa ekagyenda, “Mira, mira, mira,” kandi zoona yaazimirira kimwe. Akaba aine okugumisiriza.

Abo abategyereza Mukama, baryagarukwamu amaani,

Batumbikye ahaiguru n'amapapa nk'empungu.

Ekyo kihikire? [Abateeraine baagira batí, “Amiina.” -Omur.] Mwareeba? Eego.

Baryairuka kandi tibariruha,

baryagyenda kandi tibarigwa nshazi.

Mwareeba, tegyerereza omuri Mukama kwonka. Gira okugumisiriza. Mwareeba?

107 Eego, sebo.

N'ahabw'ekyo Israeli ekaba neeza kwihiwayo. Entaaniso mpango zaabaho, kandi Musa yaategyereza.

Bwanyima yaahika omu ihamba. Ni nk'orugyendo rw'ebiro bishatu- nari bina- byonka. Ni mahiro makumi ana gonka kuruga ahi yaayambukiire aho, seeri ahi baagarukire kwambukira. Kwonka, Musa, omu ihamba, akarinda emyaka makumi ana. Okugumisiriza. [Ow'eishe-emwe Branham yaasheka -Omur.] Amiina. Ekyo kihikire. Akategyereza emyaka makumi ana. Oo! Eego, sebo.

108 Kandi tushemereire kugumisirizana, naitwe. Mwareeba? Rimwe . . . Tugira-tugira okutagumisirizana kwingi. Nituteekateeka ngu tushemereire kuba nka Musa. Musa akaba naagumisiriza abantu. Reeba, ekyo nikyo kyabareeteire okutabaasa kwambuka bakazayo. Mwareeba? Ku oraabe noogyezaho kugira eki waakora . . .

Nk'oku, ngyerizeho kuhitsya Obutumwa obu ahari tabirinaakuru, kureeba ngu buri memba wa tabirinaakuru yaahinduka Eki. Kigumire kukora. Ngyerizeho kugumisiriza; egi myaka makumi ashatu na ishatu. Mwareeba? Gira okugumisiriza. Abakazi na hati nibakishara amashokye gaabo, nka burijo. Kwonka gira okugumisiriza. Mwareeba? Gira okugumisiriza. Tegyereza. Nooteekwa kukugira. Ku oraabe otakwine, otagyeyzaho kwombeka ahari eki ahansi aha. Gira okugumisiriza.

109 Nangwa rimwe, obu ekyo kibiina ky'abantu abagomi kyagizire okutagumisiriza nk'okwo, bakareetera Musa kukora ekintu ekigwire. Kwonka, nabwo, ku kyahikire aha kahayano, Ruhanga akatamwa ekikorwa kyabo. Yaagira ati, "Yetaanise nabo, iwe Musa. Naaza kwita ekibiina ky'abantu aba boona, reero ntandike busya."

Akeemerera rwagati, kandi yaagira ati, "Ruhanga, otakikora." Niki? Okugumisiriza abantu abaabaire nibamugomera.

Niinyebuuza ekyo ku turaabe nitubaasa kukikora? Ku oraabe otarikubaasa, otagyeyzaho kwombeka ahari eki, 'habw'okuba tiki-tikirikuhinduka, noomanya. Ogwo nigwo muringo ogu eky'okubanza kyayongyeirwe omuri eki, kandi ogwo nigwo muringo ogu buri kimwe kishememereire kwongyerwaho. Ku oraabe otakikozire, torikubaasa kuhika aha rugyero rw'omwanya gw'obutaaho bwa Ruhanga ohuriire, ku oraabe otaine kugumisiriza, okugumisiriza, omwe na mugyenzi we.

110 Ni kirungi.

Abaana b'Abaheburaayo bakaba baine okugumisiriza. Buzima, bakaba bakwine. Ruhanga akaba abaragaaniise, yaabagira ati, "Mutariinamira ekishushani kyona." Kwonka bakaba baine okugumisiriza. Baagira bat, "Ruhanga waitu naabaasa. N'obu kiraabe, nabwo, titurikwija kwinamira ekyo kishushani kyawe." Okugumisiriza, kumanya eki, ngu Ruhanga naija kugaruka amuzoore omu biro by'aha muheru.

Amagara aga tigaine mugasho, oku kiri. Mwareeba? Ruhanga naija kugaruka agazoore omu biro by'aha muheru. Kwonka kyahika aha kwinamira ekishushani, titurikwija kukikora. Hati, Kaisaari nitwija kumuha ebya Kaisaari, kwonka, Kaisaari yaataahataaha omu bya Ruhanga, Ruhanga n'ow'okubanza.

"Ruhanga akagira ati, 'Mutariinamira ekyo kishushani.' kandi tindikwija kukikora. Ruhanga waitu naabaasa kutujuna. Ku Araabe atatujunire, titurikwija kwinamira ekyo kishushani."

Yaagira ati, "Kare, Etanuuru y'omuriro ngigyo."

"Mbwenu," yaagira ati, "oo, ninteebereza ngu, nihaza kugwa enjura nyingi ekiro eki reero eguraaze gwona." Kwonka teragwire. Nabwo baagumisiriza.

111 Akasheeshe akakuratsireho, ku baareetsirwe omu maisho g'ebikaari, Nebukadeneeza akaba ashutami aho. Yaagira ati, "Ni kirungi, boojo 'mwe mweteekateekire kuunyijuka nk'omugabe waanyu?"

"Buzima. Karamaare, Nyakusinga."

"Hati mwinamire ekishushani kyangye."

"Oo, ngaaha."

"Mbwenu, mwaza kusya. Muri abashaija abanyabwengye. Nimwetegyereza. Mutuhwereire munonga. Mubaire eky'omugisha aha bugabe bwaitu. Timurikwetegyereza ku eki ntarikwenda ngu nkikore? Kwonka naaherize kurangirira hanu, kandi nikiteekwa kukorwa. Tindikwenda kubanagamu. Oo, bashaija 'mwe, mubaire ki?

"Nimmanya ngu ekyo nikhurikika kurungi. Kwonka, Ruhanga waitu naabaasa kutujuna. Kwonka n'obu kiraabe . . ." Bakaba baine okugumisiriza.

Baatandika kugyenda nibatumba eidaara. Omwe yaareeba ondi. "Byona biri gye. Biri gye." Baine okugumisiriza. Baateera orutambo rumwe, Ruhanga akaba atariho. Entambo ibiri, akaba atariho. Entambo ishatu, entambo ina, entambo itaano, baagumizamu nibagyenda, nabwo Akaba atariho. Reero yaateerera kimwe orutambo yaaza omu tanuuru y'omuriro. Bakaba baine okugumisiriza. Kwonka Akaba ariyo. Mwareeba? Omuriro ogurikugasha kwosya gukaiha enkoba aha mikono n'ebigyere byabo, nigwo gwabahikireho. Reero ku yaagwire aha ntango y'ekiina, Ruhanga akaba ariyo. Mwareeba? Bakaba baine okugumisiriza.

112 Danieli omuringo nigwo gumwe. Danieli akaba aine okugumisiriza. Buzima. Akaba atarikuza kureka. Ngaaha, sebo. Akakora ki? Akaigura ago madirisa kandi yaashaba, oku kyabaire kiri kwona. Ruhanga akaba naakyetenga. Akaba aine okugumisiriza. Akarindirira Ruhanga, naamanya ngu Ruhanga akaba naabaasa kuhikiiriza Ekigambo Kye. Bakamunaga omu ryaya ry'entare, baagira bati, "Nitusa kureka entare zikurye."

Yaagira ati, "Ekyo ni kirungi." Akaba aine okugumisiriza. Ahabw'enki? "Mbwenu, ntegyereize Ruhanga, obwire obu bwona. Ku kiraabe nokyetaagisa kutegyereza endiijo myaka nkye rukumi, niinyija kuzooka omurundi ogundi aha kiro ky'aha mperu. N'ahabw'ekyo, akagira okugumisiriza, kutegyereza."

Paulo akaba aine okugumisiriza. Buzima akaba akwine. Reeba eki Paulo yaabaire ashemereire kukora.

113 Gamba aha kugumisiriza!

Abapentekoote bo bari bata? Obwire bwona baaba baine okuragiirwa ngu, "Mutegyereze okuhitsya obu," mwareeba, "mutegyereze okuhitsya obu muriheebwa Amaani." Okumara bwire ki? Bakaba bataine kibuuze kyona, nikija kutwara bwire ki? Bakabona eky'okugarukamu, "Mutegyereze okuhitsya obu."

Bakainamukayo baagira bati, "Ni kirungi, boojo 'mwe, obundi omu dakiika ikumi na itaano Omwoyo Orikwnera naaza kutwijaho reero nituza kutunga obuheereza bwaitu." Edakiika ikumi na itaano zaahwa, tihaagira n'omwe. Ekiro kimwe kyahwa, ngaaha; bibiri, bishatu, biina, bitaano, mukaaga, mushanju.

Bamwe omuribo nibabaasa kuba baagizire bati, "Y'eimwe. Timurikuteekateeka ngu Twamutungire?"

"Ngaaha, ngaaha, ngaaha." Nikyo ekyo. Ngaaha. Ekyo kihikire.

"Boojo 'mwe, ekirkukira oburungi mushohore." Sitaane yaagira ati, "Ni-ni-nimumanya ngu mwaherize kutunga eki murikwenda. Mugumizemu, mutandikye obuheereza bwanyu."

"Ngaaha, ngaaha, ngaaha. Titukamutungire, na hati. Ahabw'okuba, Akagira ati, 'Nihaija kwija, ekiribaho omu biro by'aha muheru: Ndyagamba n'abantu aba n'emina erikuhebebera n'ezindi ndimi, kandi oku nikwo Kuhuumura oku naagambire,' mwareeba, Isaaya 28:19." Yaagira ati, "Oku ni-oku Nikwo, ni-nimwija Kukutunga ku . . . Ahabw'enki, nitwija kukimanya ku Araije. Nitwija kukimanya ku Araije. Nitwija kukimanya, 'Okuragaanisa kwa Tata.'" Aho akategyereza ebiro mwenda. Reero aha kiro kya ikumi, "Tukaba turi aho." Bakaba baine okugumisiriza, kw'okutegyereza.

114 Hati, ku oraabe oine okugumisiriza kw'omuringo ogwo, Ruhanga yaaheza kukuragaanisa kandi okakureeba omuri Baiburi, "N'okwangye," reero ottegypereze. Reero, ku oraabe oine okugumisiriza kw'omuringo ogwo, okwongyere aha kwikiriza kwawe. Mbwenu nooreeba ahaiguru ahi waahika hati? Waahika ahaiguru aha hati. Ni kirungi. Akarimi k'eshaaha kariyo nkeetooroora, nako, tikwo? Ni kirungi. Ni kirungi. Aha kwikiriza kwawe oyongyereho eki.

Mute omu maisho gaawe obutoosha, orikwiju, ku Niwe owaaragaaniise. Tiinye, owaaragananiise. Ti muriisa, owaaragananiise, nari Ow'eishe-emwe Neville. Ti muheereza ondijo, owaaragananiise. Ti musaserdooti nari paapa. Ti muntu weena ow'omu nsi. Ni Ruhanga owaaragananiise, kandi Ruhanga naabaasa kuhikiiriza buri kintu kyona eki Yaaragananiise.

115 Ni kirungi. Ku oraabe oine okwikiriza kw'omuringo ogwo, kumanya ngu Ruhanga akakiragaanisa! Oti, "Ow'eishe-emwe Branham, ndwaire. Niinyetenga munonga kutambirwa." Kiikirize. N'ekiconco ekirkukuheebwa, eego, sebo, ku oraabe noobaasa kwikiriza. "Mbwenu," noogira oti, "niinyikiriza." Reero okyebwe. Nikyo ekyo kyonka. Kihweire. Mwareeba?

Gira okugumisiriza, ku oraabe oine okugumisiriza. Ku oraabe otakwine, oriyo noobombooka nooruga aha Kyombeko eki hanu, mwareeba. Nikiza kugwisa ebendi byona ebi kibinagye ahansi, ekintu ekyo kimwe. Ekyo nooteekwa kukigira. Otakyongyeraho, ahabw'okuba, nikija kugwisa ekyombeko kyawe ku oraabe otaine kugumisiriza, ku oraabe otaine amaani g'okwongyera aha kwikiriza kwawe oku orikugira ngu oine. Kandi ku oraabe otaine kwikiriza kwona, haza okagyezaho kukwongyeraho amaani, nigaija kusheenya okwikiriza kwawe. Mwareeba? Noogira oti, "Mbwenu, hati, rindaho edakiika. Obundi egi yoona n'enshobe, oku biri kwona. Obundi Ruhanga tari Ruhanga, obundi tihariho Ruhanga." Mwareeba, nikija kucwamu ekintu eki ebicweka bibiri. Mwareeba?

116 Kwonka ku oraabe oine okwikiriza kw'amazima, obwo okwongyereho amaani g'amazima, bwanyima okwetegyereza kw'amazima, bwanyima okwerinda kw'amazima, bwanyima okugumisiriza kw'amazima. Mwareeba? Nooyeyongyera kugyenda nooza ahaiguru aha musitaari. Ni kirungi.

Ekyo kataano, yongyeraho okutiina Ruhanga. Oo, mugyensi! Okwongyeraho okutiina Ruhanga. Okutiina Ruhanga nikimanyisa ki? Naareebire omuri zaakashoborozi ina nari itaano kandi tinaabaasize n'okutunga amakuru gaakyo. Aha muheru, mbaire ndi ow'Ow'eishe-emwe Jeffery okwo, twakishanga omuri-omuri kashoborozi emwe. Okutiina Ruhanga nikimanyisa "okuba nka Ruhanga." Oo, mugyensi! Waaheza kutunga okwikiriza, amaani, okwetegyereza, okwerinda, okugumisiriza, bwanyima obe nka Ruhanga. Hyu!

Noogira oti, "Tindikubaasa kukora ekyo, Ow'eishe-emwe Branham." Oo, eego, Noobaasa.

Ka mbashomere Ebyahandiikirwe bikye hanu, nk'edakiika. Matayo 5:48. Nituza kutwara eki tureebe oku kirikugamba, Matayo 5:48, kandi tureebe ku oraabe oshemereire kuba nka Ruhanga. Noomanya Baiburi neegira eti, "Muri baaruhanga." Yesu nikwo yaagambire. Ahabw'enki? Amaani goona, ebintu byona ebiri omuri Ruhanga, biri omuriwe. Matayo 5:48, "Mube . . ." Yesu arikugamba, abaine omugisha oku bari.

N'ahabw'ekyo mube a-b-a-h-i-k-i-r-i-i-r-e, (Ekyo niki?) abahikiriire, nka Shoimwe . . . omu iguru oku ahikiriire.

Waahika ahaiguru aha hati, otakashabirwe kukora ekyo. Ebintu ebi byona nibiteekwa kubanza byayongyerwaho. Reero waahika ahaiguru aha, Naakushaba hati kuba ohikiriire, kuba nka Ruhanga, batabani na bahara ba Ruhanga. Ekyo kihikire. Ka n'ebintu bingi ebi naakubaasa kugamba nka batyo!

117 Ka tubikuure omu kitabo ky'Abaefeso 4, reero tureebe hanu, omu Kitabo ky'Abaefeso, eki kirikugamba aha kintu eki, nakyo, oku tushemereire-oku tushemereire kukora. Abaefeso, eshuura ya 4, n'okutandikira aha mushororongo gwa 12. Abaefeso 4, kandi tutandikire aha mushororongo gwa 12. Ni kirungi. Reka tutandikire hanu aha mushororongo gwa11.

Kandi akaha abamwe kuba entumwa, abandi baanabi, . . .

Nimwijuka nyomwebazyo ekiro? Otagyezaho kutwara obuheereza bw'ondijjo. Mwareeba?

. . . abandi ababuurizi b'engiri, abandi kuba abariisa . . . n'abandi abeegyesa,

"Kugira ngu Ruhanga abe ohikiriire"? Nikishomwa kityo? [Abateeraine baagira bat, "Ngaaha." -Omur.] Okuhikirira kwa baahi? ["Abarikwera."] Abarikwera ni baahi? Abo abeeziibwe. Amiina. Abo abaatandikiire ahansi hanu.

[. . . kugira ngu abarikwera babe abahikiriire ahabw'okukora kw'obuheereza] (obuheereza bwa Yesu Kristo), babone kwombeka omubiri gwa Kristo (ahabw'okwombeka, Naagwombeka, kugwombeka), okuhitsya . . .

Okuhitsya obu twena turihika aha kugira obumwe bw'okwikiriza, n'o . . . aha kumanya Omwana wa Ruhanga, okuhitsya obu turiba abantu (bahikiriire), tukahika aha buhame, (oo, mugyenzi) obw'orugyero rwa Kristo oruhikire:

118 "Okuhikiirira," nokyetaagisa okutiina Ruhanga. Nooteekwa kwongyera aha kwikiriza kwawe, okutiina Ruhanga. Mwareeba, nootandikira ahansi hanu, n'amaani. Reero oze aha kwetegyereza. Reero oze aha kwerinda. Reero oze aha kugumisiriza. Hati ori aha kutiina Ruhanga. Okutiina Ruhanga! Oo, mugyenzi! Obwire bwaitu nibuhwayo. Ka tureebe. Kwonka nimumanya okutiina Ruhanga eki kirikumanyisa. Mweshongoire ekyeshongoro eki:

Okuba nka Yesu, okuba nka Yesu,

Omu nsi niinyetenga kuba nka We;

Omu rugyendo rwona rw'amagara kuruga omu nsi kuza omu Kitiinisa

Ninshaba kuba nka We knownka.

Okwo n'okutiina Ruhanga. Ku Baamuteire aha mushaya gumwe, Akahindura ogundi. Ku Baamugambiire kubi, Taragambire. Tarabagwereirwe kubi. Mwareeba? Okutiina Ruhanga, obutoosha naasherura ekintu kimwe, "Obutoosha nkora ebirikuschemeza Tata." Mwareeba? Eego, sebo. Obutoosha. Okwo n'okutiina Ruhanga.

119 Mwareeba?

Waaheza kuruga hanu, okahika hanu, okahika hanu, okahika hanu, okahika hanu, okahika hanu, hati oriyo nootaaha omu rugyero orwiyire hati rw'Omwana wa Ruhanga. Kwonka nooteekwa kugira eki, kugaitaho ebi byona, kandi torikubaasa nangwa n'okutandika otakatungire eki.

Hati oijukye ekirikwiragura ekiine amapapa ga nyamunyonyi. Mutakyebwa. Mwareeba? Otagyezaho kukyongyeraho okuhitsya obu buzima oraazaarwe obwa kabiri. Habw'okuba, iwe, tikirikuza kukora, kandi to-torikubaasa kutuma kyakora. Nikiija kuhika ahari eki, nari eki hanu, nikiija kukumbagara ahantu nanka.

Kwonka waashuumu okahika ahansi hanu, enkombe ey'amazima ezairwe obwa kabiri, obwo torikwongyeroaho kintu kyona. Nikikweyongyeraho, mwareeba, okura, ni kirungi, otaaha omu kuhikiirira hati.

120 Ni kirungi.

Bwanyima, ekya mukaaga, ka twongyereho, Baiburi hanu ekagamba, okwongyeroaho okukunda ab'eishe-emwe . . . okukunda ab'eishe-emwe. Hati, ekyo n'ekintu kirungi, hanu honyini, ekya mukaaga, mushanju. Ni kirungi. Okwongyeroaho okukunda ab'eishe-emwe. Ni kirungi. Ku turaahikye ahari ekyo, okukunda ab'eishe-mwe, oyete

omu mwanya Gwe, aha kintu ekyo. Hati noogira oti . . .

“Mugyenzi wangye akanshagiza,” Petero nikwo yaagizire. “Musaasire,” yaagira ati, “mpitsye emirundi mushanju omu izooba?”

Yaamugira ati, “Makumi mushanju emirundi mushanju.” Mwareeba?

Okukunda ab'eishe-emwe. Hati, nooreeba, ow'eishe-emwe ku araabe atarikwikirizana naiwe na kakye, omugumisirize. Mwareeba? Ngaaha. Mwareeba? Mugire embabazi. Gumizamu, n'obu kiraabe.

121 Omuntu omwe akagamba, enshumi nkye ehangwire, yaagira ati, “Noobaasa ota kwikiriza ebantu ebi omu muringo ogu orikubiikirizamu, haza okagumizamu noozza omu ba Assemblies of God, hamwe n'omu ba Oneness, n'abandi boona?” Reero oyongyereho, mwareeba, okukunda ab'eishe-emwe. Mwareeba? Mwareeba? Oine amatsiko, ekiro kimwe, mwareeba; omugumisirize, mwareeba; okwerinda, kumwehangaanira; okwetegyereza, okumanya eki arikwikiriza, ijuka, kiri omu mutima gwe, ekyo nikyo kiri; amaani, omuriwe, kugareka gakakorera hamwe n'embabazi, n'obucureezi, ahariwe; oine okwikiriza ngu ekiro kimwe Ruhanga naija kumutaasyamu. Mwareeba?

Okukunda ab'eishe-emwe, ekintu ekya mushanju. Kimwe, bibiri, bishatu, bina, bitaano, mukaaga, mushanju. [Ow'eishe-emwe Branham yaateera aha rubaaho emirundi mushanju -Omur.] Mwareeba, ekintu ekya mushanju. Reero, hati, waija.

Ekintu ekirkukurataho, reero, oyongyeraho kukunda, niyo rukundo. Eryo niryo eibaare ry'aha katungu. Kimwe omu biro ebi, omu kanisa . . .

122 Hati, nyaabura 'mwe, ka kimanywe aha rutambi rw'amaraka, n'ahandi hoona, eki tindikukyegyesa nk'enyegyesa, eki naaza kugamba hati. Kureka niinyenda kubooreka ngu, ahabw'okuhwerwa Ruhanga, buzima eki kiri, ngu, Baiburi ey'okubanza ei Ruhanga arahandiikire ekaba eri Zodiaka omu kaabunga. Neetandika n'omwishiki oshugaine. Neehereeruka na Leo entare. Kandi ku ndaahikye omuri ako Kamanyiso ka Mukaaga n'aka Mushanju, noozza kushanga ngu, obwire obu Akamanyiso ako akandi kaabambwirwe, akabonero ka zodiaka k'omwanya ogwo kakaba kari ekookoro, eby'enyanja ebirabanisiibwemu. Kandi obwo n'obusingye bw'ekookoro obu tutwiremu hati, obushuurwirwe. Kandi ekindi kintu ekirkukurataho eki Akamanyiso kaabambwireho, Kakashuuura Leo entare, Okwija kwa kabiri kwa Kristo. Akaija, okubanza, aha mwishiki oshugaine; naija, ogwa kabiri, Leo entare. Eki niinyija kukireeta ahari . . .

Hati, tindikumanya ku ndaabe ninza kutunga obwire akasheeshe aka. Ninza kukora kyona eki ndikubaasa, kubooreka ngu amatembezo aga gari omuri zaapiramidi, buzima kwo, Baiburi ya kabiri ei Ruhanga yaahandiikire. Enoka akazihandiika, kandi yaazita omuri piramidi.

123 Kandi ekya kashatu, obutoosha Ruhanga ahikiirira omuri ishatu, n'ahabw'ekyo Akekora We wenka Ekigambo Kye.

Hanu, hati, ijuka, omuri piramidi . . . Ninteebereza baingi omuriimwe abaserukare n'abandi mukaba muri omuri Misri. Piramidi teine kifundikizo aha mutwe gwayo. Tekakigirahoga. E-Eibaare rya Scone, na buri kintu kyona eki baine, kwonka nabwo . . .

Ku oraabe oine enooti ya doola omu nshaho yaawe, iwe reeba aha nooti ya doola egoy, kandi noiija kushanga ngu, aha mukono gwa buryo, hariho empungu hamwe n'ebendera ya Amerika. Kandi hahandiikirweho ngu, akamanyiso "k'Amerika." Aha rubaju orundi, hariho piramidi, n'eibaare rihango ry'aha katungu hamwe n'eriisho ry'omuntu. Aha rubaju oru hahandiikirweho ngu, "Akamanyiso kakuru." Mbwenu, eri ku riraabe riri ihanga ry'amaani, ahabw'enki akamanyiso kakuru aka katarikuba akamanyiso k'eihanga? Ruhanga naatuma baaha obujurizi, n'obu baakuza hi.

124 Rimwe nkaba ningamba na dokita, kandi akaba naanjumiirira munonga, aha kikwatsire aha kutamba kwa Ruhanga. Tukaba twemereire omu ruguuto rw'omu tauni. Yaagira ati, “Omw. Branham, noobuzabuza abantu kwonka.” Yaagira ati, “Tihariho kukira endwara, kureka okurabira omuri baadokita.”

Kikabaho naahinduka, naareeba akamanyiso akari aha motoka ye, hakaba hariho egoy njoka ehanikire aha muti. Naagira nti, “Kikaabaire kirungi ako kamanyiso okaiha aha motoka yaawe, kyaba kiri kityo, 'habw'okuba akamanyiso kaawe konyini nikahamya ngu Ruhanga n'omutambi.”

Dokita w'amazima ekyo naakiikiriza. Abo ni baadokita b'ebikwangara. Eego, sebo. Enjoka aha muti! Musa akahanika enjoka aha muti. Yaagira ati, “Niinye Mukama orikutambira endwara zaawe zoona.” Kandi bakareeba ahari egoy njoka, ahabw'okutamba kwa Ruhanga. Kwonka nabwo nibakihakanisa; kandi obwo akamanyiso kaabo konyini nikabashinja. Hyu!

125 Hanu, eihanga ryaitu, nibagamba ebantu ebi barikugamba, kandi nibashekyerera ebantu ebi, haza kunu esente zaabo, empiilha zaabo, nizihamya ngu akamanyiso k'ensi n'okwijura kwayo ni Ruhanga. Nimureeba eriisho eryo eriri ahaiguru aho, ahari egoy nooti ya doola? Ako niko kamanyiso kakuru.

Tirikateebwahoga ha mutwe gwa piramidi. Tibarabaasize kwetegyereza ahabw'enki. Eibaare ry'aha katungu rikangwa, Omutwe, Kristo. Kwonka Riryaija, ekiro kimwe.

126 Hati, omu kwombeka, amaani . . . Kwombeka ekiijutsyo eki, kwombeka orugyero oru, mwareeba, nirutandika n'eibaare ry'omusingye; okwikiriza, amaani, okwetegyereza, okwerinda, okugumisiriza, okutiina Ruhanga, okukunda ab'eishe-emwe. Hati nikikora ki? Mbwenu bategyereize eibaare ry'aha Mutwe, niyo rukundo, ahakuba Ruhanga ni rukundo. Kandi Ruhanga naategyeka, kandi Niwe maani ga buri kimwe aha bintu ebi byona. Ekyo khikire. Eego, sebo.

Hanu honyini, hanu honyini, nimureeba nyine, rwagati, emirimo egi yoona hanu, kandi hanu ebingonzi bikye ebi nibija. Ekyo niki? Omwoyo Orikwera naashuma ahansi, okurabira omuri Kristo, mwareeba. Omwoyo Orikwera! Omwoyo Orikwera ari ahaiguru y'ebi byona, kugaita hamwe ebi, kwombeka (ki?) Ekanisa ehikiriire, ahabw' Eibaare ry'aha Katungu Kugifundikira.

N'enki ekigarukire kukorwa? Kyeiorekyeire kurabira omu Busingye Mushanju bw'Ekanisa, n'omu ntumwa mushanju z'Ekanisa.

127 Kikatandikira enyima hanu. Okubanza Ekanisa ekatandikira nkahi? Okubanza Ekanisa y'abapentekoote ekatandikira nkahi? Ekatandikwa Paulo Orikwera, omuri Efeso, enyonyoozi y'Obusigye bw'Ekanisa ya Efeso, Efeso.

Obusigye bw'Ekanisa ya kabiri bukaba buri Sumuruna. "Amaani." Irenaeus, omushaija w'amaani owaashagikire Engiri ya Paulo.

Obusingye bw'Ekanisa obwakuratsireho bukaba buri Perugamo, owaabaire ari Martin. Martin akaba ari omushaija w'amaani owaagumireho. Paulo, Irenaeus, Martin.

Reero omuri Suatira haija Kolumba. Nimwijuka? Nkiki hanu, kitairwe ekishushani hari. Kolumba. Bwanyima ya Kolumba . . . Obusingye bw'Omwirima aho bwataahamu.

Bwanyima haija obwa Saadi, ekirikumanyisa okufa. Luther. Haleluya! N'enki ekirikurataho? N'enki ekyakuratsireho bwanyima ya Saadi, Luther?

Reero haija Filadelufia. "Okutiina Ruhanga." Wesley, oburikwera! "Ohikiriire aba ohuriire ahabw'okwikiriza," Luther nikwo yaagizire. Okweziibwa kurabira omuri Wesley.

Reero hataahamu okukunda ab'eishe-emwe, kurabira omuri Laodikea. Kandi nitwikiriza Obutamwa bukuru obw'okureebeka kwa kabiri kwa Eliya, omu biro by'aha muheru, nibwija kubuga ensi.

128 Nikyo ekyo, Obusigye Mushanju bw'Ekanisa, entambo mushanju. Ruhanga yaaba naayombeka Ekanisa Ye, ni nk'omuntu omwe ori omu muntu okwe, Omuriwe wenka. Ekitiinisa, Amaani ga Ruhanga, nigashuma kurabira omuri eki, Kugigaita hamwe. N'ahabw'ekyo, Abapentekoote abaarugire omu Baaluteeri, bakaruga omu ba Wesley n'abandi, tibarikumanya eki barikugambaho. Nimureeba, bakatuura omu kicweka eki kya hekalu. Ogwo nigwo muringo, abantu abamwe nibabaasa kwija bahikye ahaiguru nk'aho reero bagwe. Kwonka hariho ekicweka eky'amazima kyakyo, ekirikuguma nokyombeka ekyombeko ekyo nokyeyongyeraho. "Ndyagarura busya," nikwo Mukama arikugira.

Nimwijuka Omuti Omugore? Nimwijuka eishomo aha Muti Omugore? Bikagurya Byagumaraho, kwonka Yaagusharira. Bakataho amataagi g'ebigombe by'amadiini; Yaagatemaho. Baimutsya ekanisa endijo, amatagi g'ebigombe by'amadiini; Yaagatemaho. Kwonka omutima gw'Omuti ogwo gukagumizamu nigukura. "Kwonka omu mwabazyo Omushana guryajwa." Mwareeba? Obwo nibwo Kristo yaija, Omwoyo Orikwera. Obwo Yesu naashuma kandi Ashutame We wenyini nk'Omutwe gw'Ekanisa, kandi Naija kuzoora Ekanisa egi, ahabw'okuba n'Omubiri Gwe gwonyini. Omunda hari nimwo Omubiri guri.

Kandi omuringo ogu Ruhanga arikutwetaagisa kukura omuntu okwe, nigwo muringo ogu Areetsiremu Ekanisa Ye kugira ngu ekure. Buri busingye bw'Ekanisa, Neeba Ekanisa emwe mpango.

129 Mwareeba?

abantu aba bakaba batarikushabwa kuba eki aba bari. Eki kikaba kitarikwetaagisibwa eky'eki kyabaire kiri. Mwareeba? Kwonka Akombeka Ekanisa Ye omu muringo nigwo gumwe. Akombeka Ekanisa Ye-Ye omu muringo nigwo gumwe ogu Arikwombekamu abantu Be. N'ahabw'ekyo Petero hanu naagira ati, eky'okubanza, ebintu mushanju: okwikiriza, amaani, (mwareeba, kweyongyera ahaiguru), okwetegyereza, okwerinda, okugumisiriza, okutiina Ruhanga, rukundo y'ab'eishe-emwe, yongyeraho okukunda ab'eishe-emwe, reero rukundo ya Ruhanga. Omwoyo Orikwera, Kristo omu buntu bw'Omwoyo Orikwera, naakwijaho, omu kubatizibwa kw'amazima okw'Omwoyo Orikwera, reero nooba oine ebintu ebi byona biteirweho akamanyiso omuriwe. Reero, Ruhanga naatuura omu Ihema, erirkwetwa Ekyombeko, Eihema erihuriire ry'omwanya gwa Ruhanga ohuriire kutuuramu.

130 Omuntu yaaba aine ebintu ebi byona, obwo Omwoyo Orikwera naamwijaho. Tindikufayo, noobaasa kugamba omu ndimi, noobaasa kutooreza ekiconco kyona eki Ruhanga aine. Noobaasa kukora ekyo. Kwonka ebintu ebi hanu byaba bitakakutaahiremu, nooba okiri hare n'omusingye gwonyini, gw'okwikiriza ogw'amazima. Kwonka

ebintu ebi byakurira omuriwe, kandi kiri okyongyeire ahari kiri, obwo ori ekyombeko ekihuriire. Ori ekishushani ekihuriire, ekirikugyenda.

Kwonka, noomanya, a-abatarikumanya Ruhanga, bajuumara omu maisho g'ekishushani ekirikuramibwa, eki barikuteekateeka ngu ni ruhanga. Kandi omu omuringo gw'okuteebereza ogu baikiriza ngu ogwo ou bateekateeka ngu ni ruhanga abagarukamu. Obwo n'obutamanya Ruhanga. N'enkora ya Rooma. Bainamira abahikiriire ba buri muringo n'ebindi byona. Kandi baine Cecelia Omuhikiriire, ruhanga w'enju, n'ebindi bintu bingi munonga nk'ebyo ebitari bimwe. Babiinamira, kandi buzima bakiiriza omu buryo bw'okuteekateeka kwonka. Ka-ka n'ekirikushushanisa, kya Ruhanga ohuriire ow'amazima.

131 Kwonka itwe, atari omu muringo gw'okuteebereza, twajumara omu maisho ga Ruhanga ohuriire, amaani agahuriire, okwetegyereza okuhuriire, okugumisiriza okuhuriire, okutiina Ruhanga okuhuriire, Amaani agahuriire agarikuruga ahari Ruhanga ohuriire, nigakora omuntu ohuriire ekishushani ekihuriire omu rugyero rwa Ruhanga. Naakora ki? Ebintu nibyo bimwe ebi Yesu yaakozire; naatambura omu muringo nigwo gumwe ogu yaatambwiremu, naakora ebintu nibyo bimwe ebi Yaakozire. Ahabw'okuba, ti kintu ky'okuteebereza. Hariho ekiraho ekirikuhamya.

Nimureeba eki ndikumanyisa? Nimureeba oku ebintu ebi, ebikozeso ebi by'okwombekyesa, nibishushanisa entumwa z'Ekanisa, hamwe n'obusigye bw'Ekanisa? Hati, kimwe omu biro ebi, nituza kukwata buri kimwe aha bigambo ebi, kandi tubyegyeho, kandi tworekye ngu nikikihamya. Byona nibigyenda hamwe. Buzima. Mwareeba? Oo, mugvenzi! Ekvo ka nikitangaaza, mwareeba, kureeba eki-eki kirikukora.

132 Hati, egyo niyo Nju ei Ruhanga atuuramu; kitari kyombeko ekiriho ekide kihango aha mutwe gwakyo, hamwe n'omunaara muraingwa. Mwareeba? "Kureka Okanteekatekyera Omubiri," Omubiri ogu Ruhanga arikubaasa kutuuramu, Ruhanga arikubaasa kugyenderamu, Ruhanga arikubaasa kureeberamu, Ruhanga arikubaasa kugambiram, Ruhanga arikubaasa kukoreramu. Amiina! Ekikozeso kya Ruhanga ekihuriire, Ruhanga arikugyendera aha maguru abiri, omuriwi. Ekitiinisa! Ebigyere by'ohikiriire byebemberwa Ruhanga, "Ruhanga arikutamburira omuriwi. "Ahakuba muri ebaruha ezihandiikirwe, ezirkushomwa abantu boona." Kandi Amagara agari omuri Kristo ku garaabe gari omuriwi, noi ja kugira Amagara agu Kristo yaabaire aine.

133 Nk'oku ntuura ningamba. Twara amashanda g'omuti gwa peach, kandi ku waakubaasa kugafurura, okagata, omu muti gwa apo, omuti gwa apo gukaayana ebijuma by'omuti gwa peach. Buzima. Buzima nigwija kwana ebijuma ebyo. N'obu amatagi gaakuba nigashusha ki, gwine amashanda g'omuti gwa apo omurigwo, mwareeba, nainga kyona eki omuti ogwo guri. Mwareeba? Omu muti gwa apo ihamu amagara gaagwo, goona ogaihemu, kandi omuri ogwo muti otetu a-amashanda agandi, reero ogaihe omu muti gwa peach ogate omu muti gwa apo. Nihabaho ki? Tigurigaruka kwana bijuma by'omuti gwa peach bundi. Mwareeba? Ngaaha, sebo. Tigurigaruka kwana ebyo bijuma. Amagara g'omuti gwa peach ku gaaza omu muti gwa apo, nimmanyisa, tigurigaruka kwana bijuma bya apo bundi. Nigwija kwana ebijuma by'omuti gwa peach, mwareeba, mwareeba, ahaw'okuba gwine amagara ago omurigwo.

134 Mbwenu, twara eky'okureeberaho kyaitu, tituri kintu kureka omutanga gw'omu ishwa, ebiragi, mwareeba, kandi titurimu kantu, ahakuba twena tufeereire omu bibi byaitu n'omu by'okushiisha byaitu. Twena turi omu mbeera nk'ezi. Reero itwe, itwe twenka, nitubaasa kujuumara, tweheyo, okuhitsya obu Ruhanga araakwate orushekkye Rue rw'okurabyamu, Eiziina rya Yesu Kristo, 'habw'okuba, "Tihariho rindi Iziina ahansi y'Eiguru erirkubaasa kujuna abantu," kandi akakwata Amagara ga Kristo akagata omuriitwe. Bwanyima tugire okwikiriza okw'omuringo ogu, okwikiriza oku Kristo yaabaire aine. Kandi okwikiriza kwa Kristo kukaba kutahamiire omu Bafarisayo, nari Abasadukaayo nari omu nyungu zaabo, ebinika, n'esafuriya, kandi n'okwozya kwabo. Kukaba kuhamiire aha Kigambo kya Ruhanga, amiina, munonga munonga, okuhitsya obu Kristo yaabaire ari Ekigambo, Ekigambo kyahinduka omuntu. Reero ku twakubaasa kwijuzibwa munonga n'Amaani Ge, kuhitsya obu okuteekateeka kwaitu kuraafe, kandi n'okwikiriza kwaitu kukaba okwikiriza kw'amazima, haleluya, obwo Amagara ga Kristo nigaba gatairwe omuriitwe. Nituba ebihangirwe ebihuriire bya Ruhanga, omwanya gw'okutuuramu ogu Omwovo Orikwera arikubaasa kurabyamu amaranzi g'emigisha Ye, reero tukaba omu rugyero rwa Kristo.

135 Yesu akagira ati, "Tikirahandiikirwe? Nimuncwera orubanja, ahabw'okugira ngu, 'Ndi Omwana wa Ruhanga.' Tikirahandiikirwe, ngu, 'Muri baaruhang'a.' Ebiragiro byanyu byo byonka tibirikugira bityo?" Nka Musa, nka Eliya, nka baanabi abo abaatwire haihi munonga na Ruhanga, okuhitsya obu Ruhanga We wenka yaataahiire kimwe omuribo. Kandi bakagamba, atari ahabwabo bonka, kureka Ruhanga. "Mutaryemereza emitima ebi murigamba, 'habw'okuba tiimwe murigamba. Ni Tata otuura omuriimwe; Origamba." Ebigambo bye t'ebye ahabwe, ahabw'okuba, amagara ge, gakafa.

136 Waafa, noiha eshagama omu muntu, omwomya kugira ngu atajunda. Akabi kakyo ni ngu, baangi omuribo tibakoomaga kugira ngu batajunda. Waiha eshagama omu muntu, naafa. Reero ekintu kyonka eki orikukora n'okugaruka kumutamu eshagama endijio; naija kugaruka abe ohuriire. Eshagama ye ogijhiremu.

Kandi hati tuteiremu Eshagama ya Yesu Kristo, mwareeba, kandi ekyo nikireeta okwikiriza kwa Yesu Kristo, amaani ga Yesu Kristo, okwetegyereza kwa Yesu Kristo, okwerinda kwa Yesu Kristo, okugumisiriza kwa Yesu Kristo, okutiina Ruhanga kwa Yesu Kristo, kukunda ab'eishe-emwe kwa Yesu Kristo, na rukundo ya Ruhanga, niwe Yesu Kristo. Niwe Mutwe kandi naakutegveka. Kandi ebigvere bwaje nigwo musingye okwikiriza. Amiina!

Kutegyekwa Omutwe, kutwara e . . . ? . . . Nikyo ekkyo. Ngugwo omuntu ohikiriire wa Ruhanga, yaaba aine ebintu ebi.

137 Bwanyima, Ruhanga, naayoreka Ekanisa Ye nk'Omugore, omukazi. Ruhanga Naayoreka Ekanisa Ye nk'Omugore. Kandi omuringo ogu Arikureetamu buri muntu okwe okuba omwana We, kutaaha omu Mugore ogwo, nawe Areetsire Omugore okuraba omu busingye, [Ow'eishe-emwe Branham yaateera aha rubaaho rwe rw'okuhandiikaho emirundi mushanju -Omur.] okuhitsya obu Araareete Ekanisa egi ejiwire omuri eki.

Ebigyere byangye bigyenda. Ahabw'enki? Ahabw'okuba omutwe gwangye nikwo gurikugira. Hati, tigurikubaasa kugyenda nk'omukono gwangye, ahabw'okuba n'ebigyere byangye. Luther tarikubaasa kukora ebintu ebi twakozire, n'obu bakuba aba Metsodisiti, ahabw'okuba bakaba bari ekindi kintu. Mwareeba? Ebigyere bigyenda ahabw'okuba omutwe nikwo gurikugira. Kandi omutwe tigugira guti, "Hati, bigyere 'iwe, hinduka omukono. Kutu 'we, hinduka erisho." Mwareeba?

Kwonka, buri busingye, Ruhanga ataire ebintu ebi omu Kanisa Ye, kandi yaabishushanisa naabyoreka ngu buri muntu okwe aine ebi, aine ebintu ebi. Kandi Eki, kyaheza kwijura, niyo Kanisa ya Ruhanga erikuza kugyenda omu Kutwarwa. Kandi n'omuntu ogu, oijwire, n'omuheereza wa Ruhanga, omu Kanisa ya Ruhanga, orikuza kugyenda omu Kutwarwa. Ekitiinisa! Nooreeba eki ndikumanyisa? Nikyo ekkyo. Nkikyo aho omu bwijwire.

138 Hanu haija omuntu, Paulo, arikutaho omusingye. Irenaeus yaatandika kugushukaho eki. Owaakuratsireho yaashukaho eki. Owaakuratsireho yaashukaho eki. Owaakuratsireho kiri, na kiri, na kiri, kandi n'okugumizamu okushuumma kuhika aha busingye bw'aha muheru. Kwonka niki? N'Omwoyo omwe.

Omwoyo niwe omwe otuura omuriinye, naagira ati, "Mikono 'mwe, mukwate egoy shanduukye." Omwoyo niwe omwe naagira ati, "Bigyere 'we, teera orutambo." Nimureeba eki ndikumanyisa?

N'ahabw'ekkyo, orugyero rwona rw'obuntu bwawe nirutegyekwa kandi nirwebemberwa ebintu ebi, kwonka tirurikubaasa kutegyekyerwa kimwe okuhitsya obu ruraagirire kimwe ebintu ebi.

139 Eki oraakihuriireho? Hati ka nkugambire eki. Kandi eki . . . Eki okite omu kutu kwawe okurikuhurira. Mwareeba? Okujegajega kw'orujengyere nigo maani gaarwo. Ekkyo kihikire. Okworoba kwarwo nigo maani gaarwo.

N'obu ebi byakuba byombekirwe n'amaani bita, eki kyombekirwe; kyaba kiine ahu kiteeraniire aharikujegajega, aho niho kirikusheenyuka. Kandi okuguma kwakyo tikukaakira aharikujegajega ahu kiteeraniire aho. [Ow'eishe-emwe Branham naayoreka aha kishushani kye eki ateire aha rubaaho -Omur.] Hati ku oraabe oine, waagira ngu oine eki, eki, eki, otaine eki, aho niho kirikusheenyuka. Ku oraabe oine eki, haza otaine kiri, aho honyini niho kiraije kusheenyuka. Waaba oine eki, kwonka otoine kiri, nikija kusheenyuka. Eki, haza otoine eki, nikija kusheenyuka. Eki, haza otaine eki, nikija kusheenyuka. Mwareeba? Kandi ku oraabe ota . . . Torikubaasa kugira eki otaine eki.

N'ahabw'ekkyo waaheereyo kimwe amagara gaawe, obwo Omwoyo Orikwera naayeshuka araba omuriwi, omu bintu ebi, reero nooba hekalu ehuriire. Reero abantu nibareeba kandi bagira bat, "Ogu n'omuntu oijwire amaani, okwetegyereza (naikiriza Ekigambo) okwerinda, okugumisiriza, okutiina Ruhanga, okukunda ab'eishe-emwe, oijwire rukundo y'Omwoyo Orikwera. Mwareeba, ngugwo aho, naagyendagyenda." Niki? Orugyero oru abatarikwikiriza barikubaasa kureeba kandi bakagira bat, "Ngugwo Omukristaayo. Ngugwo omushaija, nari omukazi, orikumanya eki arikugambaho. Tokareebahoga omuntu w'embabazi, murungi, orikukirayo kutiina Ruhanga."

140 Otairweho akamanyiso. Akamanyiso nikareebeka embaju zombi. Waaba noogyenda nari noija, nooreeba akamanyiso ako kamwe. Nkikyo aho. Mwareeba? Omushaija nari omukazi yaagira eki, obwo Ibaare ry'aha katungu nirishuumma kandi ribataho akamanyiso omu Bukama bwa Ruhanga, niwe Mwoyo Orikwera.

Bwanyima Ekigambo, ekirikuruga Hanu, kyeyoreka Kyo kyonka okurabira omuri buri kimwe omu bintu ebi, mwareeba, kandi kikora omuntu ogu Hekalu ya Ruhanga ohuriire, eky'okureeberaho ky'Obukristaayo ekihuriire, ekirikutambura. Eki Kristo yaabaire ari, abantu aba nikyo bari, ahabw'okuba Amagara Ge gari omunda hanu. Bari omuri Kristo. Kandi amagara gaabo gakafa kandi gasherekirwe omuri Kristo, kurabira omuri Ruhanga, kandi gaakomerwamu n'akamanyiso k'Omwoyo Orikwera. Abakorinso y'Okubanza 12. Ekkyo kihikire. Mwareeba? Nooyebara nk'ofiire, bwanyima ozaarwe okwikiriza. Reero amaani n'ebintu ebi ebindi nibikwongyerwaho okuhitsya obu orikuba ekishushani ekihikiriire, ekihuriire kya Ruhanga.

141 Ekkyo ti kirungi? [Abateeraine baagira bat, "Amiina" -Omur.]

Reero Ruhanga, okurabira omuri ekkyo, areetsire nabwo Obusingye Mushanju bw'Ekanisa, kworeka entambo mushanju ezi Yaareetsire, kwombeka omuntu We kumuta omu kishushani Kye, Ayombekire Ekanisa Ye ejiwire omu kishushani Kye. Kandi aha kuzooka, Omubiri ogu ogwijwire nigwija kuzoorwa, kuntu Nawe ebiro byona, ahabw'okuba n'Omugore. Mwareeba? N'ahabw'ekkyo ekkyo nikitaaha omuri buri busingye, buri busingye oburikwija.

Kandi hariho bingi munonga ebirkwetaagisibwa, mwijukye. Nimwijuka eki Paulo yaagambire hanu omu

kitabo ky'Abaheburaayo 11? Ka ngire eki naabashomera hanu tutakaherize, nk'edakiika. Reero ni . . . Kiri nk'ekirikutuma waayehuriram u nk'okutari kw'obutoosha ku ndi . . . burijjo, ku nshoma eki. Naaza kushoma Abaheburaayo 11, kandi naaza kutandika omushororongo gwa 32.

Nyongyereho ki, mbwenu ngambe mpitsye hi? Ahakuba omwanya gukaampwaho, ku naakuza kugamba ebya Gedeoni, . . . Baraki, . . . Samusooni, . . . Yefusa, . . . Daudi na Samueli . . . baanabi:

Abaasingwire obundi bugabe ahaw'okwikiriza, abaakozire eby'okuhikiirira, abaahairwe ebyaraganisiibwe, abaabumbire eminwa y'entare,

Abaaraize ekibabo ky'omuriro, abaakizire obwogi bwa rurara abaarugire omu bweremwa, bakatunga amaan, abaahindukire amamanzi omu ngamba, aba . . . engabo z'amahanga agandi.

Abakazi bakagarurirwa abafu baabo abaazoirwe . . . Abamwe bakateerwa ez'okubaita, bakateerwa ez'okubaita, batarikwenda kurekurwa, ngu nyentsya babone kuheebwa okuzooka okurikukira oburungi.

Ahaifo hanu buzima, mwareeba? [Ow'eishe-emwe Branham naayoreka aha kishushani kye ekiteirwe aha rubaaho -Omur.] Ni kirungi.

Abandi (bakagyezibwa) . . . bakashekyererwa (kubi munonga), . . . bakaashwa, (yee), abandi bakabohwa . . . n'enjegyere, . . . omu bihome;

Abandi baateerwa amabaare, baasharwamu habiri n'emisimeeno, abandi bakarengwa buzima, baitwa . . . zaarurara, abandi bakazengyerera bajwaire empu z'entaama n'ez'embuzi, baconcoboize, nibabonabonesibwa, nibaitwa kubi;

(Abu ensi etaraschemeire ngu bagituuremu:) . . .

Mwareeba, omu bigambo ebiri omu bugo, ebi mwareeba omuri Baiburi zaanyu.

. . . nibazengyerera omu mahamba n'omu nshozi, nibaraara omu maaya n'omu biina omu itaka.

. . . abo boona, n'obu baraabe baahamiibwe ahaw'okwikiriza kwabo, . . .

Hanu! [Ow'eishe-emwe Branham naayoreka aha kishushani kye ekiteirwe aha rubaaho-Omur.]

. . . n'obu baraabe baahamiibwe ahaw'okwikiriza kwabo, tibaratungire bi baaraganisiibwe, (Mwareeba?)

Ahakuba Ruhanga akatuteekatekyera ira ekirikukira oburungi, ngu barekye kuhikiirizibwa, itwe tutariho.

142 Mwakyetegyereza? Abantu aba abaafire, omunda hanu, niitwe beegamiire kandi niitwe bategyereize. N'ahaw'ekyo, Ekanisa egi, neeteekwa kuhika aha kuhikiirira, kugira ngu habeho okuzooka. Kandi bari ahansi, emwoyo eri ahansi y'eitambiro, etegyereize Ekanisa egi kuhika aha kuhikiirira Kwayo, obwo nibwo Kristo aryaija.

Kandi Ekanisa egi, nimureeba, neeyeyonygyera kuba nkye, omu bukye. [Ow'eishe-emwe Branham naayoreka aha kishushani kye ekiri aha rubaaho -Omur.] Eshongoize munonga okukira aho, kwonka ekyo nkaayenzire kukihandiika aho, mwareeba. Yaahika aha mutwe gw'empitirizo. Okuhitsya obu, Ekanisa, omu bukye, neeteekwa kuhika omu mwanya okuhitsya obu burabe obuheereza nibwo bumwe nk'obu egi yaatsigire, ahaw'okuba, Eibaare eri ry'aha mutwe ku riraagarukye.

Riine akarikushusha nk'akashaho hanu, ahu ririkuza kushutama omunda aho honyini, ahari piramidi ya burijjo. Ti kifundikizo kwonka ekirikushutama aha mutwe, n'akantu kakye akarikugaita hamwe ebyo bibiri kandi nikateekwa kushutama aho, ahaw'okuba nikashuka amaizi.

Kandi ku riraije, Ekanisa egi neeteekwa kutyazibwa.

Ebi byona, amabaare agandi omu piramidi, garambiire kurungi munonga okuhitsya obu otarikubaasa kurabya akagirita rwagati yaago, gaine oburemeezi bwa zaataani, agatairwemu aho. Oku baagatembeze eruguru okwo, tibarikumanya. Kwonka zikombekwa.

Kandi ahaiguru hanu, Ekifundikizo kya piramidi ku kiraije, piramidi Yonyini, Omubiri gwa Kristo guryateekwa kutyazibwa. Ti nk'enyikiriza y'ediini emwe kwonka nari enyengyesa, nainga ekindi kintu eki turikurabiram u. Eryateekwa kubeera kimwe munonga nka Kristo, okuhitsya obu, ku Araije, We n'obuheereza obwo biryateeranwa bihamibwe hamwe. Mwareeba? Bwanyima haryabaho Okutwarwa, okutaaha Omuka.

143 Reeba ahi tutwire hati, omuri Laodikea, ahu ekanisa yaabaire eri obusingye bw'ekanisa oburukukirayo obubi obu baragizire. Omuri Baiburi, nitushanga ngu, nibwo busingye bw'ekanisa bwonka obu Ruhanga yaabaire ari aheeru y'ekanisa, naakongoota, naagyezaho kugaruka omu kyombeko Kye ahabwe. Enyikiriza z'amadiini n'ebigombe by'amadiini bikaba nangwa Bimunagire aheeru y'ekanisa Ye. "Reeba, Nyemereire aha rwigi nindukongoota niinyiguza. Omuntu weena ku araagire eiriho kandi akaigura orwigi, Niinyija kutaahamu, ndye nawe." Mwareeba? Nkiki hanu, omu busingye bw'ekanisa obu. Bakamunaga aheeru mporampora, kuhitsya obu hanu Baamubingire kimwe. Tibarikwenda kugira kakwate Nawe.

Hati nimureeba eriizooba ahi turikuza. Nangwa n'obwire bw'aha muheru bw'Obusingye bw'Ekanisa ya Laodikea bubaire obw'emikoro munonga, okuhitsya obu bwo n'Obukatoriki, obwagiihireho omunda hanu honyini, nibyeteerana hamwe n'okwegaita nk'ekanisa emwe nkuru. N'okwegaita kw'amakanisa, nikyo kimwe nk'Obukatoriki.“

144 Hariho entaaniso emwe yonka, ku baakubaasa kugiirkizanaho, egyo n'okushembera. Ekyo nikyo kintu kimwe kyonka omu bureeberezi, eki-eki-ekizibira Obukatoriki n'Obupurotesitante kwegaita, n'omuringo gw'okushembera. Ekanisa Enkatorika neegira eti, “N'omubiri.” Kandi ekanisa y'Abapurotesitante neegira eti, “Nikishushanisa omubiri.” Abakatoriki nibagihinduramu misa. Misa ni, ngu, nibashembera, baine amatsiko ngu basaasiirwe. Abapurotesitante nibashembera ahabw'okwikiriza, nibasiima Ruhanga, omu kushembera, ngu basaasiirwe. Abapurotesitante nibagira ngu, “Tusaasiirwe.” Abakatoriki nibagira bat, “Twine amatsiko ngu tusaasiirwe.” Misa hamwe n'okushembera. Nibagyeta misa; itwe nitukyeta okushembera. Misa n'okugira amatsiko ngu nikwo kiri. Okushembera n'okumanya ngu nikwo kiri, reero Okakimusiimira. Mwareeba? Kandi ekyo nikyo kintu kyonka eki batarikubaasa Kwikirizanaho. Baryakikora.

145 Oo, nikireebeka kiri kirungi munonga. Eryayegaita, kugumizamu . . . Erya-Eryagumirizamu kimwe e . . . Mbwenu, Baiburi ekagira eti, “Kandi enyamaishwa ezi zikaha maraaya amaani gaazo,” mwareeba, baayegaita hamwe. Mwareeba? Buzima nk'oku Baiburi yaagambire ngu baryakora, nibakikora hati. Kiriyo nikigyendera kimwe omu maisho, saabiiti egi yonyini. Tikugira ngu nyine eki ndikufa n'Abakatoriki, nk'oku ntakiine n'aha Bapurotesitante.

Imwe Bametsodisiti 'mwe n'Ababaputisiti, na baingi omuriimwe Abapentekoote, obu amakanisa gaanyu gataahire kimwe omu kwegaita kw'amakanisa oku, kunu bombekire akabafu kahango kuri omuri New York, ak'okwo kwegaita kw'amakanisa, nikyo kimwe nk'omu Kibiina ky'Amahanga Ageeteeraine n'ebindi. Nibagyezaho kugaita Obupurotesitante bwona hamwe.

Hati, Abakaturiki baine obwengye ahari ekyo, kandi nibaza kureeta Papa Yohaana ogu owa makumi abiri na bashatu, nimmanyisa makumi abiri na babiri, ou ari weena. Naagyezaho, omu muringo ogw'ahansi, gw'obucureezi, kugaita hamwe enyikiriza z'Apurotesitante zoona n'enyikiriza y'Abakatorika kuba enyikiriza emwe, ekintu kyonyini eki Baiburi yaagambire ngu nibaija kukora. Nikyo ekyo. Kandi Abapurotesitante kikabahabisa, kyarimwe.

Ahabw'enki? Ahabw'enki? Ahabw'okuba tibaine ebintu ebi. Okwetegyereza, “Ekigambo kihikire.” Okugumisiriza, “Abo abategyereza Mukama.” Mwareeba eki ndikumanyisa?

146 Nka bishopu ogwo w'Abamesodisiti eki yaagambire ekiro kiri, ekyo obu baraakirabyaho. Kandi buri omwe naamanya, oku, ekyareetsireho ekyo, kugyezaho kutandikaho eshaara nanka y'okugambira omu kanisa, nimanyisa omu ishomero. Kandi bakaba nibenda ku . . . Ninteekateeka ngu kikaba kiri ekitabo ky'okushaba ky'Abapuresibateeri, nainga ekindi kintu, kandi abazaire baahababira ei-ei-eishomero eryo ahabw'okuba bakaba batarikwikiriza eshaara egi kugambirwa omu ishomero. Kandi bishopu ogu w'Abametsodisiti akaba ari omuntu okuzire oine obwengye, akeemerera yaagira ati, “Ekyo kigwire.” Yaagira ati, “Nikhakanisa amateeka.” Akeetegyereza embeera yaakyo. Yaagira ati, “Nk'omu kanisa yaitu ya Metsodisiti,” yaagira ati, “Om'u kanisa yaitu ya Metsodisiti,” yaagira ati, “abantu baitu abaangi nibagamba aha bikorwa ebirikuhemura bya Hollywood, kandi ebicweka makumi mwenda na bitaano ahari igana byabo baza kubireeba oku biri kwona.

Ahabw'enki? Bakaruga ahari eki. Buzima kwo. Ekyo bakakirugaho.

147 Nkaba ningambira o-o-omukuru w'emwe omu makanisa agarikukirayo obuhango g'Abametsodisiti agari omu Rurembo rwa Falls, omu kishengye eki kyonyini hanu, ekiro kiri, emwe aha makanisa g'Abametsodisiti agarikukirayo kuba ag'omwoyo agari omu Rurembo rwa Falls. Kworeka ngu, obusingye bw'Abametsodisiti oburikwija nibukuratira obusingye bwaitu aho, obw'Abapentekoote. Kandi yaagira ati, “Omuri St. Louis, Missouri, bakacondooza, nk'ameezi ashatu nari ana agahingwire, kandi baamanya.” Omushaija ogwo naabaasa kuba ashutami aha akasheeshe aka. Mbwenu, n'owaapataine orikwombeka eki, orikutwimukiza ekyombeko. N'owa, Main Street Metsodisiti, ahi ow'eishe-emwe Lum n'abandi yaabaire ari omuriisa. Mbwenu hati nitushanga ngu, omuri ekyo, niinyikiriza ngu omu kucoondooza bikaba biri ebicweka makumi mushanju n'omushobo ahari igana by'Abametsodisiti, ngu, okucondooza omuri St. Louis, kukooreka ngu ebicweka makumi mushanju n'omushobo ahari igana by'Abametsodisti bakaba bari abareetsi, kandi ebicweka makumi mukaaga na munaana ahari igana aharibo nibanywa amarwa. Omumetsodisiti! Kandi eky'okutangaaza kikaba kiri ngu, okucondooza ku kwahweire, nainga okugyeragyeranisa abakazi n'abashaija; abakazi, bikaba biri makumi mushanju, ebicweka makumi mushanju n'omushobo ahari igana, nk'aha bicweka makumi ataano ahari igana by'abashaija. Abakazi baangi nibareetsa kandi nibanywa amarwa okukira abashaija. Ebicweka makumi mushanju ahari igana, ebicweka makumi mushanju n'omushobo ahari igana, abakazi baangi okukira abashaija.

148 Hati ku twakuza omu Nyegyesa ya Baiburi y'okujwara zaasikaati ngufu munonga, n'okushara amashokye, n'ebindi nk'ebyo, mwareeba, aha kutiina Ruhanga, abakazi abarikwatura ngu nibatiina Ruhanga kandi n'oburikwera? Zaakaada z'amagyenyi n'ebindi byona, abarikubuzya orukuru, abarikugambira eryo, abatarikubaasa kurinda orurimi rwabo. Orurimi rwabo nirugamba kandi nirubuzya orukuru, kandi nibagyendagyenda. Kandi shi abashaija bo? Kaada z'amagyenyi, emizaano ya gorufu, aheeru okwo bari

nk'abajwaire busha, bajwaire obujwaro bugufu obugubire kandi oburikureebeka nk'obukuzire, n'abakazi abo bafiire kwemerera aheeru aho. Ti ky'okutangaaza!

Nimureeba obwo burimanganya obwakozirwe ahari ogwo mubuurizi, omubuurizi w'omu bihome, akasheeshe aka? Eego, sebo. Tindikwikiriza ngu omushaija ogu aine omushango gw'ekyo. Kikakora ki? Ogwo n'ow'eishe-emwe . . . Tindikubaasa kwijuka . . . [Omwe yaagira ati, "Dan Gilbert." -Omur.] Yee. Dan Gilbert, omubuurizi w'omu bihome. Omushaija ogwo ku yaataahiremu kandi akaita Dan, hanu ameezi makye agahingwire, kandi hati omukazi we n'ow'okuzaara omwana. Hataraho kubangaanisa, Dan akafa, omwana tibarikubaasa kumutamu eshagama hati. Ogwo mukazi naagira ngu Dan akamuhamba, kandi ngu ogwo ni . . . "Ogwo n'omwana wa Dan." Ekintu nka . . . Ekyo tindikubaasa kukiKiriza nk'oku ntarikwikiriza ngu e-e-ekikoona kiine amooya g'enkombe. Ngaaha, sebo. Niinyikiriza ngu n'ekishuba. Niinyikiriza ngu Dan Gilbert akaba ari omushaija wa Ruhanga. Kandi niinyikiriza ngu obwo n'oburimanganya bwa Sitaane.

149 Nk'ekintu ekyo eki barikugyezaho kukora aha kushaba. Bishopu okuzire ogwo w'Abametsodisti-w'Abametsodisti akaba ari omunyabwengye ekirikugasha kwetegyereza ekyo. Kuri yaabaire naabaasa, kuri ekyo kyarabiremu, ekyo kikaabaire kireetsirweho ekindi kintu. Ekyo kihikire.

Nk'omurabanamu ogu gw'okushoroora omu rangi eifo omuri Bukiizi bwa buryo, ekintu nikyo kimwe. Niinyikiriza ngu abantu bashemereire kugira obugabe. Niinyikiriza ngu eihanga eri nirishagika obugabe. Tindijunaana Omw. Kennedy ahabw'okwohereza amahe eifo. N'obu kiraabe, tindi o-o "orikwejwanzya musya," kandi tindi owa Demokurati. Tindi owa Repaburikaani. Ndi Omukristaayo. N'ahabw'ekyo . . . Kwonka tindikwikiririza omuri ekyo. Tindikwikiriza ngu abakyotera bashemereire kuguza obukuru bwabo ahabw'ebintu nk'ebyo, nari ekindi. Kikaba kiri-kikaba kiri ekibiina eky'aba Repaburikaani. Eshagama ya Abraham Lincoln ekashumuruura abantu abo ahabw'okuba akaba ari omuntu orikutiina Ruhanga. Nintekateeka ngu haakiri bashemereire kugumira kimwe omu kibiina kyabo ku baraabe nibaza kuteera akaruru.

Kwonka nimbagambira ekintu kimwe, omwojo ogwo akaba atari eifo okwo ahabw'okuba ngu, amashomero gaabo. Omwojo ogwo n'enzaarwa ya Amerika. N'Omunyamerika. Obu n'obugabe bw'abantu boona. Erangi y'omuntu teshemereire kureetaho entaaniso. Twena . . . "Ruhanga," akagira ati, "akahanga, abantu b'omu mahanga goona, omu shagama emwe."

150 Twena turi omuntu omwe. Kwonka, omwojo ogwo, akaba ari omuserukare. Ni kahonaho. Akarwanira ekihikire. Akaba aine obugabe bw'okuza omu ishomero. Ekyo kihikire. Kwonka akaba aine amashomero maingi agu yaakubaasize kuzamu.

Nikwo ekyo kiri. Ku orikukicondoza, n'ebintu by'ebibiina by'amadiini by'ebiro ebi eruguru okwo, ebirukireeta. Ahabw'enki? Nibaiha oburuuru bw'abakyotera omuri Repaburikaani babuta omuri Demokurati, kandi omuri ekyo nibaguza obukuru bwabo. Nikwo kiri buzima. Omwoyo Orikwera tari hanu . . .

"K'ogwo oine obwengye." "K'ogwo oine okwetegyereza." Buzima. Nk'ekanisa egi, obusingye obu, nibwetunda. Timurikureeba ekirikuza kubaho?

Tindikufayo eki ku kiraabe nikikwatwa aha rutambi rw'amaraka. Nkiki hanu kyaija. Ahaa. Yee. Ni nshonga ki? Omukaikuru wangye akaba akira kugamba ati, "Sitaane gihe ebyayo."

Hariho omuntu omwe owaakozire ekintu kimwe kyonka ekyabaire kiri eky'obwengye, ogwo akaba ari Castro eifo okwo. Eego, sebo. Akashuma eifo okwo. Kandi abakapitolisiti bakaba baine ebikaijo byona n'ebindi byona. Bo, kiri aha mutindo gw'ezabu, nka Amerika. Akakora ki? Akagura egyo migabo yoona. Yaatunga esente omu muringo gwona ogu yaabaire naabaasa. Bwanyima akakora ki? Akagingirira esente, reero yaazihaanisa. Yaazigarura. Ekyo nikyo kintu kyonka eki eihanga eri ryakubaasize kukora.

151 Mukahurira Life Line akasheeshe kari? Ahabw'enki, nimumanya, ni nk'oku waakuguza emigabo y'aha zaabu. Emigabo baaherize kugitwara. Kandi gavumenti egi eriho hati neeshohoza esente ahabw'enki? Ahabw'esente z'emishoro ei baraije kushoroza emyaka makumi ana okuruga hati. Rihweire. Egyo ni Life Line kurugira kimwe omuri Washington D.C., omu ihanga ryona. Emishoro ei barikushohoza, kandi nibagyezaho kugura ez'aheeru. Mpaho, nibakozesa oku baabona kwona. Timurikureeba? Ekyo nikyo kyonyini ekibari-ekibarikuza kukora. Mwareeba? Niki? Hati, eihanga eri esente ku ziraarihwereho kimwe, ekintu kyonka eki ririkubaasa kukora n'okuburirwa kimwe sente. Ekintu kyonka eki ririkubaasa kukora n'okyena.

Ekyo nikyo kintu kyonka eky'obwengye ky'okukora, kuhindura esente. Kwonka tibarikwija kukikora, ahansi y'obutegyeki obu. Ekanisa Enkatorika ya Rooma eine ezaabu y'ensi yoona. Kandi eki barikuza kukora n'okuguza, "Abashaija abatungi aba," n'ebindi "ab'ensi," nk'oku Baiburi yaagambire. Nibaija kukora ki, batakafereirwe? Kampuni y'etaabe ya Brown na Williamson, abaingi omuriyo n'Abakatoriki, oku kiri kwona. Kandi n'ebindi bintu ebi byona, nibaija kukora ki? Ekyo nibaija kukiKiriza, kandi nibaija kwiha esente ahari Rooma, reero niriba ryaguza obukuru bwaryo bwonyini. Rooma neerishagika. Eego, sebo. Eryarishagika. Kandi nibabaga ekiragiyo ekirikugasha hati, nibatunga ebirikubamara, yaaba naareetamu akakiiko ke k'abategyeki. Reeba eki Omw. Kennedy arikushaba.

152 Kandi ku mureebire eki, ekiro kiri, tihariho kyetengo ky'okuteera akaruuru bundi. Nimugasho ki gw'okuteera

akaruuru? Kunu, baakitaire omu rupapura rw'amakuru, kandi bakakihamya omu maisho g'abantu, kandi bakanga kugira eki baakikoraho kyona. Kunu, bakihamize ngu ebyoma omu ihanga ryona bikateebwaho, ngu bakatoorana Omw. Kennedy ahabw'okwiba akaruuru. Baiburi teragambire ngu aryataahamu okurabira omu kubehabeih? Buzima, oburimanganya. Hati, tindikuhakanisa ekibiina kya Demokurati nk'oku ntarikuuhakanisa ekibiina kya Repaburikani, kureka ningamba amazima kuruga omuri Baiburi. Ni mugasho ki gw'okuteera akaruuru? Nibamanya oraije kurabamu.

153 Ni bangahi omuriimwe abarikwijuka omu makuru ga televijoni ahu baabaire baine abakazi babiri beemereire? Omwe akagira ati, "Ninza kuteerera Omw. . ." Niimanyisa, omukazi w'Omupurotesitante akagira ati, "Ninza kuteerera Omw. Kennedy."

Baagira bati, "Ahabw'enki?"

Yaagira ati, "Ahabw'okuba ninnekateeka ngu n'omunyabwengye okukira Omw. Nixon. Naija kuba Purezidenti murungi."

Reero yaagira ati, "Ogu n'omukazi Omukatoriki. 'N'oha ou orikuza kuteerera?!"

Ogwo mukazi yaagarukamu ati, "Ndi Omukatoriki, Omukatoriki wa Rooma, Omukatoriki omwesigwa." Yaagira ati, "Ninza kuteerera Omw. Nixon."

"Ahabw'enki?"

Yaagira ati, "Ahabw'okuba, ninnekateeka ngu Omw. Nixon naaza kuba Purezidenti murungi ahabw'okuba aine obumanyi omu bintu. Naamanya ebya Komyunizimu." Omukazi ogwo akabeih.

154 Nyine E . . . eki barikweta, The Facts Of Our Faith, ekitabo ekirikukirayo obukuru ky'Abakatoriki ekirikubaasa kugurwa. Kandi omunda omwo nikigira kit, "Ku haraabe hariho Omukatoriki oyetsimbire, orikuhanaya n'Omupurotesitante; Omukatoriki yaateerera Omupurotesitante akaruuru, nibabingwa omu kukwatanisa kw'ekanisa Enkatorika." Kihikire. "Kandi ku haakuba hariho Abakatoriki babiri abarikuhananira ofiisi emwe, nibaija kutooranamu Omukatoriki omwesigwa munonga omuri 'nyinekelezia' reero babateerere akaruuru."

Nimureeba oku, okwo kubehabeih, eki barikugyezaho kukora? Kuhayo sente, kugura. Ahabw'enki? Nibagyezaho kughenda. Kandi nibakikora, kandi teine sente. Kandi niki? Eri aha mutindo gw'ezaabu. Kandi ekanisa Enkatorika, abakuru b'ediini abatendekirwe, ni bakama b'ezaabu y'ensi yoona. [Omwe yaagira ati, "Doola biriyoni igana na makumi mukaaga na munaana." -Omur.] Biriyoni igana na makumi mukaaga na munaana. Nkikyo aho.

155 Nikija kurigarurira kimwe enyima aha mutindo gw'ezaabu, kandi bantu 'mwe murinde amaka gaanyu n'ebintu, kwonka muri ab'ekanisa Enkatorika. Eihanga n'ery'ekanisa Enkatorika. Ekintu kyona kihindukiire kimwe enkwatwa omunda omwo nka batyo, kurabira omu sente zaabo. Ekyo tikyo Baiburi erikugamba? Ekyo nikyo kishushani eki Baiburi erikutuha.

Eki ndikugyezaho kugamba, ow'eishe-emwe, ekiro eki. Nibaija kugira bati, "Ekyo nikija kugihindura Ekanisa nungi. Neija kugaita Obupurotesitante." Nikireebeka kiri kirungi aha maisho g'obutoosha, kwonka obwengye bw'ensi egi n'obusHEMA ahari Ruhanga.

"Kandi kikashemeza Ruhanga, okurabira omu-omu bushema bw'okubuurira, kujuna abo ababuzire, okurabira omu ofiisi y'Obwaruhanga ei Yaataire omu Kanisa Ye, kwombeka Ekanisa aha bintu ebi by'Omwoyo kwonka atari aha kintu kyona ekikwatiraine n'ensi."

156 Petero akagira ati, "Kandi ahabw'okuba mukaruga omu kujunda kw'ensi okurikureetwa okwetenga esente, n'okwetenga obwire burungi, n'eb'y'okweshemeza, n'okurya, n'okunywa, n'okwetenga oku twine. Ebyo mukabirugamu. Kandi hati mwombekirwe omu magara. Ekyo ninkigambira Ekanisa," nikwo yaagizire. Nkikyo aho. Mwakishomire? Mwakyetegyereize? Mwakihuriire obu tukishomire enyima hanu omuri Petero ya Kabiri? Hurira eki arikugamba hanu, oku kihandiikirwe kurungi hanu, oku ari-ariukigambaho. Ni kirungi. Muhurikize oku arikugamba. Ni kirungi.

Nyowe Simooni Petero, omuhuuku kandi entumwa ya Yesu Kristo, naabahandiikira imwe, . . . abaahairwe okwikiriza kw'obuguzi bwingi nk'okwaitu, omu kuhikiirira kwa Ruhanga waitu kandi Omujuni waitu, Yesu Kristo;

. . . n'obusingye byo-byongyerwe omuriimwe omu kumanya Ruhanga na Yesu (Kristo) Mukama waitu.

Ahakuba tureebire ngu-ngu amaani g'obwaruhanga bwe gakatuha ebintu byona . . .

N'oha orikuza kuhungura ensi n'ebintu byona? [Omuntu yaagira ati, Abarikwera. " -Omur.] Buzima. "Kiine akakwate . . . Yee. Ni kirungi.

. . . ebishemereire amagara n'okutiina Ruhanga ahabw'okumanya Ogwo owaatweteire ekitiinisa kye kutaaha omu kindi kitinisa,

Ebyamureeteire kuturagaanisa eby'obuguzi bwingi . . . kandi ebikuru munonga, ngu ahabw'ebyo (muherize kuruga) omu kujunda (Muhurukize ekkyo.) okw'omu nsi okurikureetwa okwetenga okubi, mubone kukwatanisa na Ruhanga omu buteeka bwe.

157 Okwetenga esente, okwetenga ebintu bihango, okwetenga ekitiinisa, ebintu ebi bikafa aha mwikiriza. Titurikufayo. Eihema nari enju nkye y'okutuuramu, ahabw'enki ninfayo; yaaba nguma ndi ohuriire nari yaaba nfa, kurohama nari kutwarwa amaizi? Eki nikyo kintu eki ndikutaho omutima, obukama bwa Ruhanga. Yaaba ndeeberera eka yangye, yaaba mbaisaho ab'eka yangye, yaaba ndeebereera eki kiri kyona, ka ngumye Kristo, amatsiko g'Ekitiinisa kyaitu.

Nyombeka, Ai Mukama, omuri Eki. Ka Kristo abe Omutwe gwangye, akorere omuriinye. Aha musingye gwangye, okwikiriza kwangye okuri Omuriwe, ka amaani, okwetegyereza, okwerinda, okugumisiriza, okutiina Ruhanga, n'okukunda ab'eishe-emwe, bikorere omuriinye, Ai Mukama, nikwo kushaba kwangye. Tindikufayo; yaaba nguma ndi ohuriire nari yaaba nfa, okurohama nari okutwarwa amaizi; ekigombe ky'ediini, hatariho kigombe ky'ediini; omunywani nari hatariho omunywani. K'Ekyo kikorere omuriinye, k'amaani ga Kristo, okwetegyereza Kwe, bihimintikye, kugira ngu mbaase kwegyesa abo.

“Ahakuba Ruhanga akata omu Kanisa, entumwa, baanabi, abeegyesa, abariisa, n'ababuurizi b'engiri, byona ahabw'okuhikiiriza n'okureetamu ebintu ebi, ahabw'okwo kuhikiirira kw'Okwija kw'Omwana wa Ruhanga.”

158 Buri rimwe omu mabaare aga n'ekicweka ekirugire ahari Ogu. Eki n'ekicweka ky'Eki. Buri kimwe aha bintu ebi n'Ekyo, kandi nibyeshuka okuruga Omuriwe, kushuma kurabira omuribyo. Amiina.

Ni shaaha mukaaga. Byona nibiza hi? Amiina. Nimumukunda? [Abateeraine baagira bat, “Amiina.” -Omur.] Ekyo nimukiikiriza? [“Amiina.”] Muhurikize, 'mwe abaana abato.

Ow'eishe-emwekazi Kidd yaagizire ati, akasheeshe aka, “Ow'eishe-emwe Bill, tindikumanya yaaba ninza kugaruka kukureeba.” Ekyo kikenda kuunyita. Mwareeba? Naateekateeka ngu akuzire munonga, kandi niko ari. Nkashaba Ruhanga kuba akimurekireho n'Ow'eishe-emwe Kidd, obwire burasingwa.

Reka mbagambire, titurikumanya obwire obu turaaze kumara hamwe. Tindikumanya obwire obu ndaamare naimwe. Ruhanga naabaasa kuunyeta kuruga omu nsi. Naabaasa kuunyetera ogundi murimo gw'okuheereza. Naabaasa kukweta kuza ahandi hantu. Titurikumanya. Kwonka, reka tu-tukwate. Tutaikiriza eki kikaturabaho. Reka ekyo tukitware.

Nkikyo aho, omuri Baiburi. Nkiki hanu, nikishushanisa ebindi byona. Kandi kuri nintunga obwire bw'okukikora kwonka! Torikubaasa kukikora omu kiro kimwe. Ekyo nimukimanya. Kwonka, nikibaasa kumbira hamwe ekintu kyona hamwe!

Mureebe, ku twaherize kuraba omu butumwa obwo kuriya, nimureeba eki Omwoyo Orikwera yaakozire aha kisiika aho, timurakireebire? Ni bangahi abaabaire bari hanu obwire obwo? [Abateeraine baagira bat, “Amiina.” -Omur.] Mwareeba? Buzima! Akashuumira kimwe, yaateera ekishushani ky'ekintu nikyo kimwe, ogwo Maraika wa Mukama.

159 Mwareeba, n'amazima. Mutaikiriza ngu kibarabeho. Mukiramatreho, baana 'mwe. Ekyo mukihamireho. Mwijukye, aha kwikiriza kwanyu mwombekyeho, amaani, okwetegyereza, okugumisiriza!

Hati, hanu, ninteekateeka ngu mbaire nyine orupapura hanu, ku ndaabe ntaagira ahi naarunaga obu naaba nimbuurira. Nduru hanu honyini. Yebare, ow'eishe-emwe. Yebare. Munonga. Ku oraabe nooyenda ku-kurureebaho, kandi kweteegyereza haaba hariho ekintu hanu eki waakubaasa ku . . . Obundi n'eky'okureeberaho kirungiho kakye okukira ekyo ekiri aho, kugira ngu mubaase kukopaho bimwe ahari ebi. Ninja kukibamba ahaiguru aha, kandi buzima nimubaasa kukireebaho kurungi kandi-kandi mukikopooreho.

160 Kandi niinyenda ngu mukitware kandi mukyegyeho, kandi mukigyerageryanise, reero mukore nk'oku kyagamba. Mutakishoma kusha, mukakigyerageryanisa, kureka mukore nk'oku kyagamba mwaba nimukora ebyo. Mukiikirize muhamize. Otagira oti, “Mbwenu, naashemereirwe obu mbaire nkihurikiize.” Naanye, kyanshemeize. Kwonka okukihurikiza, reero n'okukyakiira, hariho entaaniso. Mwareeba? Mwareeba? Hariho omutaano. Mwareeba?

Hariho ebintu ebirikwetengwa mushanju ebirikukora orugyero rwa Ruhanga. Hariho Obusingye bw'Ekanisa Mushanju, obu Ruhanga arabizemu Ekanisa kuhika aha bintu ebi. Kandi Akagira entumwa mushanju kukikora. Hariho mushanju, mushanju. Mwareeba? Mushanju n'e-n'enamba ya Ruhanga y'okumariira, kandi ishatu n'enamba ya Ruhanga y'okuhikiirira. N'ahabw'ekyo, hariho ishatu, hamwe na mushanju ishatu. N'ahabw'ekyo, omu by'okubara, omu by'omwoyo, ahabw'Ekigambo, ahabw'okujurira kw'Omwoyo Orikwera, byona bihikiriize ekyo kintu hamwe.

161 Ka tukyegye.

Reka twongyere aha kwikiriza kwaitu ebintu ebi, reero, kugira ngu tubone kuhika aha rugyero orwijwire rwa Kristo; tuteerainwe hamwe na rukundo ya Ruhanga, okutiina Ruhanga, okwecureeza omu mitima yaitu omwe na

mugyenzi we, ekitiinisa ekihamire ahari omwe na mugyenzi we, okukunda kw'ab'eishe-emwe n'ab'eishe-emwekaza, hatariho bigambo ebirikwitsa enshoni, hatariho ekintu kyona kureka okushemera kwonka kw'Omwoyo Orikwera ohuriire. Mwareeba? Mutuure hamwe, mube Abakristaaayo. Tambura n'okwikiriza. Ikiriza amaani ga Ruhanga gashenenekye nigarabira omuriwe; ikiriza okwetegyereza kwa Ruhanga, kyahika aha kihikire n'ekigwire. Sitaane ku araagire eki yaareeta ekitari ky'Ebyahandiikirwe buzima, kyetantare. Ekyo kihikire.

162 Ninteeekateeka ngu entumwa tiziratweize nkaitwe. Zikagyenda hoonahoona, obundi abashaija b'ebigambo bikye, okuhitsya obu baabaire bahika aha kituuti. Bakaba bataahamu kandi bakora eki baabaire bashemereire kukora, kandi bashohora. Eego, sebo. Bakaba baine obushoboorozi. Bakaba baine amaani. Bakaba batateera mpaka n'abantu. Bakaba nibamanya ahi beemereire. Nikyo ekyo kyonka. Bakaba nibamanya ou baikiriize. Bakaba bagumizamu nibagyendera omu Mwoyo. Nibakora kyonka . . .

Nk'oku naagambire ekiro kiri. Okutengyetsaho kakye omutwe, nikyo ekyo kyonka eki Ruhanga yaabaire ashemereire kukora, reero tihaine ekintu ekyabaire kibazibira. Bakaba batabuuza kibuuzo n'okwega, n'okuhuumiira n'okweraarikirira nk'oku tutwaza, yaaba bashemereire kukora eki nari kiri. Bakaba bagumizamu bakikora omu muringo gwona. Ruhanga okutengyetsaho kakye omutwe, ekyo kikaba kimara, jubajuba. Ahabw'enki? Bakaba nibabaasa kumanya bata ngu Ruhanga yaatengyetsaho omutwe? Bakaba baine ebintu ebi byona omunda hanu, ebirkubaasiisa ebi byona. Kandi okutengyetsaho omutwe kakye kwa Ruhanga kw'okubanza kukaba kushushana na buri kacweka k'ebi, n'Ekigambo Kye. Bakaba nibamanya ngu n'Ekigambo kya Ruhanga, kandi bagyenda. Bakaba bataine okweraarikirira ahabw'ekintu kyona. Ruhanga ku yaabaire agamba, bakaba bagyenda.

163 Nitugamba . . .

Ruhanga yaagamba naitwe, kandi nitugira tuti, "Mbwenu, nituza kugyenda. Nituza kureeba ku turaabe nitubaasa kutuura Amagara aga." Ekintu ky'okubanza noomanya, omuntu akugwise kubi. Mbwenu, buzima, egyo ni Sitaane.

Kuri mureebire oku agyerizeho kundemesa kwija omu ruteerano oru akasheeshe aka. Kuri naimwe nikibahikaho rimwe. Oo, embabazi! Nintekwa kurwana buri kaire naagamba oruteerano. Kandi naaba ninza kushabira abarwaire, n'ondijjo arikufa kandi atajunirwe, nihabaho esimu makumi ashatu ezirikuteerwa omu dakiika ikumi, ku baakubaasa kutunga ekyo jubajuba, kunzibira ngu ntagyenda. "Oo, Ow'eishe-emwe Branham, oshemereire kukora eki." Kwonka hariho omuntu ori omu kabi. Buzima. Yee.

164 Ekiro kiri, nkeetwa kuza ahantu. Omushaija muto, nkagamba nawe eifo hanu oku murikugyeta, eduuka rutaaba, emyaka mikye ehangwire. Akahinduka ntabo-yaago. Omwojo ogu nkaba niimumanya, omwojo murungi munonga, kwonka akaba ari omusiisi. N'ahabw'ekyo nyina akateera esimu. Ninteketeka ngu akeeta Doc emirundi mingi. Nka . . . Kuteera esimu, kandi baateerera Billy esimu, kandi-kandi aha muheru nkatunga obutumwa. Kandi ku naatungire obutumwa, omu mazima, nkaba ntakagiragaho okurwanisibwa kw'amaani nk'okwo omu magara gangye, kuhika aha mwojo ogwo.

Kandi ku naahikireyo, omuntu enshoberwa ogwo akaba atakiimanya. Ngugwo akaba ari aho, arambiire aho, atarikumanya ekiraho, kandi ari atyo. Ishe naagyezaho kumuteerateeraho, naagira ati, "Mukundwa." Kandi omushaija ogu aine emyaka makumi ataano, nk'emyaka makumi ataano na gumwe y'obukuru. Kandi naagira ati, "Mukundwa," eki, "atarikwehindura." Kandi akaba naagyezaho kwimuka. Emikono ye mikye ekuzire erikwingana nka bati obuhango. Omwojo ogu akaba aine ekookoro nyingi munonga okuhitsya obu yaabaire atari kindi kureka ekookoro yonka. Ebicweka by'omubiri bye byona bikaba bijiwiremu ekookoro. N'eshagama ye ekaba eri ekookoro, buri kintu. Kandi akaba ari aho, naagyezaho kwimuka, kandi ari atyo.

165 Nkamukwata omukono, naagira nti, "Woodrow, Woodrow, ogu n'Ow'eishe-emwe Branham."

Ishe yaagira ati, "Torikumumanya? Ogu n'Ow'eishe-emwe Bill. Woodrow, ogu n'Ow'eishe-emwe Bill."

Yaagira ati, "Ahaa. Ahaa," nka batyo.

Kandi ishe yaareeba kandi yaagira ati, "Billy, waija obwire bwahweire."

Naagarukamu nti, "Takakyerererwaga. Ari hanu." Naaba ndi omu rugamba.

Kandi aboojo abandi aho, abandi boojo, abasiisi, bakaba beemereire aho, abanyabuzaare be. Naagira nti, "Nimureeba, boojo 'mwe, mweteguure, 'habw'okuba nimwija kuhika omu mbeera egi. Nimuteekwa kuhikira kimwe omu mbeera egi. Mwareeba? Obundi etari e-ekookoro egi. Nimubaasa kuhikwaho ekindi kintu, okwo omu ruguuto ryengendwa, nimujwererana kuhika aha kufa, nainga ekindi kintu. Nimuteekwa kukihikaho." Twagamba nabo.

Nkaba ntengyereize kureeba eki Omwoyo araagambe kukora. Ntengyereize. Ekintu ky'okubanza noomanya, nkeehuriram u okwo kutengyetsaho kakye omutwe. "Muteho engaro zaawe."

Nkagyendagyenda aho, naagira nti, "Mwena mwinikye emitwe yaanyu." Boona bainika emitwe yaabo. Abatsigazi babiri nari bashatu abaabaire bari aho.

Nkamutaho engaro zangye. Naagira nti, "Mukama Ruhanga, ikiriza omwojo ogu agire obwengye bw'okumanya eki arikuza kukora, atakabugaine ekintu eki. Arikufa. Sitaane egi emukomire, kandi ariyo naagyenda. Asinzire ag'okumwita, mbwenu ngugu ari hanu omu mbeera egi. Ninshaba ngu omugirire embabazi." Kandi ku naamushabiire, akasheeshe akaakuratsireho akaba ashutami, naagaaniira na ishe.

166 Busty Rogers, owa . . . Bakanyeta ahaifo hanu omu irwariro, enshumi nkye echingwire. Ekiro ekyo nkaba ndi ebiso okwo, ahanyima y'okuheza kubuurira eifo okwo omuri Milltown ei Georgie Carter mukye yaakiriire. Mwena nimukikijuka. Kandi aho Ow'eishe-emwe Smith, omubuurizi w'Abametsodisiti, obu yaagizire ati, "Omuntu weena ku araabe yaabatizibwe, omu Iziina rya Yesu Kristo, ashohore arugye omu ihema ryangye," nka batyo. Eruguru okwo aha nyambukiro ya Totten, aineyo orwo ruteerane. Kandi, oo, yancwera orubanja ahabwa buri kintu eki waakubaasa kuteekateekaho. Tindagambire kigambo na kimwe; nkagumizamu. Nkaba ntumirwe. Mukama akampa okworekwa. Eifo okwo hakaba hariyo entaama, ekwatiirwe ahantu omu ihamba. Mwena nimwijuka okwo kworekwa, mwena. Ningira ngu nimwijuka. Nimukikijuka? [Abateeraine baagira bati, "Amiina." -Omur.] Buzima.

167 Ni kirungi. N'ahabw'ekyo nkaba nishuumma nindaba omu ihamba okwo, ningironda.

Nkaza aha nyambukiro ya Totten. Ow'eishe-emwe Wright aho naakimanya. Tukambuka seeri, tutarikumanya eky'okukora. Nkagura eky'okukozesa nk'ekitutu ky'ahonaaho, ahabwa sente emwe. Nkaba niinyenda kuza aheeru aho, nyemerera aho kandi mbuurira nyemereire aha matembezo. Yaagira ngu akaba nainamuka eruguru, aha mutwe gw'akabungo, kugira ebi yaashuubura. Naagyenda nawe. Hakaba hariyo ekanisa mpango ya ira y'Ababaputisiti eyombekirwe eruguru okwo, erimu busha. Mukama yangambira ati, "Yemerera aho."

Naagira nti, "Nyihiramu hanu, Ow'eishe-emwe Wright." Naayemerera. Yaagumizamu eruguru kandi yaagaruka.

Nkazayo, kandi tinaabasa kwigura orwigi. Naagira nti, "Mukama, eki ku oraabe okirimu, Orikwenda ngu ntaahe omu kanisa egi, nyigurira orwigi." Naashutama ahansi aho kandi nkaba nintekateeka.

Naahurira omuntu naija; yaahika aho, reero yaagira ati, "Ori ota? Naaza kukugambira," yaagira ati, "Nooyenda kutaaha omu kanisa?"

Naagira nti, "Eego, sebo."

Yaagira ati, "Nyine ekishumuruzo hanu."

Naatandika oruteerane. Saabiiti y'okubanza, haihi tiaabaho muntu n'omwe. Ekiro ky'okubanza, nkagira abashomi, Ow'eishe-emwe Wright n'eka ye. Ekintu ky'okubanza noomanya, aha muheru gwa saabiiti, tibarabaasize kubona nangwa n'omwanya gw'okwemereramu omu mbuga, haihi. Nabwo ogwo mwana gw'entaama akaba atakaizire. Ow'eishe-emwe Hall akajunwa omu bwire obwo, omuriisa w'okwo hati, boona. Tindabaasize kubona ahu omwana gw'entaama ogu yaabaire ari. Ahanyima y'akaanya kakye, okuruga omu kanisa ya church of Christ, eifo ahansi y'omushozi, ogwo mwishiki muto emyaka mwenda n'ameezi munaana akaba atakeetenganyaga, arambiire aho. Ngugwo akaba ari aho. Mwena nimumanya ebyabaireho.

168 Eego, sebo.

Omwebazyo ogwo Busty Rogers, ekikaaka kihango owaahuumwire amahe obu yaabaire ayemereire aho . . . Naazayo. Kandi aho hakaba heemereireho abashomi b'W'eishe-emwe Smith kunshekerera, kunshungisa, ahabw'okubatiza omu Iziina rya Yesu. Nkaruga omu maizi g'ebeyondo g'aha nyambukiro ya Totten, ahu baabaire baine e . . . [Omwanya oguriho busha aha rutambi rw'amaraka -Omur.] . . . kuhika aha kagyera aho, kandi nikahoorera munonga nk'oku kaabaire nikabaasa. Abadiikoni bakye bakwatanisa naanye.

Naagira nti, "Nyemereire hanu eihangwe eri kujwekyera Ebyahandiikirwe bya Ruhanga Ebirikwera." Naagira nti, "Ninshoma omuri Baiburi hanu ahu Petero yaagizire ati, 'Mweteise, mwena, mubatizibwe omu Iziina rya Yesu Kristo mubone kusaasirwa ebibi byanyu.'" Naahinduka, naaha Ekitabo omwe aha badiikoni.

Naribata naaza aho, reero naagira nti, "Weena orikwenda, akeeteisa ebibi bye, naikirizibwa kwija." Naashuumma omu maizi. Naagira nti, "Nikindeebekyera oti shana Baamaraiaka bashutami ahari buri itaagi hati, nibareeba."

169 Oo, mugyenzi! Nk'omu bwire obu naabatiriizemu abantu nka babiri nari bashatu, abashomi be boona, abo bakazi abajwaire ebiteeteeyi birungi bya siliki, nibataaha omuri ago maizi, nibaborooga n'amaani gaabo goona. Nkabatiza abashomi be boona omu Iziina rya Yesu Kristo. Nimukimanya. Nyine ekishushani kyakyo. Okwo nikwo kyabaire.

Kikaba kiri ki? Aha maani gaanyu kwongyeraho. Mwareeba? Kirekye kyonka. Ruhanga naamanya oku araakikore. Ruhanga naamanya oku araahikiirize ebintu ebi. Reka bagambe ebi barikwenda. Tikirikureetaho ntaaniso yoona. Gumizamu noogyenda.

Busty Rogers ayemereire aho, ku yaareebire ekyo, yaagira ati, "Kyaba kiri kityo ninkiikiriza n'omutima gwangye gwona." Kandi nawe ngugwo yaashuumma omu maizi, ajwaire ebijwaro bye birungi, kandi yaabatizibwa

omu Iziina rya Yesu Kristo.

170 Nk'emyaka eshatu nari ena egingwire, bakanyeta ahaifo hanu kuza omu irwariro omuri New Albany. Ngugwo akaba ari aho, arikufa, ahabw'ekookoro, emuririire kimwe. Abashaho bakamugambira ngu tarahitsye akasheeshe akaraakurateho, akihuriire. Baagira bati, "Arikufa hati." Baagira bati, "Ija ahonaaho."

Nkashuuma naaza omu kishengye, ku naahikiremu, naayemerera aho naashaba. Yaagira ati, "Billy, hariho omuhanganzima ogurkwetooroora omu nshonda hariya."

Reero naahinduka, kureeba. Naagira nti, "Butsy, n'endagaano. Toraafe. Endagaano y'Eshagama yaakujuna."

Naamutaho engaro zangye, naagira nti, "Mukama Ruhanga, okworekwa okwo hariya ka nikuhamya ngu Ori hanu. Endagaano Yaawe eri ngu, 'Emihiririzi Ye niyo yaatukirize.'" Naamutaho engaro, kandi aho yaakiira. Baamusibuura.

171 Kandi nk'emyaka ena nari etaano, nk'emyaka ena, kushoha eby'enyanja oku n'oku aha mugyera n'ebindi byona, kugumizamu omumaisho. Kandi aha mumiro ogurkutaasya omunda ahu ekookoro yaabaire eri, ekaba ehagumiise, hariho eifundo rihango erigumire. Baadokita, abaine obumanyi omu irwariro, bakamugira ngu bakaba baine obujanjabo bwa kobaluti obwabaire nibubaasa kworobya eifundo eryo, kikatuma eby'okurya bingiho byashuuma omurundi gumwe. Kikaba kimugumira kumira eby'okurya bingi, kikaba kimwetaagisa kurya mporampora munonga. Akazayo kujanjabwa. Tindamanyire ngu akaba ariyo.

Bwanyima ku baamushemeize, bakareeba kyamureetera okwesikura, kandi yaashanyarara. Akashanyarara orubaju rwe rwona nka bati. Kandi ekintu kimwe kyonka eki yaabaire naabaasa kukaba kuri okuriraho kakye kwonka. Bwanyima yaakwata ekaraamu, nka batyo, reero yaatandika kugira ati, "aa, aa, aa." Kandi yaagyezaho kuhandiika, naatetema nka batyo, n'omukono gwe murungi. Orubaju rwe rwa bumoshio, rushanyaraire rwona. Kandi yaagorora omukono gwe ati, "Yesu naajuna, 1900 n'ekintu." Tibarabaasize ukuyetegyereza.

N'ahabw'ekyo hati omukazi we ku yaagizire ati, "Ow'eishe-emwe Branham, omuri ebyo tindikumanya eki arikumanyisa."

Naagira nti, "Muky. Rogers, eki arikumanyisa, gukaba guri omwaka gwa 1900 n'omushobo, obu yaajunwa kandi akabatizibwa omu Iziina rya Yesu eifo okwo. Ekyo nikyo kirikumuhwera hati. Tatiinire kufa."

Naagira nti, "Mukama Ruhanga, juna amagara ge. Ninkishaba, omu Iziina rya Yesu, ngu Ojune amagara ge." Naamutaho engaro. Okushanyarara kwamurugaho. Okwesikura kwareka. Reero yaimuka omu kitabo. Mbwenu hati akakira, naaha obujurizi.

172 Aha kwikiriza kwanyu mwongyereho, amaani; aha maani gaanyu mwongyereho, okwetegyereza; aha okwetegyereza kwanyu, okwerinda; aha kwerinda kwanyu, okugumisiriza; aha kugumisiriza kwanyu, okutiina Ruhanga; aha kutiina Ruhanga kwanyu, okukunda ab'eishe-emwe; aha kukunda ab'eishe-emwe kwanyu, Omwoyo Orikwera, reero Kristo aryaija. 'Habw'okuba, ahansi Ye . . . Omwoyo Orikwera n'Omwoyo wa Yesu Kristo kutaaha omu kanisa, kworeka ebintu ebi. Oo, mugyenzi!

Nzizi hanu, zaaba shaaha mukaaga n'edakiika ikumi na itaano.

Ninkunda . . . Niimukunda

Ahabw'okuba Akabanza kunkunda,

Eifo munonga hanu, otakabaire ekintu kyona.

Kandi yaagu- . . . (Akakora ki?) . . . okujunwa kwangye

Aha musharaba Gologosa.

Nimba nti nta? Ahabw'okuba Akabanza, kunkunda.

Niimukunda, Niimukunda

Ahabw'okuba Akabanza kukunda . . . (Egyo niyo nshonga.)

Kandi yaagura okujunwa kwangye

Aha musharaba Gologosa.

173 Nindagaanisa, akasheeshe aka, Ahariwe n'omutima gwangye gwona, ngu, ahabw'obuhwezi Bwe n'embabazi Ze, ninshaba ngu ninza kusherura buri izooba ntarikureka, okuhitsya obu ndaayehuriremu ebirikwetengwa ebi byona nibisheneneka omu mubiri gwangye ogu omukye ogukuzire, okuhitsya obu ndikubaasa kworeka Kristo ohuriire. Ahakuba, Akahinduka ekibi nkaanye, kugira ngu mbone kuba . . . mbone kuba okuhikiirira kwa Ruhanga, Nkawe. "Akatwara omwanya gwangye; Mukama, ka ntware Ogwe hati." Ahabw'okuba, nikyo kigyendererwa eki

Yaafeereire. Ni bangahi abaraije kuragaanisa ekintu ekyo kimwe, ahabw'embabazi za Ruhanga? [Abateeraine baagira bati, "Amiina." -Omur.] Twinikire emitwe yeitu hati, kandi twereerize emikono yeitu. "Ni . . ."

Ninkiragaanisa, Mukama, ekanisa egi neekiragaanisa, "Orugyero orwijwire rwa Yesu Kristo!"

Ahakuba Akabanza kunkunda

Kandi yaagura okujunwa kwangye

Aha musharaba Gologosa.



[www.messagehub.info](http://www.messagehub.info)

Obutumwa obu bukabuuirirwa  
**William Marrion Branham**  
"... omu biro by'eiraka ..." Kush 10:7